

**SEVENTH LEGISLATIVE ASSEMBLY OF MIZORAM
(TWELFTH SESSION)**

LIST OF BUSINESS

FOR FOURTH SITTING ON FRIDAY, THE 17th MARCH, 2017
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

PRIVATE MEMBERS' BUSINESS

2. * **Resolutions**

NGURTHANZUALA
Secretary

* Please see Bulletin Part-II No. 159, dated the 15th March, 2017 for relative precedence of Private Members' Resolutions to be moved.

SPEAKER : Mi tam takin roreltute duhsak hlawh an tum a; Mahse, mihring chung a rorelna chu Lalpa hnen atanga lo chhuak a ni.

Thufingte 29 : 26

Zawhna no.10 na kan la nghal ang a, zawhna neitu MLA zahawm tak Pu Lalthanliana zawt turin i lo sawm ang.

Pu LALTHANLIANA : Pu Speaker, ka lawm e. Rural Development Department changtu Minister zahawm tak chhan atan ka zawhna chu Vidhayak Adarsh Gram Yojana hnuai Model Village atan hian sorkar in sum engemaw zat tal a dah thei em tih a ni e. Ka lawm e.

S P E A K E R : Rural Development changtu Minister zahawm tak Pu Lalzirliana sawm nghal ila.

Pu R. LALZIRLIANA, MINISTER : Pu Speaker, ngaihdam kan dil e, khulaih ah khuan thil laklawh a awm lawk alawm le. Tuna member zahawm tak Pu Lalthanliana zawhna chhanna kha VAGY hnuai Model Village atan hian sorkar in sum a dah rih lo a ni.

S P E A K E R : Zawh belhna a awm em ? Aw, Er.Lalrinawma i lo sawm ang.

Er. LALRINAWMA : Pu Speaker, ka lawm e. Hei hi vawiin chu kan thlang thliah thliah a, a lawmawm in ka hria a. Hei hi sorkar in a tui pui lo deuh nge, engvanga dah belh lo nge a nih tih kha ka zawhna a ni e.

S P E A K E R : Zawh belhna Pu Lalthanliana i lo sawm leh ang.

Pu LALTHANLIANA : Pu Speaker, ka lawm e. Dah tumna sorkar in a nei em tih kha kan zawt ve hrim hrim teh ang.

S P E A K E R : A pahnih khan Ministerin chhang nghal mai se.

Pu R.LALZIRLIANA, MINISTER : Pu Speaker, hei hi Prime Minister zahawm tak in State tin Chief Minister te hetiang anga Model village hi lo siam ve tura a rawn request-na kaltlanga tih a ni a. Chuvangin Central atangin sum a rawn dah chuang lova, hei hi Mizoram sawrkar chuan keimahni ah hian MLA ten fund ` 100 lakhs lai kan lo nei tawh bawka. Chutiang atang chuan sorkar chuan Model village atana MLA theuh tena an thlan kha chu an lo duhsak ve mai tur ah kan ngai a ni.

S P E A K E R : Pu Rinawma i lo sawm ang.

Er.LALRINAWMA : Pu Speaker, ka lawm e. Khalai tak kha a dik hmeh fu in a lang na in entirnan, mahni bial chhunga model village thlang te tan kha chuan a dik thei mai a. Chutih lai karah Aizawl bialtu ten thingtlang lam ah thlan an nei nual ta a ni. Kan MLA fund provision ah hian khatiang mahni bial pawn lama hman theihna dan kha engemaw disaster lam pang a nih loh kha chuan a awm si lova. Khalai tak kha engtingge min hrilhfiyah dawn tih kha kan zawh belh a ni.

S P E A K E R : Minister in a chhang thei em aw ? A har deuh hlek maithei a ni. Han chhang dawn teh se.

Pu R.LALZIRLIANA, MINISTER : Kan rules MLA LAD ah khan guideline ah khan ‘tul bikah’ tih a ni a, chumi in a kawh chu ‘emergency’ tih a ni nghe nghe a. Emergency chu a ni lova, chuvangin a hmingin an thlang ve a, a theih chin chin ah centrally sponsored scheme atanga duhsak tura kan ngen theih chuan khawpui MLA ten thingtlang a an han thlan te kha, khalai bial ah kha chuan an thlan a inan loh kha chuan MLA leh khami bial neitu khawpui MLA leh Zokhua a constituency neitute MLA te thlan a inan loh chuan khalai kha centrally sponsored scheme atanga engemaw tia duhsakna a awm thei em tia la sawiho te chu a tha ang chu. Ka lawm e.

S P E A K E R : Awle, i duh tawk mai ang aw, zawhna no. 11-na neitu Dr.K.Beichhua i lo sawm ang.

Dr.K.BEICHHUA : Pu Speaker, ka lawm e. Commerce and Industry Department changtu Minister zahawm tak hnena ka zawhna chu :

- a) NLUP showroom-cum emporium DIC Lunglei hi estimate engzatnge ?
- b) Khawi atangin nge funding hmuh a nih ?
- c) Tender a ni em ? Ni ta se, tuten nge chhang ? Tunge thlan a nih?
- d) Layout plan hi tu siam nge tih a ni e.

S P E A K E R : Awle, Industry Minister zahawm tak chhang turin i lo sawm ang.

Pu H.ROHLUNA, MINISTER : Pu Speaker, MLA zahawm tak Dr K.Beichhua zawhna chhanna chu : a) NLUP show-room cum emporium, DIC, Lunglei nilovin “Renovation of Industry Building ground floor at Lunglei for Emporium and Garrage” tih tur a ni. Estimate hi ` 926000.

b) Funding hi NLUP Implementing Board, Mizoram atanga hmuh a ni.

c) He hna hi Tender a nilo.

d) Layout Plan hi Assistant Engineer, Bamboo Development Agency siam a ni, tih a ni.

S P E A K E R : Zawhbelhna a awm em ? A zawhna neitu atangin ? A awmlo a ni awm e. Zawhna No.12 na ah kan kal tawh ang a, a lawmawm e. Zawhna neitu Dr Ngurdingliana i lo sawm ang.

Dr NGURDINGLIANA : Pu Speaker, ka lawm e. Public Works Department changtu Chief Minister zahawm tak chhan atan, Khanpui to Tualbung kawng laih hi engtikah nge chhunzawm a nih theih ang ? tih ka zawt e.

S P E A K E R : Awle, Department changtu Chief Minister zahawm tak i lo sawm ang.

Pu LAL THANHAWLA, CHIEF MINISTER : Pu Speaker, member zahawm tak Dr Ngurdingliana zawhna chhanna chu : Khanpui to Tualbung kawng laih hi DoNER Ministry atanga laih a ni a. Fund an rawn release veleh chhunzawm leh a ni ang.

S P E A K E R : Zawh belhna a awm em ? Aw, Pu Lalruatkima i lo sawm ang.

Pu LALRUATKIMA : Pu Speaker, ka lawm e. Chalfilh Constituency chhung ami tho a nia, kan Minister zahawm tak khan chhang thei tho turah kan ngai a. Vanzaua Tourist department building sak mek khi Tourism department hnenah hlan a ni dawn tawh em ? Ni ta se, engtik nge hlan a nih ang tih leh khi khi Tourism ta a ni lova, PWD sak a nia, Pu Speaker, PWD-in a enkawl vek a, a building sak khi PWD in an sak vek avangin Tourism department-ah engtik ah nge hlan a nih ang tih kha kan zawt duh a ni a, engzatnge contractor hnenah hian la pek loh tih kha kan zawt leh bawk a ni e.

S P E A K E R : A in mil teh chiam em aw, ka hre lova, han zawt law law teh se Pu Rinawma khan aw.

Er. LALRINAWMA: Pu Speaker, ka lawm e. He hna hi engzat percentage nge thawh a nih tawh ? A hnathawh nan engzat nge hman a nih a, financial achievement leh physical achievement engzatnge tih kha kan zawt a. Pahnihna ah chuan contractor tunge tih kha ka zawh belhna a ni.

S P E A K E R : Awle, a pahnihna a hnukung zawka kha a relevant zawk mai awm mang e.

Pu LAL THANHAWLA, CHIEF MINISTER : Pu Speaker, member zahawm tak Er.Lalrinawma zawhna, engpawhnise, Vanzau-ah Tourisim building sak a ni tih ka hre lova, ka lo zawt ang a, ka hriat hunah ka rawn chhang dawn nia. Tin, Tourist Lodge hi khutianga sak chi a nilo hrim hrim a, tun hnu ah chuan hmasawanna awm deuh, pawisa duh vang leh pawisa hmuhchhuah vanga thingtlang kilkhawr tak tak ah (ka tawng tu huatthu suh ah) sak hi chu a dik chiam lo a ni. Khanpui – Tualbung road hi NLCPR ami a ni a, 4.7.2011 khan of DoNER-in ` 197.21 lakh an sanction a, 25.5.2012 khan Pu C. Lalhluna, Ramhlun hnenah ` 165.238 lakh hna hi pek a ni. Khanpui-Tualbung road hian Lailak khua a kal tlang a.

Zawttu member zahawm tak khan a lo hriat loh takin kan hrilh nghal a ni. Lailak hi 2km, Lailak to Tualbung hi 16.70km, tuna kawng siam mek Khanpui – Tualbung road phase-I hian Khanpui 2km leh Lailak to Tualbung 5km, a vaia 16.70 km atang khan a huam a. He kawng pumpui sei zawng chu 7km a ni. Khanpui-Tualbung road hi PWD Schedule of rate 2008 DPR estimate siam niin Ministry of DoNER hian 2011-ah a sanction chauh avangin thil man a sang chho hman em em a. Hetih rual hian Khanpui- Lailak 2km hi PMGSY Scheme atanga thawh tawh a ni a, culvert leh retaining wall chu la thawh loh a ni. Chuti chuan Khanpui-Lailak inkar culvert leh retaining wall te leh Lailak-Tualbung 5km kawng laih side drain culvert leh retaining wall siam chu PWD Schedule of rate 2010 hmangin estimate hi siam thar a ni. Hemi hmang hian 13.2.2011 khan State sorkar-in ` 197.21 lakh administrative approval a pe tawh a. Tuna contractor-in a thawh zawh chin chu : 5km hume pipe culvert 12, RCC slab culvert 4, 7 awm ah. Tin retaining wall 30 mtrs te an ni. He hna hi phase I chauh a la nih avangin pavement work a la tel lo a ni. He hna pumpui thawhzawh hun tura ruahman chu, a tira ruahman ang chuan 30.5.2013 a ni a, a hnuah 31.3.2017 ah sawn leh a ni. Hei pawh hi fund hmuh dan a zir a ni ang, he project hi 90% DoNER state matching share atanga thawh a ni a. Tin, 28.2.2017 thlenga fund hmuh tawh zawng zawng chu hetiang hi a ni.

DoNER atangin ` 124.31 lakh, hei hi 3rd installment thlenga hmuh tawh a ni

a, State Government atangin ` 13.81 lakh, hei hi 3rd installment thleng bawk hmuh a ni. A vai hian ` 138.12 lakh a ni tawh.

Tin, 28.2.2017 thlenga pawisa hman tawh chu ` 138.12 lakh a ni a, NLCPR hnuaia hnathawh Central lama fund release hi a muang em em a, he kawng project hi fund released tlai avangin tun thlengin zawh a la ni theilo a ni. Pu Speaker.

S P E A K E R : Duh aiin a fiah mah lo maw? A lawmawm e. Zawhna No. 13-na neitu Pu Vanlalzawma, MLA zahawm tak sawm ila.

Pu VANLALZAWMA : Pu Speaker, ka lawm e. Transport Minister zahawm tak chhan atana ka zawhna chu -

- a) Two Wheeler Taxi permit engzah nge pek ni tawh?
- b) Mi engzatin nge lei tawh a, register tawh?
- c) Rate siam fel a ni tawh em?
- d) Stand siam sak an ni em?

S P E A K E R : Department neitu Transport Minister zahawm tak i lo sawm ang chhang turin.

Pu JOHN ROTLUANGLIANA, MINISTER : Pu Speaker, Starred Question 13-na member zahawm tak Pu Vanlalzawma zawhna chhanna chu hei hi a ni e.

- a) Two Wheeler Taxi Permit hi mi 221 hnenah pek tawh a ni.
- b) Taxi atana Two Wheeler lei tawh zat hi hriat theih a la ni lo. Two Wheeler Taxi hi 24 register tawh a ni
- c) Rate siam fel tawh a ni
- d) Stand hranpa siamsak an ni lo.

Pu Speaker, ka sawi belh duh chu a stand hi keini Transport Department kut a ni lo a, AMC lam kut a ni a, Taxi stand te, Two Wheeler stand te hi. Tin, hetah hian kan sawi tel leh duh chu Two Wheeler Taxi kan siam hian hmeichhia in an khalh chuan hmeichhia chu an phur ang, mipa an phur thei lovang tih te kha venthawn thil thuah kan han ti a. Amaherawhchu tunah hian kan ennawn leh mek a, heng te pawh hi siamthat turin ruahmanna kan siam mek a ni. Ka lawm e.

S P E A K E R : Zawhbelhna, zawhna neitu i lo sawm ang.

Pu VANLALZAWMA : Pu Speaker, ka lawm e ka zawh belh duh pakhat chu a rawn sawifel nghal a, hmeichhe khalh leh mipa khalh. Tin, hmeichhe khalh tur kha a rawng hran a awm nge? Kha kha mipa in a khalh sak ve theih em tih kha ka zawhna ni ta se la. Tin, Two Wheeler Taxi chuang ho (passenger) tan hian helmet khum hi a tul ve kher em tih kha ka zawhbelhna a ni.

S P E A K E R : Minister zahawm tak sawm ila chhang sela.

Pu JOHN ROTLUANGLIANA , MINISTER: Pu Speaker, khami passenger te tan khan helmet khum ve kher a ngai hran lo. Tin, pakhat leh a zawhna kha, a colour chungchangah kha chuan colour hranpa kha kan ti lova helmet zawk kha yellow colour tur a ni a, a number plate kha a eng ang a, a number a dum dawn a. Chuvang chuan a khalhtu tur kha hmeichhia leh mipa khalh tur tih kha a awm hran chuang lo, an khalh thiam ve ve chuan engpawh kha an khalh thei.

Tin, hemi hi House-ah kan sawifiah duh chu Pu Speaker, hemi Pillion rider ho helmet tih chungchang hi Supreme Court in tih ngei ngei tur a ni a tih avang khan zawhna te kan tawng a, chuvang chuan Mizoramah pawh tih tur a ni tih kha hman deuhah khan order an rawn chhuah a ni. Kha kha chu zep thu pawh awm lo Pu Speaker, khu ti lama kan in chhan fel ve na a ni deuh mai e. Kan implement chuang lo ve.

S P E A K E R : Zawhbelhna a awm tawh lo. A lawmawm e. Zawhna No.14-na neitu Pi Vanlalawmpuii Chawngthu zawt turin i lo sawm ang.

Pi VANLALAWMPUII CHAWNGTHU : Pu Speaker, ka lawm e. Ka zawhna Starred Question no. 14-na Rural Development Minister zahawm tak chhan atan:

- a) East Lungdara Mini Sport Complex dah tur hi engtika thawh zawh tur nge?
- b) Engzata thawh nge? Pu Speaker, hei hi Estimate engzat nge tih tur zawk a ni. Ka lawm e.

S P E A K E R : R.D. Minister zahawm tak sawm ila.

Pu R. LALZIRLIANA, MINISTER : Pu Speaker, nula Vanlalawmpuii Chawngthu zawhna chhanna chu .

East Lungdara Mini Sport Complex hi NLCPR hnuai ami a ni a, kum 2016-17 atanga kumin tan a ni a. Approved amount hi ` 434.96 lakh a ni a. Heta tang hian 1st installment ` 1,73,98,000 hmuh a ni a, sms pawh hmuh a ni tawh a, tender kal

tlangin Contractor consultancy firm thlan a ni a. A hnathawktu tura thlan hi Lushai Engineers, Ramhlun 'S', Aizawl, Mizoram te an ni a. Government of India, Ministry of DoNER instruction angin, a thawh hun chhung atan hian kum 3 a ni e.

S P E A K E R : Zawhbelhna a neitu khan a nei em? A neih loh chuan Er. Lalrinawma'n zawt sela.

Er. LALRINAWMA : Pu Speaker, ka lawm e. Consultancy firm kan ruai a, R.D. Department hi works department an ni hran pawhin a lang si lo a. Tu in nge technical sanction pe tih ka rawn zawt e.

S P E A K E R : R.D Minister in a chhang thei ang.

Pu R. LALZIRLIANA, MINISTER : Technical sanction hi sorkarin a pe ang chu.

Er. LALRINAWMA : Pu Speaker, sorkar chuan a pe teh meuh mai, amaherawhchu works department lovin a pe thei si lo a, R.D. in a khawih si a, engtingge technical sanction in pek kan ti a ni. Tin, kan technical sanction hi sorkar-in a pe ngawt lo, work department- ten an pe thin a ni.

Pu R. LALZIRLIANA, MINISTER : Pu Speaker, Consultancy Firm hi designed at built anga tih te a awm a. A tir atanga anmahniin a estimate an siam a, a tawp thlenga an thawhte a awm a. Chutiang chuan Centrally Sponsored Scheme lo kal zawng zawng hi tunah hian sorkar-ah, Finance Department-ah a lut vek a ni.

Er. LALRINAWMA : Pu Speaker, khalai kha Finance Deptt. pawhin ti mahsela technical sanction kha an pek a ngai a ni. Chu chu technical sanction petu kha tunah hian ka zawt mai a ni. A chhan chu tuna kan kalphungah hian.... (SPEAKER : Chu chu zawh belhna a ni tawh lo, sawi belhna a ni tawh). Government of Mizoram Allocation of Business Rules, 2014 pawh kan nei a, tah chuan dan thlep thlep a awm a a ni, thawh tur leh tihlai ah khan. Khalai karah contractor tam tak te pawh kan nei a, PWD hote, work department-te pawh, khatihlai kara helaia Work Department ni lo ten hna kan thawk vak vak mai lai kha thil mak tak a ni a. Tin, a technical sanction pawh kha anni pawhin an pe thei lo, Work Department chauhin an pe thei, chu chu ka zawh lai chu a ni. Finance pawhin ti mahsela an pek a ngai.

S P E A K E R : Pu Rinliana.

Pu LALRINLIANA SAILO : Pu Speaker, ka lawm e. Central atanga department hrang hranga pawisa an rawn pek thin, helaia technical sanction tul lem lova direct a an rawn pek thin hi a awm in ka hria a. Chu chu Mizoram hian a petu tur a hranpaa a siam lem lo in, chu chu a nung mai dawn lo em ni tih kha ka zawt a ni.

Pu LALRUATKIMA : Pu Speaker, Delegation of Financial Rules kha a kalh lo em ni? A kalh em tih ka zawh belh a ni.

Pu K.S. THANGA : Pu Speaker, Finance Department in Empanel Firm 40/50 Mizoramah hian a nei a, hemi a siam nachhan hi kan works department PWD-te an work load sang lutuk, an thawk tha em em a, chak takin hna an thawk a ni. Mahse, an thawh sen loh lutuk avangin kan ram a development hi, tun kan sorkar hi an thawk chak em em a, sum te an hmu hnem a, chumiah chuan PWD-in an ven sen loh veng turin Empanel Firm a siam a ni. Chung ho chuan hetilaia technical sanction ngai lo khan, khalai kha zirchian a tha in ka ring a. Vawiinah hian Finance Deptt. in a empanel te khan PWD-in a tih ngai lo khan an thawk thei a ni tih kha kan hriat tlan a tha a. Chu chu a dik em tih kha ka rawn zawt a ni.

S P E A K E R : Zawh belhna a ni chiam tawh lo ve, hnial belhna i siam palh ang.

Er. LALRINAWMA : Pu Speaker, khalaiah khan kan Parliamentary Secretary zahawm tak khan eng GFR nge a tlawhchhan tih min rawn hrilh sela. A chhan chu technical sanction chungchangah hian thil buaithlak tak a awm niin a lang a. Tin, PWD-ten hna an thawk seng lo tih lai kha, works department ten an thawk seng lo ti a kan hel zel dawn a nih chuan kan Chief Minister zahawm tak hi No Confidence Motion kan move hnan a va ni mai awm ve tih ka zawt duh a ni.

S P E A K E R : A neitu Minister i ngaithla ang.

Pu R. LALZIRLIANA, MINISTER : Thil harsa lo, thil buaithlak lo tak a ni a. Tuna kan Parliamentary Secretary zahawm tak sawi ang khan, empanelment, hemi kan mithiamte, kan thalai lehkha zir chhuak tharte mithiam tam tak engineer-te pawh sorkar-a lut ve thei kher lo te an awm a. Chuvang chuan, empanelment hi siam ve ila, nuaih 400/500/4000/5000 tih chhoh zel pheih chuan chu aia tam te pawh chu, sorkar, PWD emaw, PHE emaw, Electric emaw han ti buai lo deuh hian tih dan awm se ti a thalaite tan a hamthatna zawna a ni a, he empanelment siam hi.

Chutiang chuan tunah hian hna lian pui pui tam tak thawh a ni tawh a, chu chu a technical sanction tak hi PWD lam atang hian engineer-ten an rawn pe thin a. Chu chu a lo ni zawk a ni e. Pu Rinawma kha a lungawi thei tawh mai lo em ni?

S P E A K E R : E, lungawi tih piahlam a ni tawh. 15-na kan la ang a, a neitu Pu K. Sangthuama zawt turin i sawm ang.

Pu K. SANGTHUAMA : Pu Speaker, ka lawm e. Ka zawhna Starred Question 15-na, PWD Minister zahawm tak chhan atan-

- a) Ramrikawn to Lungverh kawng siamthat tumna a awm em?
- b) Awm tase pawisa engzatnge dah a nih?
- c) Tender koh a ni tawh em? Koh nise tunge contractor an thlan?
- d) Hna tan tawh a ni em? tih hi ka zawhna a ni e.

S P E A K E R : Department neitu House Leader zahawm tak chhang turin i sawm ang.

Pu LAL THANHAWLA, CHIEF MINISTER : Pu Speaker, member zahawm tak Pu Sangthuama zawhna chhanna chu-

- a) Ramrikawn to Lungverh upto NH-54 kawng 7.758 km a thui hi NABARD loan hnuaiiah kum 2016-2018 chhunga siam that tum a ni.
- b) ` 931.86 lakhs estimate sanction a ni.
- c) Tender hi koh a ni tawh. He hna thawk tur hian contractor Pu Lalfamkima, Ramhlun North, Aizawl thlan a ni.
- d) Hna hi thawk tan turin contractor hi a in puahchah mek a ni.

S P E A K E R : Zawh belhna a awm em, a neitu atangin?

Pu K. SANGTHUAMA : He kawng hi widening tumna a awm em, nge black topping ringawt thawh tum em ni tih leh thal chhung hian zawh theih beisei a ni em tih kha ka zawt leh duh a. Tin, kawng hi km 7.758 chauh ni siin ` 931.86 lakhs hi sanction a ni a. Hetilaiah hian widening tumna a awm leh awm loh kan Minister zahawm takin min chhang se. Widening hi tum a nih loh pheh chuan kawng khu a zim em em a, black topping ringawt a hei zat zat a nih chuan, motor lian a kal pawhin a in pelh that theih bawk si loh a, a pawimawh si a.

Hmanniah contractor ka zawt a, 'black top ringawt hi hetilaia an tih tur a ni e,' a ti a. Widening atan a va tha ve, tunah khuan a zim ropui si a, a pawimawh si a,

highway a lo ni a, kan zavai atana thil phurh chhohna a lo ni bawk si a. Tlem han widening a kawng puitling ni thei mai tur, chuti nilova black top ringawta pawisa hei zozai hman mai hi ngaihtuah that leh atan a va tha ve tih kha ka'n sawi zau duh bawk a ni.

SPEAKER : I zawt lem lova, i sawi zau ringawt maw? Aw le, Pu Ruatkima'n zawt leh rawh se.

Pu LALRUATKIMA : Pu Speaker, khulai kawng khu, Ramrikawn to Lungverh upto NH-54 thleng khu nikum khan a maintenance nan engzatnge kan sen tih kha ka zawhna pakhatna nisela. Contractor hian security deposit a dah tawh em? A la dah loh chuan engtikah nge a dah dawn? Security deposit a la dah loh avang hian hna tan loh ni te pawh khan a lang a, chu chu ka zawh belhna ni sela.

Tin, Pu Speaker, point khat chiah ka'n sawi belh duh chu, a rate leh a length kha han ngaihtuahin km1-ah nuaih 120 vel a ni a, chuvang chuan black top ringawt a nih kha chuan motor lian pawh a in pelh hleihtheih lohna hmun khu a tam zawk a ni a, khalai kha an rate, SOR engzahnge an hman, khatiang rate chhut chhuah nan khan? Tih hi ka zawh belhna a ni. Eng kum a mi nge SOR an hman tih kha ka zawt tel a nih chu.

S P E A K E R : House Leader chhang turin sawm ang.

Pu LAL THANHAWLA, CHIEF MINISTER : Pu Speaker, khulai kawng khu a pawimawh a, hemi kawng pangngai a chhiat chang chuan kal loh theih loh chang a awm thin a, chumi hria a thawh chu a ni. Tin, widening lampang hi tih chi ah kan ngai lova, a chhan chu a project cost let vel compensation a tul dawn avangin. Chuvangin, compensation kan phut lovang, widening ti rawh u, an tih chuan lawm takin widening kan ti anga. Amaherawhchu, compensation an phut avangin a project cost aia tam a compensation tih kha chu kan tlin lovah kan inngai a ni. Chu chuan in zawhna dang pawh kha a chhang deuh vekin ka hria a.

Tin, SOR chu a latest, a thar ber, 2016 hman a ni a. Tin, a hna hi tan turin tunah an inpuahchah mek a, a tul tul chu an ti anga, a tul tul ti lo chuan a tan theih lova, chuvangin a tul tul hi ti turin an inpuahchah mek a ni, contractor pawh.

Pu LALRUATKIMA : Khawngaihin, nikuma maintenance fund kan dah, kan siamna kha, kan siam laiin a chhe leh zel mai a, motor te pawh a kal hleithei lova. Khatah khan engzah nge kan sen reng kha kan Minister zahawm tak khan min hrilh thei em aw, ka'n ti a ni.

Pu LAL THANHAWLA, CHIEF MINISTER : Pu Speaker, tun ami nen hian a in relate loh avangin ka chhang thei lovin ka ring a. Tin, thal chhungin zawh tur a ni kan tih kha, thal hi eng chen nge ni dawn tih hi a hriat loh thin a. A changin thal hi a rei lo em em a, a changin an rei deuh a. Thal rei kum chu ni se kan zo hman ang.

S P E A K E R : Pu Zawma'n zawt law law rawh se.

Pu VANLALZAWMA : Kan Chief Minister zahawm tak khan a chhang thei tho in ka'n ring deuh a. Hemi hrul ami zawhna han zawh ka duh lai chu, Ramrikawn lam atanga lo kal zel hian Aizawl tlak lamah hian bypass road siam tumna a awm em? tih kha ka'n zawt duh a ni a. A chhan chu chhuah lamah Thuampui atangin sawtah Silaimualah bypass road tha deuh kan nei a, a tangkai khawp mai a. Hetiang deuh kawng hi tlak lamah khuan tunhma deuh pawh khan sawi hi a awm tawh thin a. Kha kha tunah a la awm em tih kha ka'n zawt a ni.

S P E A K E R : Chhang thei em?

Pu LAL THANHAWLA, CHIEF MINISTER : Chhuah lama bypass ang chi chiah ni lovin, mahse nakinah chuan la tangkai turin UD & PA te nen hian Ring Road ang deuh, traffic congestion te pawh han tih tlemna tur ang chi hi ngaihtuah mek a ni.

S P E A K E R : Pu K. Sangthuama

Pu K. SANGTHUAMA : Khulai kawng khu nikum khan nuai 84 in black topping kha sorkarin a rawn buatsaih a, a lawmawm em em rualin, mumal lova khawihin a riral zo ta mai a, chu chu nikum pawh khan hetah ka sawi tawh a. Tunah hian 1 KM ah nuai 100 deuh ngawt sanction a ni a, chumi a nih avang chuan khawngaihtakin khulai kawng khu kawng puitling, ti mai ila, black top hunah pawh min ensak tha deuh ula, ka bial a nih avangin ka'n ngen duh a. Tha taka an thawh theih nan leh tha taka kawng khu an zawh theih nan. Pawisa a tam si a, a uihawm si a. Khawngaihtakin kan PWD Minister hian min lo enpui lehzual se a tha in ka ring a. Tin, khulai khawtlang pawh Committee an insiam a, tha taka an thawh theih nan lo thawhpui an tum a. Chu chu min hriatsak turin tunah hian ka'n ngen a ni e, kan PWD Minister zahawm tak hi.

S P E A K E R : Ngenna a ni e.

Pu LAL THANHAWLA, CHIEF MINISTER : Pu Speaker, zawhna a nih loh avangin (SPEAKER : Nia, zawhna a ni lo, ngenna.) zawhna ni lo kha ka chhang duh hrim hrim. Kan member zahawm tak thahnem ngaihna hi a lawmawm ka ti a. Tin, khawilai kawng pawh ni sela, kan zavai ta a ni a, tute emaw dem nana hmang lova, blame game lampang ti lova hetiangka kan contractor-te an lo tanpui thin hi tha tak a ni.

Hemi National Highway, Lunglei tlangdunga kan thawh lai pawh hian khawtin deuhah khan, kan sawmna in an lo thawhpui a, hna pawhin a that phah a. Inti lal taka, inspector ang zawnga lo inspect lovin, thahnem ngai tlangin an han thawk tan hlawm a ni a, a tha em em mai a ni. Tin, khawi khawiah emaw an thawh pangngaia an va black top tel loh tur te pawh kha an va black top sak ve a, tha tak a ni a. An thawh zawh hlim phei kha chuan a tha lutuk a, Serchhip ho phei kha chuan an rawn complain a. ‘Two wheeler-te hi an accident zing lutuk a, motor-te pawh a accident a accident mai,’ an rawn ti a. ‘A chhiatin in complain a, a thatin in complain lehzel a, chutiang ka hre tawh bik lo ve,’ ka lo ti hial a ni.

S P E A K E R : A lawmawm e. 16-na ah kal ila, zawhna neitu Er. Lalrinawma, MLA zahawm tak zawt turin i sawm ang.

Er. LALRINAWMA : Pu Speaker, ka lawm e. Commerce & Industries Deptt. changtu Minister zahawm tak hnena ka Starred Question no. 16-na-

Tun dinhmunah India leh Myanmar emaw, Bangladesh emaw nena insumdawn tawna kal zelah Mizoram chhungah Border Haat siam tumna a awm em? Lo awm ta se khawi hmunah te nge siam tum a nih tih ka zawt e.

S P E A K E R : Commerce & Industries Deptt. Minister chhang turin i sawm ang.

Pu H. ROHLUNA, MINISTER : Pu Speaker, member zahawm tak Er. Lalrinawma Starred Question 16-na chhanna chu-

Tun dinhmunah chuan India leh Myanmar nena insumdawn tawna kal zelah Mizoram chhungah Border Haat siam tumna a awm a, chungte chu :

- 1) Mizoram ramri chhungah Hnahlan, Myanmar lamah chuan Darkhai ani a, chu chu Hnahlan zawn a ni a.
- 2) Vaphai a ni a, Myanmar lamah Leilet.

- 3) Mizoram ramri hrulah Zote, Myanmar lamah Fartlang.
- 4) Pangkhua, hei hi Sangau bul a ni a, Myanmar lamah Thau a ni.

Bangladesh border nen chuan ram pahnihte hian Border Haat location tur tih fel a la awm chiah lo a ni.

S P E A K E R : Zawhbelhna a awm em? A awm lo. 17-na ah kan kal thei e. A lawmawm e. A neitu Dr. K. Beichhua.

Dr. K. BEICHHUA : Pu Speaker, ka lawm e. PWD changtu Minister zahawm tak hnena ka zawhna chu-

- a) Tun dinhmunah hian Mizoram kan inkalpawhna lei(bridge) him tawk lo a awm em?
- b) Awm ta se, engzat nge tih a ni e.

S P E A K E R : Aw le, Department neitu kan House Leader i sawm ang, chhang turin.

Pu LAL THANHAWLA, CHIEF MINISTER : Pu Speaker, tun dinhmunah tak hi chuan lei (bridge) him tawk lo awm lova hriat a ni a. Amaherawhchu, khawvel a ni a, engemaw hlekah a him lo leh thei thin a. Tuna kan dinhmunah hi chuan him tawk lo awm lova hriat a ni.

Tin, chutiang a nih avangin awm ta se, engzat nge tih kha. Lei him tawk lo awma hriat a nih loh avangin hei hi chu sawi zel ngaihna a awm chuang lova. Sawi leh sawi hnu, kan leite hi a him a ngaih pawh a him lo thei a, kan ram leilung avang hian. Chutiang chu a nih avangin a him vek e tih mai theih pawh a ni lova, engemaw karah a lo him lo ve theite a ni a. Tin, lir te hi mihring in kan feel tham loh, kan zuk hriat tham loh hi a nghing zeuh zeuh reng a ni, mithiamte'n an ti a. Chutiang chuan Richter Scale-a tlem deuh angte khan kan lei hi eng tin tin emaw a ti dul thin te pawh a ni ang. Chungte avang chuan inspection tih laia him awm anga langte kha an lo him lo leh thin a, chutiang chu a ni a. Mahse, tunah rih chuan him lo lutuk a awm hriat a ni lo e.

S P E A K E R : Zawhbelhna.

Dr. K. BEICHHUA : Zawhbelhna. Pu Speaker, a him tha tih kan hria a, a lawmawm. Chutih lai chuan lei te hi kan ven tir deuh vek mai a, a him that viau chuan sum sen a tam mai mai lo maw tih kha ka zawh belh duhna pakhat ni se. Tin, pahnihna ah chuan – leihlawn thar dawh tumna tunah hian kan nei em? Nei ta ila,

khawiah te nge tih ni ta se. Pathumna- Airport kawng, Tlawng-Sihhmui lei khu tun dinhmunah kan leihlawn khu motor lian zawh theih tura dawh tumna a awm em? Tin, a bula ban ding tawh khu dawh that tumna a awm em? Kan hluihlawn mai dawn em ni tih kha ka zawh belh a ni e.

S P E A K E R : Awle, House Leader in chhang se.

Pu LAL THANHAWLA, CHIEF MINISTER : Pu Speaker, lei te hi ven an ngai deuh vek a ni, a chhan chu a nut te, a boltu kan tih te hi ruk ching an awm a, hahtlak tak a ni. An lo ru leh thin a, saw Mat Lei te pawh saw, Serchhip leh Thenzawl inkar te pawh saw an ruk an ruk avangin ven a ngai ta ringawt mai a ni, senso thlak tak a ni. Tin, a weight chunglama tlan tum talh hi an awm leh zel thin bawk a, chungte avang chuan ven loh theih pawh a ni hranpa lo a, thil hahtlak tak a ni. Nimina ka sawi tawh ang khan, hemi Aizawl – Tuipang thlenga four lane-a han siam te pawh hi huphurh awm tak a ni. Compensation hi a rawn sehmur tuam tuam nghal mai a, compensation hi tunah hian ka tawng tu huatthu ni suh sela, Mizo te hian pawisa hi a zawn hian kan zawng a, pawisa hi a zawn a zawn chi a nilo a, zawn hmuh chi a nilo a, a thawh a thawh chhuah chi a ni tih hi kan za hian hria ila, he House kaltlang hian mipuite hnenah pawh ka ngen duh a, zawn hmuh tum lo ila, thawh chhuah tum zawk ila, thawh a hmuh tur a ni tih hi hria ila a tha ka ti.

Tin, khulai lei a sira ding reng khu a foundation lai velah an han tih tirhin a hnuaiah an hriat phak loh ah puk ang deuh alo awm a, chumi avang chuan an hluihlawn (abandon) ta a ni a, tunah hian dawh that a tul avangin Central lamah sum te pawh kan dil a, chutiang chuan hma lak mek a ni. Tin, helaiah hian lei kan sawi lai khan leihlawn a nilo a, lei a ni tih hi hria ila. Helai hi kan hotute hriat atana tha ve hrim hrim in ka hria a, Pu Speaker, hun min pek theih chuan Temporary bridge te hi bailey bridge leh timber bridge te an ni ber a, temporary bridge reng reng chuan laod lak theih tawh a nei thin, chuvangin temporary bridge te hian a load lak theih baka rit phur motor in a zawh chuan a him anga ngaih pawh hi a him lo thei a ni.

Tin, temporary lei tam ber hi an hlui tawh avangin a part tuiek leh chak tawh lo te awm thin avangin load lak tura bituk aia hniama dah te a tul thin a, heng te hi load sang zawk la thei tura repair leh permanent a thlak tura hma lak mek a ni. PWD enkawl lei te hi a bialtu engineer ten kartin an endik reng a; tin, lei vengtu guard a tul

dana zirin dah a ni. A tlangpuin ka sawi tawh ang khan thir vel ruk ching hi an awm a, chuvangchuan ven hi a tul ve hrim hrim.

Mizoram PWD hian lei 124 a enkawl mek a ni. National highway ah 50, State Road-ah 74 a awm a, National Highway lei 50 ah hian 32 chu permanent bridge a ni a, 18 chu bailey bridge a ni. State Road 74 zingah hian 39 hi permanent bridge a ni a, 35 hi temporary bridge a ni. Mizoram PWD in vision a siamah chuan kum 2030-ah chuan Mizoram chhunga temporary bridge a siam zawng zawng te hi permanent bridge-a thlak vek tura ruahman a ni. A detail a ka sawi chuan hun ka la tam lutuk dawn a, a duhte tan chuan kan pe dawn nia.

Pu LALRUATKIMA : Pu Speaker, khawngaihin point pakhat chia. Tuichawng lei, Tlabung bul ami saw a chhe em em mai a, saw saw maintain emaw, thlak emaw tumna a awm em tih kha kan zawh belh a ni, a chhan chu fur alo thleng leh ang a harsatna saw a ngai a , a tuiek khawro deuh vek tawh a ni, a tuiek chhe khawp mai saw saw.

S P E A K E R : A chhang dawn a, a ding reng tawh e.

Dr. K. BEICHHUA : Pu Speaker, ka zawhna pakhat min chhan loh a awm a. Lei, bridge thar tun dinhmunah hian dawh tumna kan nei em? Nei ta se khawi hmunah nge tih ka zawhna kha min chhang tlat lo.

S P E A K E R : House Leader.

Pu LAL THANHAWLA, CHIEF MINISTER : Tuichawng kha, bailey bridge, Phairuankai, Tuichhawng kha 360 feet a ni a, he bailey bridge hi siamthat nan ` 10769 lakhs sanction hmuh tawh a ni a, a hun takah member zahawm tak khan a rawn sawi chhuak a, kha kha lo hriat atan, tunah hian hna tan mai thei turin ruahmanna an siam mek a ni. Tin, member zahawm tak Pu Ruatkima zawhna kha enge ni kha?

S P E A K E R : Tun ami kha, i chhang tawh.

Pu LAL THANHAWLA, CHIEF MINISTER : Lei dawh thar tur hi, hmanni khan ka sawi tawhin ka hria a, a hrim hrim in Burma nena kan inkal pawhna tur hi Central lamah Ministry of External Affairs ah te kan zuk thlen a, annin khi lam pang khaw chhak lam atanga rawn luh thlak te a nasat avangin China ram lam atang te in, an ngai pawimawh nasa a, lei pali dawhna chu kan rawn ti ang, an rawn ti tawh nghe nghe a, kan inkar kalkawngah hian, chutiang chuan tunah hian hma lak mek a ni a. Tin, Multi

Model Project ah kan hriat angin 8 siam tur a awm a. Tin, Sihhmui, Tlawng lei dawh tha turin consultant report endik mek a ni a, endik hnu ah Ministry sanction dil a ni ang a. Tin, sanction hmuh hnu ah chuan tender a ni ang. Hei hi hmanni ah khan Minister alo kal a, helai vela thil muangchang te hi kan lo sawi a, amah khan min rawn hrilhfiah sak a, regional officer hi Guwahati-ah pakhat an dah a, chu chuan State 8, North East hi min enkawl a, a indaihlo em em a ni. Tin, ani approval lo chuan hemi National highway te leh tiang ho hi pakhatmah hi kan ti thei lo a, chungte avangchuan delay hi a awm thin a. Tin, vanduai thlak takin single tender hi a awm zeuh zeuh a, single tender te chu a chhangtu chu pek mai awm tak hi Dan khan alo phal leh silo a, chung han kal kual vel chhung hi thil a rei thin a, thil vanduai thlak tak a ni. Chuvangin heng ah hian kan duh angin hma kan la chak thei lo hi keimahni hian pawl kan ti khawp mai.

Tin, anni pawhin min rawn improve sak turin tunah hian ngenna kan siam a, khulaia regional officer te pawh a tam thei ang ber dah belh turin kan lo nawr nghe nghe a ni. Tin, lei dawhthat chungchangah hian CRF (Central Road Fund) scheme atang hian bailey bridge chak tawh lo te a hnuai ami ang hian permanent bridge-a thlak tum a ni a, pre-stress concrete girded Bridge, Bawrai Lui *KDZKT* Road, a span chu 35 meters a ni ang a, hei hi ` 5 crores ` 80 lakhs man a ni anga. Tin, PSC bridge Tlawng – Reiek leh West Lungdar Road kalpawhna a span chu 40 meters a ni ang a ` 7 crores, 57 lakhs man a ni ang. Tin, Tuichang leh Keitum, Artahkawn road, a span chu 68 meters a ni, ` 7 crores 55 lakhs, tin, RCC T-Beam Girded Bridge over Serlui on Bilkhawthlir – Saiphai Natsura Road-ah hian a span 48 metres a ni a, cheng vaibelchhe kua-a siam tum a ni. Hei hi a thar leh a tihchakna tura hmalakna a ni e.

S P E A K E R : Duhtawk ang aw. 18-naah kal ila. A neitu Pu Lalruatkima zawt turin i sawm ang.

Pu LALRUATKIMA : Pu Speaker, ka lawm e. Ka Starred Question 18-na, Geology and Mineral Resources changtu Minister zahawm tak chhan atan :

- a) Mizorama Oil and Gas zawngtuten hmasawna an nei em? Tun dinhmunah eng nge an thlen chin?

- b) Oil and Gas zawngtute atangin chhiah chi hrang hrang engzat nge hmuh a nih tawh? Company hming leh an chhun zat eng nge?
- c) Oil and Gas laih chhuah hunah hian eng ang hlawkna (Royalty) nge kan hmuh dawn?
- d) Central leh State ten Non-tax Revenue engzatin nge kan insem theih ang? tih kha ka zawhna ni e.

S P E A K E R : Department neitu Minister zahawm tak chhang turin i sawm ang.

Pu H. ROHLUNA, MINISTER : Pu Speaker, member zahawm tak Pu Lalruatkima zawhna Starred Question 18-na chhanna :

- a) “Oil zawn hna hi kalpui zel a ni a. A bik takin Oil India Limited-in an block chan AA-ONN-2004/1 Area Square (Kilometre 3213-a) Time Extention buaipui mek a ni a. Tun dinhmunah Oil India Limited hian Maubuang leh Keifangah oil zawn nana lei an verh hna chu an zo tawh a. Tin, ONGC hian Meidum leh Zanlawnah lei verh hna an zo tawh bawk. Meidum bikah Gas hmuh a ni a. Hemi atang hian Gas 5,52,674 Standard Cubic Feet per day pe chhuak thei turin an report tawh a ni.”
- b) “ONGC-I hian ` 11,10,61,007, ONGC – II : ` 41,14,477, Oil India Limited-in ` 8,49,63,781, NAFTOGAZ, hei hi Reliance nena inkawp an nia ` 3,22,03,362. Hei hi, NAFTOGAZ hi terminate tawh an ni a. Tin, a total, a vaia belh khawm chu ` 23,23,42,627 a ni.”
- c) “Oil and Natural Gas hi lak chhuah a nih chuan Ministry of Petroleum-in ruahmanna a siam dan chuan oil hmuh chhuah atangin royalty 12.5% State-in a hlawkna a tel ang a. Gas hmuh chhuah atangin State-in 10% Royalty a chang bawk ang.”
- d) “12th Finance Commission-in Sorkar laipua a recommend dan chuan, New Exploration Licensing Policy hnuaiha hlawkna (Net Profit) atangin State leh Central sorkar a inzat 50:50-a insem tura ruahmanna siam a ni” tih a ni.

S P E A K E R : Zawhbelhna, a neitu Pu Ruatkima.

Pu LALRUATKIMA : Pu Speaker, Mizoram hi Zone engzatah nge then a nih? Khawi lai laiah te nge then a nih a, thawktute tute nge heng zone hrang hrangah te hian tih ka zawh belhna ni sela.

Tin, NAFTOGAZ-in an zawna kha terminate an nih si chuan aiawh, a zawn hna thawk tur khan Ministry khan a thlang em tih kha ka zawh belhna ni rawh se.

S P E A K E R : Minister zahawm tak a chhang turin sawm ila.

Pu H. ROHLUNA, MINISTER : Pu Speaker, tun dinhmunah hian Mizoram chhung ah ONGC-in North Block an chang a, Central Block hi Oil India Limited-in an chang a, Southern Block hi NAFTOGAZ leh Reliance inkawp kha an ni a. Amaherawhchu, anni hian hma an lak loh avangin terminate a ni tawh a, nikum hmasa lamah khan. Tichuan NAFTOGAZ aia gas zawn hna thawk tur tifel thuai turin state sorkar pawhin nasa takin concerned Ministry kan nawr a. Central lamin hma an la mek a, Global Tender a ngaih avangin hei hi an la ti chiah lo niin ka hria. Chu chu tuna a dinhmun a ni.

S P E A K E R : Pu Zawma.

Pu VANLALZAWMA : Pu Speaker, kan zawh belhna chu Maubuanga an lei verhah sawn, tlang kam titi leh khawlai titi vela kan hriat dan hian 'Engmah an hmu lo' tihte hi a awm leh zauh thin a. Hei hi official-in kan hria em? Tin, Keifang lam pawh hi an hlawhchham dawn a ni awm e tihte thleng hian huai deuh deuhin an sawi hlawm a. Hei hi eng nge a dinhmun tak kan Minister-in min hrih thei em aw?

S P E A K E R : Awle, a chhang turin Minister sawm ila.

Pu H. ROHLUNA, MINISTER : Member zahawm tak Pu Zawma rawn zawh belhna kha Maubuang hi Oil India Limited-in an verh a, Keifang pawh hi a ni tho a anmahni chan ve ve a ni a. Maubuanga hian, ni e, kan ram leilung hi an vawi khat verhna a ni a, Oil India Limited hian. Anni tan chuan virgin land tak tak hi a ni a. Phai ram nen a lo inang lo khawp a. Sen pawh an inseng nasa a. Tin, an beisei ai hian a leilung 2km/3km an verh chuan a lo chang a. Chuvang chuan verh pawh kha a har an ti khawp mai a, kan ramah experience la nei lo an ni a, sen pawh an inseng nasa a ni. Tichuan Maubuanga hian 3km chuang an verh a, a depth hi ka hre chiang chiah ta lo deuh a, a rei ta deuh hlek a, gas chu awm lo tawp chu a ni lo a, mahse an beisei ang an hmu lo a ni.

Tin, Keifangah pawh hian beiseina a sang em em a. an survey lai chuan beiseina sang bera an neih kha a ni a. Mahse 3 km 800 m chuang an verh a, an beisei ang an verh chinah hi chuan an hmu lo va, an chawlhsan rih a ni. An verh tirh lamah lungalhthei an hmu thuai a. An beiseina pawh a ti sang em em a. Amaherawhchu gas awmna tak hi an la verh thleng lo a ni thei ang a te pawh kan ti a. Hmanni lawkah khan kar hmasa hmasa leh Inrinniah khan an General Manager leh helaia an incharge officer hi holiday te a nih avangin kan in lamah an lo leng a. Tah pawh chuan kan sawi kan sawi a. A aia thuk zawk 1000m emaw 2000m te emaw chu verh ula chuan keini layman tan pawh hian beiseina a la awm theiin ka hria a tihte pawh ka lo sawi a. Chungte pawh chu anni pawhin ngaihtuah theih tak a ni an ti a. Tichuan tun dinhmuna an verh chinah an beisei ang hi chu gas hi an hmu lo niin kan hria. Official tak chuan report pek a la awm lova, chu chu unofficial deuhva kan hriat helai House-a kan han sawi theih chin chu a ni a.

Tin, kan sawi fo tawh angin anni, Oil India Limited hi nikum October ni 24 vel atang khan an hun hi a tawp a. Tichuan tunah hian kum 2019 thlen hi time extension Central sorkar ah an dil mek a, phalsak turin helam atang pawhin kan nawrpui a. Chief Minister pawhin a ngaipawimawh a, ani pawhin theihtawp min chhuahpui thin a.

General Manager Mizoram incharge hmanna a lo kal pawhin Central a thuneitute hnen a thlen tur lehkha, a effective zawk rinna avangin min draft sak theih chuan email in emaw min rawn thawn chho la, kan lo la umzui leh dawn nia kan ti a. A theih ang ang chuan company ho hi kan sawrkarin a tanpui a, a nawrpui ani tih kha ka chhan theihdan tawk a ni e Pu Speaker.

S P E A K E R : 19-na neitu Dr. K.Beichhua zawt turin sawm ang.

Dr. K.BEICHHUA : Commerce & Industries Dept. changtu Minister zahawm tak hnenah Starred Question no. 19-na kha ka zawhna a ni e. Kum 2015-2017 chhung hian Indo-Myanmar Border, Tiau lui kaltlang hian Toll Taxes hi engzat nge hmuh a nih?

S P E A K E R : Le, chhang turin Industry Minister zahawm tak i sawm ang.

Pu H. ROHLUNA, MINISTER : Pu Speaker, member zahawm tak Dr. K.Beichhua Starred Question 19-na a zawhna chu ‘Kum 2015-2017 chhung hian Indo-Myanmar Border, Tiau lui kaltlang hian Toll Taxes hi engzatnge hmuh a nih?’ tih ani a.

A chhanna chu kum 2015-2017 chhung hian Indo-Myanmar Border, Tiau lui kaltlang hian Commerce & Industries Department-in Toll Taxes engzatmah hmuh a neilo tih a ni.

Dr. K.BEICHHUA : Pu Speaker, engvanga hmulo nge an nih? Hei hi Mizoram Gazette ni 3.3.2015-ah khan chhuah a ni tawh a. 42nd Schedule-ah khan collection of toll taxes on Indo-Myanmar bridge over Tiau river tih a awm a. Engvanga la lo nge an nih, lehlam atang hian min laksak reng si a, keinin engatinge kan lo lak loh tih kha ka zawhbelhna a ni e.

S P E A K E R : Zawhna hun a tawp a, kan chhantir hram ang em? (Aw, Pu Rohluna) I chhang lawk hman ang em?

Pu H.ROHLUNA, MINISTER : Pu Speaker, Tiau lui Zokhawthar ami kha ni chek turah ka ngai a, kan member zahawm takin a zawhna kha. Tiau lei a Toll Tax la tur hian 2003-2004 chho ah khan sorkarin rules a lo siam tawh a. Law Dept. ah pawh vet turin thawn a ni tawh a. An observation kha a mu ta vang vang a, 2009-2010 chho ah hmalak leh a ni a. Tichuan Toll/Tax lakna tur guidelines/rules an siam hi Law in an han examine leh in India Constitution Article 265 in a sawi angin legislate tur a ni an ti leh a. Executive order a toll te, fee te, duty te lak ngawt hi a him tawk lo ve tiin kha Rules kha hmanzui a nita lo va.

Tin, toll tax reng reng hi lak dawn chuan a lei dawhthatna tur emaw, thawmthatna/maintain na tur emaw a ni tur a ni a, thil danga hman phal a ni lo tih kha Law Department in an hmuhdan a ni a. Zokhawthar a Tiau lei span hi 170 feet vel a ni a, 2001 vela dawh zawh tawh niin a hlui tawh a, traffic a heavy em em bawk a. Chuvangin nichin lawka kan House Leader zahawm takin a sawi tawh ang khan India leh Myanmar inkar ah hian lei dawh tul em em hi Tiau lui leh Kolodyne lui ah te a awm a. Chung zingah chuan Zokhawthar hi a pawimawh ber a. A chhan chu tunah hian kan hman tangkai ber, bungrua kan lakluhna leh kan thawnchhuahna ber a nih vang a ni. Chu chu MEA leh Commerce Ministry ah a theih ang ang in Lei dawh thatna tur a ni a. Zokhawthar land custom station hawn ni khan Union Commerce Minister leh official lo kal te pawh enpui a ni a.

Commerce Ministry in min tihsak theilo a nih pawhin Ministry of External Affairs ah kawng min zawnpui a, tan min lakpui tura ngen in double lane permanent structure tha zawk a tun a Bailey Bridge awm hi siamtha thuai turin lo thlen a ni. Chief Minister zahawm takin Central ah, MEA lamah te, tin, a concern Ministry lamah te theihtawp min chhuahpui a. Tunah hian a geo co-ordinate MEA lamin an rawn dil a, chungte chu kan thawn thla a. Tiang chuan a theih ang angin hma kan la chho a ni.

S P E A K E R : Awle, wawiinah hian MLA zahawm tak pahnih (2), Pu J.H.Rothuama leh Pu P.C.Zoramsangliana te tulna avangin kan zingah an tel theilo a ni tih House hi kan hriattir a.

Kan hriat angin Private Members ni a ni a, kan dan 27-na chang 1-na angin Private Members Business kan la ang a. Private Member 16 atangin Resolution 45 a lut a ni. Chu chu tu ta ber nge kan lak hmasak ang tih thum vawr a ni a, ballot tih a ni a. Chu chu ni 14, Tuesday dar 1 ah khan ballot chu tih a ni a. Chuta indawt dan chu Bulletin Part-1, no.159 ah khan member zahawm takte hriattir in ni vek tawh a.

Resolution no. 1 neitu kan sawm ang a, a neitu chu Pu T.Sangkunga, member zahawm tak a ni a. Ani hian a Resolution lo move se la, amah i sawm ang.

Pu LAL THANHAWLA, CHIEF MINISTER : Pu Speaker, kamnih-khat lek hemi House hriat atan. Niminah khan member zahawm tak Pu Zawma te, Pu Beichhua te, Pu Thanliana te nen kan inhmukhawm a, kan sawiho a. Hemi obituary reference in hmanna kan Question Hour a ei vak mai kha, khatiang kha chhanchhuah ngaihna a awm lawm ni. Khami ai ang chi te kha tun hnuah lo awm leh ta pawh nisela, khata kan Question Hour a ei ang zatte kha chu Speaker hian min pe thei lawm ni, kan zavaia hmakhua a ni si a tih kan sawiho a.

Tin, Question chhan hman loh hi Press te leh electronic media an ni emaw, han reproduce leh hi an inthlahrung niin kan hria a, a rawn chhuak manglo a. Chuvangin khatiang a obituary reference in a kan Question Hour hun a ei ang ai kha tunhnu zelah hian min pe thei ang em tih leh khami chhan hman loh a hi Speaker in 'taken as answered' tih emaw ang chi te in puang ta sela, Press ten zalen taka an lo chhuahchhawn theih nan leh comment te pawh an lo pe thei a tih kan rel a. A huho a rawn hmuh che kan tum a, mahsela kan remchang ta lo a. I hnenah khan ka rawn thlen a. Khata mi i lo chhanna kha member zahawm takte hriat atan min hrih thei la ka duh khawp mai. A

chhan chu min entrust si a, ka ti ta lo emaw te min ti ang tih ka hlau a. Keiin han hrilh chhawng leh dawn ila ka thiam mang tawh bawk si lo a. Chuvangin i awka ngei kha hriat kan va chak ve!

S P E A K E R : A lawmawm e. Kha kan House Leader in a ngaipawimawh em em mai a. Obituary avanga zawhna pakhat(1) chauh kan la thei kha a vei em em a.

Vawiin hi Private Members ni a ni a. Chuvangin Resolutions kan lak hma hian khami kan lak hmanloh zawhna engemawzat tal kha chu lak hman dan a awm em a tia. Dan kan han zawng nasa a, Speaker thiltihtheihna hnuai a nih leh nih loh te, kan dan 40-na khan a khap bur mai a. Khalai hnuai vel ah khan a relax theih dan te a awm em tiin kan han zawng a, kan hmu mai ta si lova, chuvang chuan pawl kan ti hle a ni. In duh zawng kan ti hlawhtling thei lova, kan dan hi a lo khawng khawp a, dan piah lamah Speaker-in a ti thei bawk si lova. Tin, zawhna chhan loh hi chhan tawh anga ngaih tur a ni tih kha. Hei hi Parliament-ah chuan a changin an puang a, a changin an puang lova, tin Parliament-a kan tih dan leh he lai a kan tih dan hi inan loh na lai a awm a, Parliament-ah chuan tunah hei hi a chhanna te nen hian minrawn pe ta vek a, he mi a chhanna nena minrawn pek hi Member te hriat a tan dawhkan ah an dah a ni lobby ah. Kha kha zawhna neitu te leh zawhna neitu kher lo MP dang te khan an la a, a chhanna kha an siam vek thei a ni. Keini chu han tive dawn i la, kan lo tih than loh a ni a, kan Minister te ka'nrawn thin a, kan chhanna tur an hriat lawk vek chuan ani thei dawn emaw ni tih kha an chhanna a ni ve lawi si a, chuvangin Chair atangin rorel vak ngaihna ka hre lova, chuvangin Mizoram chuan kan lo kalpui tawh thin angin kan kalpui ta mai a, entirnan ; khawiah mah Budget present ni in question hour hi an suspend ngailo. Mahse, keini chuan kan lo tih tawh avangin chu chu kan chhunzawm ta zel a, chutiang chu a ni tih kha kan Leader leh House hian min hriatpui ve u la ka lawm khawp ang.

Pu VALALZAWMA : Pu Speaker, khawngaihin, kha tak kha a nia kan han rawtna chhan pawh, House hian mi State leh Parliament pawhin an tih ngailoh dan hi kan hmang mai zel a, kan member te leh i ho a tha kan tih tlan kha chu hman theih a ni mai law'm ni tih kha a ni a. I hriat angin Parliament-ah te pawh tunah chuan Obituary reference hi House Leader pawhin a sawi tawh lova, Speaker-in tawi te a chhiar chhuak a, an ding a, an sun mai thin a. Kha kha an kalpui tho tho a, chutih mek lai in keini ah pawh tun 7th Assembly tir lamah pawh House Leader leh Opposition lam atangin pakhat

in sawi mai se kan han ti a, mahse khatiang kha kan zawm tak tak chuang lova. Tichuan, member hlui uiawm tak tak te an han boral a, khang ah khan member tam tak ten sawi an duh ve a, a awm em em a.

Tin, keini House ber kher hi chu kan hriat angin in au buai leh Session han tih buai tak tak hi a awm lova, tluang em em in a kal a, hun hi kan nei thawl viau thin a, chung te a vang chuan Obituary reference pawh kha duh leh thui deuh dah ila, khami ai kha zawhna hi tawlh hret ila a ni mai lawm ni? Chu chu keimahni tan vek a ni a, tia han rawt kha a ni ber mai a, he lai kan dan awm a nih pawh khan a tih danglam dan kha a ngaituah theih law'm ni tih kha kan House Leader zahawm tak kha ka'n thlawp duh a ni Pu Speaker.

Pu R. ROMAWIA, MINISTER : Tradition ang deuha kan lo neih, kan hruiatu hmasa te pawh in Budget pharh ni ah te pawh engtin emaw urhsun takin ti ila an tih avanga an lo hman tawh kha mahni hun zel ah hian han ti danglam tu nih te pawh hi thil hrehawm a ni thin a. Chutiang bawkin Obituary reference ni ah te pawh khatiang ang kha a ni a, chuangin khatiang ang kha ngaituahna a awm dawn a nih kha chuan han sawi ho phawt chi te pawh a ni ang a, amaherawhchu, ka rawn din chhan ve ber pakhat zawk phei kha chu, tuna kan thil kal tawh ah khan kan Speaker-in a rawn sawi ah khan han sawifiah ve deuh hlek ngai awm in ka hria a, a chhanna chungchang kha Minister ho te kha chuan a chhanna, official chhanna kan Department chan theuh ten an rawn chhanna kha keini chuan, a chhangtu Minister lo awm lo pawh ni sela, a aiawha chhang thei vek kan nih avang khan, keini kha chu a chhanna kha kan neih vek kha ngai kan ti deuh a ni, (Cabinet kha chuan.) A vang chu a awmlo ai pawh kha kan awh theih nan.

Chutiang a nih hnu chuan House-a han chhan tawh hnu erawh chu kan ta vek a ni a, kan chhan hman loh pawh unstarred ang khan member zawng zawng in kan dawng vek a ni. Chumi kan dawn vek avang chuan, kan hun kal tawha Obituary ni a zawhna pakhat lek kan chhan hman pawhin, a dang kha House-a Minister chhanna ang in chanchinbu ah an rawn chhuah thei vek a, a rawn chhuak thiag ta vek a ni. Kha kha Department in a rawn chhanna kha a ni ber nghe nghe a, he House chhungah chuan kan Minister tak tak in tawngkam in chhang lo na a, Department in a rawn chhanna kha kan dah official vek tawh tho tho a ni. Chu chu MLA te zawng zawng kha pek leh vek a ni tho a, a lo dawng hmasa han nih nachhan lai bik kha chu Minister te kha a chhangtu tur

an nih tlat avangin House-ah khan a chhanna tur kha an lo hriat lawk a ngai a, tin member zawng zawng in kan hriat lawk a nih chuan zawhna tullo a ni tlat a ni.

S P E A K E R : Awle, Resolution neitu khan lo hrethiam se khawngaih in reilo te. Vawikhat ah Speaker in dan a ti danglam mai thei lova, hemi kan rules hi amend a ngai dawn a, khatiang kan tih dawn chuan. Pahnihna ah, Parliament te leh State dang te kan inan theihloh na chu, anni chuan an hmehhriat ngai loh an sun a ni. Keini chuan kan thian tha tak tak te, kan hriat chian, kan ngaih em em te kan sun a, chuvang chuan kan inang thei lova, hmehhriat loh sun leh thian tha tak sun hi a inang lo. Sawi duh zawng te a lo tam lo thei lova, kan rilru ah hian. Chuvangin hei hi chu hrethiam ila, kan thian kan kawm ngaih em em, he laia kan rorel pui thin chanchin leh midang daih chanchin kha a sun ni ti tawi tawh mai ang u han ti ngawt ila keini baw kha a tuartu kan nih leh si kha a hlauhawm a, chuvangin kan Opposition Leader khan lo hrethiam sela a tha ang e.

Pu K. SANGTHUAMA : Pu Speaker, kha kha chu kan hrethiam vek a, zawhna hi tu tan pawh a tha zawk a ni a, ruling tan pawh dik chiah chuan thil sawi fiah na hun tha tak a ni a. Khatiang chi kha chu awm zeuh zeuh chi chauh kha a ni a, khatiang hunah kha chuan dan siamtu kal khawm kan ni a, tin, kan dan hi a amend theih zel a, rules te pawh a siam danglam theih zel a, chuvangin khatiang ang hun bik ah kha chuan ennawn deuh chu a tha lawm ni, hun kal zel ah, tun ami chu tun ami a ni tawh a, hun kal zel tur atan pawh kan rules te a tul a nih chuan, dan siamtu kal khawm kan ni a, kan siam danglam thei tho mai a. Pu Speaker, khatiang zawng khan ngaihtuahna lo hmang ula tih kha ka'n sawi ve duh a ni.

Pu LAL THANHAWLA, CHIEF MINISTER : A nih, question leh answer kha a hminga Minister te kha chuan kan nei ta vek a, a dang khan an nei ta lo a ni. Kha kha tehkhin nan answer a nih dawn chuan member zawng zawng hian a copy hi kan neih vek a va tul awm ve? Chu chu engtingge an pek a, engtin nge an collect ve thin?

S P E A K E R : Chu chu Parliament-ah khu chuan, hei tunah hian answer nen ka nei vek a ni question hi, he mi copy hi lobby-ah an dah a, kha kha member zawng zawng, private member te pawh khan an la mai a, an chhiar thei vek a, chhan loh pawh kha chhan sa written kha alo awm vek a ni. Chuvangin chhan loh pawh kha chhan anga ngaih a ni e, han tih khan a dik thlap mai a, amaherawhchu kan dan ah hian, kan tih loh kha chu ti tawh anga ngaih tur a ni, a ti a, puan ngai lo in he kan rules ah hian. Vawiin-a

tih tur list kan neih, mahse kan tih hman loh kha chu engpawh kha ti tawh anga ngaih tur a ni, puan ngai lo in.

Pu JOHN ROTLUANGLIANA, MINISTER : Pu Speaker, heti lai ah khan chhan loh kha chhan anga ngaih tur a ni i tih kha starred question a ni a, oral answer tur a ni a, kan chhan loh kha chu chhan loh a ni zawk tur a ni. Unstarred-a in let leh a in sem a nih kha chuan thu dang a ni a. Unstarred-a in sem leh a nih kha chuan starred question kha chu chhan ang a ngaih theih a ni lovang. (Speaker : A hnuah kan pe leh vek) pek leh vek pawh kha Unstarred-a in let leh anih chuan chu pawh chu chhan anga ngaih theih a ni lo ang.

Pu LALRINLIANA SAILO : Pu Speaker, pawimawh deuhva ka rin chu verbatim record kha a pawimawh in ka ring a, kha verbatim record kha a awm si loh chuan helaiah hian an record dawn lo a ni. Chuvangin helaia verbatim record kha a awm si loh chuan written record chauh kha, helaiah hian Verbatim-a awm si loh chuan chhan anga ngaih a ni dawn lo tih na a ni thei ang.

Pu VANLALZAWMA : Pu Speaker, khawngaih takin. Lehkha kha a hnuah kan pe leh vek tih kha a dik a. Amaherawhchu, keini lo dawn ve kha chu zan lamah te a ni leh thin a, chutih mek lain helaia question hour a zawh tawh kha chuan media lam ten an lek an lek tawh a, a chang chuan keimahni zawk hian kan han dil ve leh kawia, a tlawm thlak viau a ni. A hmaa min pe phal lo a nih pawhin question hour a zawh tawh, darkar a ral tawh hi chuan min han sem ve tal ula hetah hian. Dik tak chuan media-ah khan a darh chiam tawh thin a helaia kan han siam a hi. Keini tan hian a tlawm thlak a ni, opposition lam chauh pawh ni lovin Ruling lam tan pawh hian. Zannah kan hmu ve chauh, chutihlai chuan News-ah te kan lo ngaithla teuh hman, kan chhan loh portion te ang an lo cover a kha. Chung te pawh chu Pu Speaker, an chhan zawh rual ruala kan lo dawn kha chuan thu dang a ni ta a, an hmaa kan lo en thei lo a nih pawhin tih kha a nia.

Tin, nichina Obituary tih kan han sawi zauh kha, a chang chuan obituary reference hi minute 10 (sawm)-ah pawh kan zo ang helaia keimahni mi leh sa an nih loh phei chuan. Amaherawhchu, keimahni mi leh sa chu engtingnge hman deuh ah an tih ka hre lova, standing MLA ngei te pawh an lo boral tawh thin a, khang ah te kha chuan sawi duh hi kan nei ve deuh vek in ka ring a, khang ang ah te kha chuan darkar 1 (khat) pawh kha kal se kan hun lak hek ang ang khan question hour-a kha tawlh mai se, entirnan

obituary reference-ah minute 10 (sawm) kan lo la hek a nih chuan minute 10 (sawm) khan hetah question hour-a kha tawlh ve leh ta mai sela. Obituary reference-a kan hun hman tam ang zel khan question hour-ah khan kan hmang ve leh zel mai ang a tih kha a ni Pu Speaker, kan han rawt chu.

S P E A K E R : Awle, Pu Sawta khan han sawi ve leh sela.

Pu LALSAWTA, MINISTER : Pu Speaker, ka lawm e. Tuna kan Minister zahawm tak Pu John Rotluangliana han sawi kha a dik tlat mai a. A dan ah hian ‘oral questions should be asked and oral answers should be given’ tih a ni a. Chuvangin Starred Question a nih kha chuan Unstarred anga pek kha chu an let a nih kha chuan a dik a. Tun hma pawh khan kan sawi kan sawi ve thin tho a, Newspaper lam te hi an tuan a tha a, an lo la mai thin a. MLA ten kan chan hma te pawhin an lo chang thei a, chuvangin hemi kan proceeding bu ah hian a lut lo niin a lang nghe nghe a, zawhna sawmthum awm ta se sawm chauh ang kha oral questions leh oral answers awm ang chi kha proceedings bu-ah hian a luh chauh kha chuan Ministers’ ten an chhanna kha a awm ve ta miah lo tih na kha a ni a, in-ah kan kawl vel ta mai mai kha a ni a. Chuvang chuan proceedings-ah hian awm ve ta sela a pakhatnaah chuan.

Tin, a pahnihnaah chuan kan MLA zahawm tak tak ten kan Minister te ruala tih hi a rem chiah lo a nih pawhin question hour a zawh chiah hian nei ve nghal tal se. Amaherawhchu, helaia sawi fel chi chu a ni lo ang a. General Purposes Committee te a awm a, chumi lo pawh Rules Committee te a awm a. Dan siamtu ni vek mah ila helaia han sawi fel mai chi a ni lo ang a. Chutiang ang tak chuan i hovin Pu Speaker, lo ngaihtuah ula, kan engto tlang niin ka hria. Ka lawm e.

S P E A K E R : Awle, tuna an rawtna ang chuan office lam pawhin lo bawhzui dan ngaihtuah ila a tha ang e. A solution hmuh theih hram dan ngaihtuah chhuah in beisei ila. Kan duh tawk mai dawn em ni ang.

Awle, tunah chuan Pu T.Sangkunga Resolution neitu lo sawm ila. A resolution rawn move sela a tha ang e.

Pu T. SANGKUNGA : Pu Speaker, ka resolution ‘Mizoram State in All India Services, IAS, IPS leh IFS separate cadre-a a neih ve ngei theih nan theihtawp chhuah ni rawh se’ tih he House zahawm takah move min phalsak avangin ka lawm e.

Kan hriat theuh angin all India services IAS, IPS te leh IFS te hi India rama mi bright ber ber leh mi thiam ber ber te, tin, an hna thawh naah pawh integrity nei tha, administration ah pawh lai taka rorel tura ngaih mi puitling an ni a, an hlutna hi hria in India ram state hrang hrang ah state cadre hran an nei deuh vek tawh a, U.T ten a hran in kan nei thin kha a ni a. Chutah chuan all India service officer te hi Minister te, kan ram roreltute (Speaker : Ngawi lawk rawh, kan han inthlak lawk ang e.) thurawn petu leh kan Minister ten thutlukna an siam lo bawhzuia lo execute tu pawimawh tak te an nih avangin bureaucrat ti a ngaih pawimawh em em, a thenin an tlawn laih laih thin an nihna te pawh hi an pawimawh vang a ni a.

All India Service lo chhuahna hi British atanga kan chhawm ICS, Indian Civil Service/Imperial Civil Service an tih atanga kan chhawm a nih avangin hemi chungchang pawh hi tawi te sawi ka duh a. Tin, chumi hma chuan Mizoram leh hmun dang tam taka an ngaih pawlh thin Central Services tih leh All India Services tih hi han sawifiah ka duh a. All India Services tih ah IPS, IAS bakah India Forest Service hi chu anmahni a a hranpa a recruit an ni a. IPS leh IAS hi chu a common a UPSC-in a lak an ni a, anni hi an pawimawh em em a ni. Central Service ah erawh hi chuan service chi hrang hrang an tam tawh em em a, sawi sen pawh a ni lova. Heta English-a an sawi dan Common ber chu 'All India Services whose members serve both Union and State Government whereas Central Services serve only Union Government'. Central Service chu Union Government hnuaiah an awm a, state-a an lokal hi chuan deputation in an lokal a. All India Services ho hi chuan central leh state-ah an service thei ve ve a ni. Chu chu a danglamna ka sawi theih chu a ni.

Kan hmabak ah khan han lut leh ta ila. Kum 1787-a East India Company-in West Bengal a rawn awp a, India a rawn hneh khan Covenanted Service an rawn siam a. Chutah chuan khatia an lak mithiam te leh Company Board of Directors te khan inremna Covenant an siam thin a. Khang Covenanted Services an lak dawn khan corruption nasa tak awma ngaih anih tak avang khan British Parliament khan ngaihtuah chian a tul a ti a. Regulating Act 1773 hmangin Governor General post a rawn siam ta a. Chu chuan India ram awpna turah khan hmun pawimawh tak a rawn chang ta a ni.

Lord Cornwallis, Governor of General a rawn nih pheikha chuan he Indian Civil Service leh Imperial service te service chu nasa takin a rawn

siamtha a. Tin, civil officer te chu administration kengkawh tur leh East India Company te sumdawwna chauh ngaihtuah tur khan chi hnihin an service pawh a rawn thliar ta a. Tin, Coaching Centre te Madras lamah siamin kha service kha nasa taka a siamthat leh a improve avangin “Father of Indian Civil Service” tiin Lord Cornwallis-a hi vuah a ni nghe nghe a. Tichuan Indian Civil Service te chu Govt. of India Act, 1858 Section 32-na angin fel takin lak an lo ni ta a. Amaherawhchu, heng Indian Civil Service leh Imperial Service ho hi an dinhmun a sang khawp a, an fel si a. An pawimawh em em avang khan Cornwallis-a khan India ram nghet taka British in a awp theihna tur chuan heng service officer te nihna hi nasa taka siamthat a ngai a ni tih ngaihndan a neih avangin an dinhmun a siamtha a, a thawh that em em avang khan ngaihsan a hlawh hle a.

Amaherawhchu, heng hun laiah hian vun ngo chauhvin ICS Imperial Service hi an exam thei a, exam na hmun pawh England-ah chauh a awm a ni. Hun a lo kal zel a, nasa taka beihna avangin India mite pawh an exam an lo phal ve ta a. Rabindranath Tagore-a u, amah chhangtu chiah Satyanarain Tagore-a kha India mi ICS hmasa ber a ni a kum 1863 cadre a ni. London-ah daih ICS examna awm mahse India ramah exam-na te a lo awm tawh avangin Subhas Chandra Bose-a te ang mi bright bik rei pawh Londona cham lova ICS exama an sang em em mai te atang khan India mite hian an hna hi an tlin em em a ni tih ngaihdante a lo awm tak bawk avangin kum 1922 atangin India ramah ICS a exam theih ta a. India, 1947-a a lo independent meuh kha chuan ICS zingah hian vun ngo aiin an lo tam ta hret zawk nghe nghe a.

British sorkarin ICS ho service leh hlawh nasa taka a siam that avangin an hlawh hi a tam em em a, khawvela sorkar hnathawk hlawh tam ber chu Indian Civil Service leh Indian Imperial Service te an ni. A chhan chu London ami te pawhin an lak loh over-sea etc. an lak kha a tam em em a. India independent thleng khan khawvela sorkar hna thawk hlawh tam ber an ni. An hlawh tam zia chu kum 1931 khan Aizawl DC office-ah Gazette pakhat an hai chhuak a, Superintendent (Bawrhsap) thla khat hlawh chu `2300/- a ni. Kum 1950-ah khan zirtirtu hlawh chu `5/- a la ni. Kum 1931-ah te kha chuan vawk lian tak hi `2/- in a la lei theih a ni. A awmzia chu Bawrhsap pakhat thla

khat hlawh ` 2300/- chu Primary Teacher 460 te hlawh belhkhawm zat a nih chu. Hetiang zat zat hlawh an pek nachhan chu an tan corruption tih a ngai tur a ni lo. ICS officer chuan pawisa hi an duhtawk an hmu tur a ni, facilities pawh an nei tha tur a ni, an chhungte leh anmahni lo haw na tur pawh India rama nghet taka an awm theihna tur chuan heng kan mite hi an service pawh tha taka kan siam sak a, an hlawh pawh tha taka kan siam a ngai a ni, an ti a. ICS officer ho kha British lakah an rinawm em em a, India 1947-a a rawn independent khan India sorkar khan chhawr tlakah a ngailo a ni. British laka an loyalty an pek nasat zia leh min awpbehna tura an tangkai zia en hian India sorkar hian kan chhawr zui chi an ni lovang tih ngaih dan lian tak khan a nei ta nghe nghe a. Amaherawhchu, khatih lai khan Iron Men of India an tih Sardar Valabhai Patela kha Home Minister a lo ni hlahu mai a. Ani khan pa takin kan mite British laka an loyal chuan India tan pawh an loyal ang, tute emaw laka loyal lo hi tute emaw lakah an loyal thei lova. Chuvangin, kan ICS pachal ho hi India sorkar lakah hian loyalty an pe thei tho vang a tih avangin ICS ho hi independent India ah pawh khan chhawr zawm an lo ni ta a.

British Sorkar chuan IPS kan tih pawh hi Indian Police an ti ringawt a. Forest ho pawh kha Indian Imperial Forest Service an ti. Shillong-a pa pakhat kawngka luchungah pawh tun thlengin Indian Imperial Forest Service tih a la intar e an ti. Khatiang khan India ramah All India Civil Service tha tak neih chhunzawm a ni a, an service pawh uluk taka enkawl a ni a. Chung mite chu nichina kan sawi ang khan All India Service ho kha chu service cadre an siam sak ta thin a. U.T. kan nih khan Assam leh Meghalaya-ah khan joint cadre an nei a. Tripura leh Manipur khian joint cadre service an nei bawk a. U.T. kan han nih chhoh ruala an siam dan kha a ni a, state lo ni ta te kha chuan joint cadre an nei a. Amaherawhchu, Sikkim hi India sorkarin independent ram a lak hnuhnun ber a nih avangin an intiam angin joint cadre ni ve lovin cadre te tak te, state te taktein an neih phah nghe nghe a ni a.

IAS officer te hi kan Minister te thurawn pawimawh tak petute an ni. Tin, khatih laia Assam Cadre IAS officer Mizo te khan U.T. kan nih khan U.T. cadre

an opt a, U.T. Cadre-ah an awm ta a ni. Chutah chuan kan controlling authority chu Home Ministry khu a ni tlat mai a, an thu em em mai a. MNF leh India sorkar an inbiak khan central sorkar khan Mizoram State Cadre Service hi nei ngei ngei turah min ngai a ni. Mahse IAS ho pawimawh zia chu, khatih laia kan Chief Minister kha (tumah a dem zawngin ka sawi dawn miah lova,) advise an pe diklo a ni. IAS te chu an kal a, an haw a, State Civil Service te hi ngaihsan tur a ni tihna thinlung an tuh tlat mai a ni. IAS Officer-te Chief Minister leh ministry nen an intihlungawiloha an intih thiam loh chuan Resident Commissioner ATI Director pawh kha Chief Secretary hlawh zah hlawh turin an sawn daih thei a, chuvangin Mizoram Cadre siam an tui lo a ni.

Tin, khatihlai IAS thenkhatte kha anmahni hma sial deuh hlekin, state a upgrade an niha cadre hran nei tura beih hun lai khan kan sorkar kha advise dik lo lian tak pek a ni a. Tun hnu ah chutianga thurawn diklo petute chu hre mah ila House-ah hian sawi a rem lova, state cadre kan neih loh nachhan hi mahni hmasial avanga advise in pek dik lohna vang a ni thei a ni. Tin, Goa te pawh khan an duh miahlo a, IAS direct-a lut pakhat chiah khatih lai khan an nei a. Mahse an C.M. Rahne khan a duh lo tlat mai a, 'IAS te zawng suit-case officer an ni e' a ti tawp mai a. 'Kan state-ah an lokal a, Delhi kalna ringawt an zawng a, an thawk tak tak peih lo' a ti a ni. Chuvangin state cadre neih kha a duh lo tlat mai a. Cadre hran kan neih loh chuan IAS thalo suspend tur pawhin Home Ministry phalna zu lak a ngai a, lo suspend emaw pawh ni ila Home Ministry-ah an zu zualko va, an rawn cancel leh mai thei a ni. Chuvangin Goa pawhin cadre control authority nih loh pawizia te an rawn hre chhuak ta a. Goa te, Arunachal te, keini te pawhin cadre hran neih kan lo duh ta a. Mahse a dil hun laiin kan lo dil tawh si lova a har ta em em a ni.

Kum 1987-a state kan nih a cadre review a awm chungchang kha sawi leh ta ila. Central sorkar khan North Eastern States, Assam atanga indang ho zawng zawng leh Manipur leh Arunachal Pradesh te hi cadre khatah awm vek mai sela, state pasarih hi joint cadre in awm rawh se tih rawtna chak tak a awm a. State tin te khan kan custom leh tradition leh kan awm dante a inan loh avangin, "E, ni love hei hi chu a ni thei lovang ti a kan state sorkar theuhte beihna avangin khatih laia UT cadre ang chiah khan AGMUT cadre a lo chhuah phah ta a ni. UT kan nih lai

chiaha cadre thuhmun ho kha Home Ministry hnuaiah dah kan ni leh ta a, promotion-ah te, transfer and posting ah te All India Service officer, AGMUT Cadre ho chu Home Ministry tello chuan engmah kan ti thei ve ta lo a ni. Goa te pawhin seperate rawn duh ve leh mahse a har tawh em em a ni. Kha inremna neih hun laia 1987-a kan CM te khan Separate Cadre lo duh lo deuh pawh ni se, a hnua an rawn sorkar leh chuan Separate Cadre thatzia an hre tawh a, Pu Zoramthanga pawh separate cadre nei tura bei nasa ber pawl ah a tang a ni. Chuvangin vawiinah he House zahawm taka he thu ka kan sawi duah nachhan chu Separate Cadre nei tur hian party tin kan in lungrual tawh a, a beih pawh kan bei theuh a. Mahse hmana kan lo duh lohna result kha kan tuar a kan su tlang zo ta rih lo a ni.

IAS separate cadre neih thatna thenkhat te han sawi lan hi tha in ka hria a. Disiplinary action chungchangah hian Home Ministry hi an thu em em mai a. Entirnan - Sikkim in an tih ang kha keini chuan Home-ah kan thlen a ngai a ni. A thuneitu sang ber kha chu DOPT a ni a. Keinin direct-a kan tih ve theih loh kha Sikkim te, West Bengal te chuan DOPT-ah an direct thei ta vek a ni. Chief Secretary pawh hi suspend dawn se anni chuan an ti nghal mai thei a. Keini chuan Home-ah an zu kal a ngai a. Sorkar hnathawkte hian hlawh petu leh hrem theitu lo hi chu kan lo hlau mang miah lova. Disciplinary Case thua thuneihna kan nei lo kha a pawl a ni. Mizorama IAS pakhat chu ni 140 chhungin Delhi lama a hun hman kha ni 80 a ni. Khatih laia kan Chief Secretary kha a fel baw k a, action lak a tum a, mahse a thei der lo a ni. Home Ministry ah kha pa kha a zuk zualko va, a mam leh vek mai a ni.

Tin, kaisanna chungchangah hian Super Time Scale, Selection grade leh JAG kai tur ngaihtuah tu ah hian Home Secretary khu DPC Chairman a ni tlat mai a. UPSC khuan ministry pahnih atangin midang a rawn ruat a, khang khan lo titlu ve pawh ni se segment tina CS te khan an approve a ngai a. Promotion due em em tawh kum khat chhunga tihfel theih loh an ngah ani. Ka hriat reng thin chu UT kan nih lai khan kan gazetted officer promotion pe tura DPC chairman chu Home Secretary a ni a. Pu Kundana, kan Chief Secretary hmasaber dawttu kha thisen sang nei a ni a. Officer promotion zawng zawng kha UT-ah chuan Home Ministry thu a ni vek mai a. Pu Kundana khan Pu Liansailova Sailo, (khatih laia Appointment Department, tuna DP&AR kan tih tak) Under Secretary hruaiin Home Ministry a zuk

dawr thin a. Kar khat lai a nghah hnu pawhin Home Secretary kha a hman thei lo tlat mai a, a thin a rim em em mai a. ‘Delhi-ah kan lo kal leh ngai tawh lo vang. Aizawl-ah ka hovin kan ti vek tawh ang,’ a ti a. A hovin kan ti ta vek a. Mahse kan promotion zawng zawng kha adhoc vek a ni. Adhoc loh chuan Home Ministry telloin a tih theih der bawkw si loh. Chuvangin han lungawi lo teh mah ila tih ngaihna a awm lo. Amaherawhchu mi promotion chu a delay lo va, rei tak hnu ah an lo regularize veleh thin. Chutiang chuan Home Ministry thunei lutuk khu Super time Scale emaw Selection Grade post pakhat siam dawn pawh in anni approval te a lo ngai hi Goa, Mizoram, Arunachal Pradesh leh UT cadre joint cadre ho harsatna a ni.

A dawt lelah chuan kan Civil Service te, kan Police Service te, kan Forest Service te All India Service a induct tur hian a Chairman chu UPSC member a ni ngei tur a ni a. Mizoram promotion ngaihtuah tur kha chuan segment dang Chief Secretary-ten an lo interest pui leh lo a, an hna lamah an lo buai si a, vawi tam tak All India Service-a induction-ah hian harsatna kan tawkw a. Tuna kan Parliamentary Secretary zahawm tak Pu Hmingdailova Khiangte pawh hian a vawikhatna ah a promotion tih tlang sak se chu IGP-a pension tur a ni a, a promotion an tih tlai avang khan an pension na a hniam phah ta a ni.

Chuvangin kan All India Service officer te promotion thu ah leh an Cadre post tipung tur te pawhin separate cadre neih hi a pawimawh em em. Nagaland te chuan direct-a DOPT an dawr vek theih avang khan post an ngah bik hle a. Nagaland leh Mizoram te hi intiat deuh thaw kan ni a, All India Service post kan in ngah hleih hle a ni. DOPT direct-a an dawn avangin thil a awlsam ta riau a, duty post an tipung chak riau a ni. Puithiam kaltlang kher a khilam han biak a ngai ang deuh kha a ni a, thuthlung hlui hun ang deuh kan ni tlat a ni. Anni chuan direct in an be thei a, keini chu thuthlung hlui ang deuh-a puithiam kaltlanga dawr an ngai a. Home Ministry te chu buai tak an ni. Chuvangin kan mite hian an tawrh loh tur an tuar a, an phu ngawih ngawih te an nih loh phah fo mai a, hei hi a uihawm em em a ni.

Tin, a tlangpuiin Mizo te chuan hetah nupui fanau te an rawn hruai tlangpui a, an haw lo deuh a ni. Anni chu hometown LTC an ti, kumtin hawn theihna special package an ti, Govt. of India hian facility a rawn pe teuh mai a ni. Heta nupui fanau te hruai lo kha chuan amah a hometown-a a zuk hawn loh pawh in, a nupui leh a fate an lo

chhoh kha an phal leh zel a. Kal man leh haw man zawng zawng kha an bill leh teuh a. Anmahni enkawlina hi a sang thei hle a ni. Chu chauh a ni lo va, an han pension hian GPF zawng zawng nen nuai za chuang hi kan consolidated fund atang hian an rut teuh mai a ni.

Vawikhat Chief Conservator of Forest post an create khan a Minister concern hi ka ti ti pui a, “kan state pawisa hi chu i ti hek mang e aw, hei DFO post i create hnem tawh bawk si a, kan mamawh aia tam i create a, ‘Central in an rawn ti a,’ i ti zel si a. Hetah kan consolidated fund an hlawh leh pension, a hnu a reimburse leh pawh ni se kan pe tawk mai a, overdraft hi a awm phah a hlauhawm thin a ni. Tunah phei chuan UT hlim a State Service kan tih, peon atanga secretary ho kha an han pension tak tak a, All India Service officer upa lam an rawn dah a, an pension leh bawk si a. Pension leh GPF-a an chhuahpui hi a thahnem em em mai a. Hei hi kan zuk ngaihtuah vak loh pawisa harsatna te pawh min siam theitu zingah pawh hian an tel a ni. Chuvangin, All India Service Mizoram Cadre neih hi a phu em em a. Thiltih theih loh tawp a nih lem loh na chu hmanni lawkah pawh Manipur leh Tripura joint cadre ni thin kha a hran in an nei ve leh ta a. Chuvangin, lungrual taka he House hian kan pass a, chak taka tuna kan resolution anga kan umzui hi chuan kan tih theih te pawh a rinawm a. Tunah mai kan thei lo a nih pawhin kan la chhoh theih zel turah ngai ila.

Tin, a advantage leh thil dang chu cadre hran hi lo nei ta ila Mizo tawng an zir ngei ngei a ngai dawn a ni. Tunah pawh district thenkhata DC ah te harsatna an neih chu Mizo tawnga biak theih loh an nih hi a ni. Heta cadre hran kan neih chuan Mizo tawng hi an rawn zir ngei ngei a ngai dawn a. Chu chu thingtlang mite tan a awlsam phah dawn a.

Cadre hran neih a thatna dang leh chu insider quota neih hi a ni. IAS direct-a tling kan neih tlem tawh nen a tling chhun state dang cadre-ah an awm fo mai a. Direct-a tlingte hi an tlem kum ah AGMUT cadre-a tribal quota a awm loh chuan tihngaihna a awm lo. IAS direct kan neih hnuhnun Pu Vanhela fanu Grace-i pawh kha Tamil Nadu cadre-ah a awm daih a ni. A chhan chu khami kum khan AGMUT cadre-ah tribal quota a awm tlat lo a ni, A hma kum chiah khan AGMUT cadre-ah tribal quota a awm a. Grace-i tlin tlin leh kum khan schedule caste quota chauh a lo awm ta a. A kum leh khan schedule tribe quota a awm leh chiah a, kum khat in a miss a ni. Chuvangin Assam

hunlaia Mizo te hian IAS herchhuahna khawl an nei a niang a, IAS an tling zung zung mai a an tih lai kha en ula, Assam cadre-ah an awm deuh vek a ni. Tunah pawh Mizo hi kum 5 hnuah IAS pakhat awm leh mah ila, Tribal quota awm kum a nih loh chuan engang pawhin zuk fight ila AGMUT cadre a theih loh reng reng. Chuvangin, kan neih chhun te tan hian Separate Cadre a pawimawh a ni. Cadre change tur hian an pasal/nupuite AGMUT cadre ami an nih erawh chuan an cadre a change leh theih a. Khatiang tih lohah pheih chuan cadre change te hi awlai lo deuh mai a ni a. Chuvangin tlin a har teh lul nen a tling chhun pawh khawilaiah SDO (Civil)-ah te emaw an zuk awm mai mai dawn a. Mizo officer tha tak tak IAS a tling chhun te Bihar cadre-ah te, Jharkhand cadre-ah te an awm an awm nachhan hi Separate Cadre kan state in a neih ve loh vang a ni a.

IPS leh IFS te pawh hi an promotion post siam a awlsam dawn avang leh induction tih dawna promotion ngaihtuah rei a ngaih loh avang khan, State danga an nih rualpui te ai hian promotion an hmu tlai dawn bik tawh lo a ni. Chuvangin theihtawp chhuaha he ram leh kan officer te hmakhua ngaihtuaha vawiina ka resolution put luh All India Services IAS, IPS, IFS state cadre neih ve ngei theih nan theih tawp chhuah ni rawh se,” tih hi kan zavaia lungrual taka kan pass a tul a. He House zahawm tak hian lungrual taka he ka resolution put luh hi min pass sak turin Pu Deputy Speaker, ka rawn move a ni e.

DEPUTY SPEAKER : Awle, Resolution neituin a rawn move a, a fiah tha khawp mai kha. East India Company atangin an tan a, Indus Valley Civilisation atang te chuan tan pheih se chuan tun ai khan ala chipchiar ang a.

Nia, kan sawiho ang a, hun engang in nge kan in pek ang? Engtia rei nge kan tih ang? Minute 10 a tawh em? Han rawt ula. Minute 10 kan duhtawh em? A tha mai maw? A nih chuan minute 10 member pakhat in kan nei ang a. Tichuan tunge han sawi hmasa ang le? Pu Hmingdailova.

Pu HMINGDAILOVA KHIANGTE : Kan colleague T. Sangkunga Motion “Mizoram State in All India Civil Services IAS, IPS leh IFS separate cadre a neih ve ngei theihn nan theih tawp chhuah ni rawh se” tih kha a chinchhuakin a rawn sawi tawh a. Kei erawh chuan ka'n la tawi deuh ang a.

Mizoram hian All India Civil Services separate cadre a neih hi thil makmawh a ni tih lam kan sawi ang a. Service a awm mek IAS, MCS officer te leh MPS officer te ho hian hun rei tawh tak chu Mizoram ah hian separate cadre Mizoram hi IAS, IPS, IFS cadre State ni ve turin theih tawp an lo chhuah tawh thin naa, vawiin ni thleng hian a la hlawhtling lova. Tuna kan hriat ang khan a pawina tam tak pawh kan hria a ni. Chuvangin MCS officer tan IAS induction leh MPS officer tan a IPS induction hi a hun takah neih ngailoh a ni ziah a. A chhan leh avang chu kan la sawi zel ang a, vawiin ni hian North East State a kan dinhmun te han sawi ila, kan hriat ang khan Assam leh Meghalaya hi joint cadre an ni a, harsatna an nei lo a ni.

Manipur leh Tripura joint cadre an neih thin kha tunhnai lawk khan separate cadre nei ve ve in an awm leh ta a. Nagaland hi a tir atangin separate cadre an nei nghal ngawt a. Tin, keini aia population tlem leh a ram pawh te zawk Sikkim hian separate cadre an nei bawh a. Tichuan Mizoram hi tunah hian UT a kan awm laia UT cadre kan nih kha zawm zel in UT dang dangte nen keini nih rual a State ni ho te Arunachal, Goa te nen hian AGMUT cadre ah kan awm khawm a, keini Mizoram hi segment pakhat kan ni ve ringawt mai a ni. Tichuan, IAS atana induction MCS officer ten an khawtlai deuh na hi chu a chiang naa, thui takin ka hre chiah lova. MPS officer te ai hi chuan an ziaawm deuh zawk a. MPS officer hi an harsa hle a. Tin, kei ngei pawhin a ka lo kaltlang tawh, victim te pawh ka lo nih ve tawh nalaiah ka'n thlur bik deuh ang a, Pu Deputy Speaker.

UPSC in DPC for induction MPS officer tan a, Police officer tana iti zawk ang an buatsaih lai hian, a hmasa berah DANIPS – Delhi, Andaman & Nicobar Island Police Officer te tan DPC an nei hmasa ziah a, an number a tam si a. DANIPS tana an neih hnu hian Arunachal Pradesh tan an nei leh a, Mizoram hi a hnunung ber atan an dah a. Tichuan, year of allotment kha kum 1 same year pawh lo nisela, DPC kha Mizoram tana buatsaih hnunung ber a nih avangin Mizoram a kan MPS officer te IPS kai-ho-te pawh hi a tlar hnung berah seniority ah an awm a ni, tih kha lo hria ila. Chuvang chuan year of allotment ah kum khat ah lut vek mahse, MPS officer te hian IPS a an kai hian a tlar hnung berah an awm lo thei

lo, an DPC a hnuhnun ber avangin. Chu chu a fair lo ti mah ila tih theih a tlem viau niawm tak a ni.

Tin, Manipur te, Meghalaya te, Arunachal te leh Mizoram te han khaikhin nual ila. SPS ka'n ti ang a State Police Service Officer te Manipur-ah 1988-a lut kha 2003-ah IPS a kai a. Tin, pakhat chu a vannei zual deuh a, 2003-a DSP kha ti ang aw 2011-ah IPS a kai a ni. Meghalaya-a 1996-a State Police Officer ni kha 2009-ah IPS a kai a. Tripura-a 1998-a State Police Officer kha 2009-ah a kai bawk a. Arunachal phe chu 1992 ami kha 2002-a IPS kai te an awm a, an kai rual vek lova, 2005-a lut te an awm a. Chungho chu kum 10 service hnuah an lut a, kum 13 service ah te an lut a. Manipur pa phe kha chu kum 8 service naah IPS a kai a ni. Mizoram erawh chu 1986-a Dy. SP ni kha 2012-ah khan IPS a kai a. Tin, 1988-ah hian DSP pathum vawiin thlenga service lut an awm a, chung chuan kum 26 a ral hnuin induction for IPS DPC an hmachhawn chauh a, pakhat kan hriat angin Pu Lalbiakthanga Khiangte hi 2014 khan IPS a hmu chiah a, a thiante pahnih Biakzama leh Neihchungnunga phe chuan vawiin thlengin an la hmu lo a ni. Chu chu kan dinhmun a ni. Tin, kei pawh han insawi ve ta ila, kum 1974 November thla ah ka lut a, MPS entry Grade in DSP in, 1987-ah DPC a awm a, tah chuan kan tlang a, pathum lai chu, kan hotu hluite pawhin congratulation minrawn pe nak nak tawh a. Pu Dy. Speaker, amaherawhchu, engvang nge kan hre lo a, khatih hun lai tak kha UT atanga State puitlinga kan kai hun lai kha a ni a. Goa te leh Mizoram leh Arunachal te ho kha, Delhi-a DANIPS officerte an lobby a chak si a, chuvangin keini ho DPC-a tlang thah ho pawh kha a bum zo leh vek , a zero leh vek a ni. Lo tlang zel ta ni se Pu Dy. Speaker, 1983 a tlai berah 1984-ah hian a allot hman tur kan ni ang a, chuti chu ni sela, keini ho kha IGP in kan pension fai vek ang.

Tichuan an han ngaihtuah leh hun chu kum 1990-ah an ngaihtuah leh a, chu chuan kum 26 service ka lo nei tawh a, vanneih thlak khat chu a ni viau e, amaherawhchu, year of allotment min han pek tak tak chu 1987 a ni ta a ni. Kum 26 kan service hnuah DPC a awm chauh a ni. A hma ami kha han repeat leh lawk ila, vawiinni-a a AGMUT cadre-a kan awm hian kan MPS officer-te tana IPS induction an neih hian, a hmasa berah DANIPS tan an nei hmasa phawt ang a, an tam si a, DANIPS tana an zawh ve leh Arunachal Pradesh tan an nei leh ang a, a hnuhnung berah Mizoram tan an nei leh

chauh. Kan sawi tawh ang khan year of allotment thuhmun reng mahse tlar hnungah, seniority list-ah a hnung berah Mizoram Police Officer te hi IPS an ni dawn a ni.

Tichuan, kha lam kha duh tawh ila, vawiinah Mizoram hi IAS/IPS Indian Service Officer te tana, separate cadre, state cadre neilo kan nih avangin vanduaina tam tak a ram mi te leh sawrkar mite pawh hian an nei a, chu chu sawi sen a ni lo a, a langsar deuh deuh te han sawi ila, nichina kan sawi tawh ang khan Mizoram sawrkar hi heng cadre officer te tan hian controlling authority an nih loh avangin heng officer te chungah hian kutthlak theihna a tul anga kutthlak theihna an neilo tlat, experience in nei ang a, han thlir kir ula IPS officer zurui reng, hna pawh thawk lo, Delhi a haw tum thlawhna ah pawh luh an phal loh ngat te kha, an tenure kum hnih an zo a, helai an pelh tawh-a Delhi an thlen chuan a hun tak ah promotion an hmu tho a ni tih kan ngaihtuah atangin controlling officer nih hi kan sorkar tan hian a tul ngawih ngawih a ni, officer tha tak tak kan neih theihna turin.

Tin, tunah hian posting tenure hi kum hnih chauh a ni lehngal a, kum hnih chhung hian neitu takin hna an thawk lo ang tih a hlauhawm khawp mai. Kan hriat tawh angin tunlai hi chuan an ziaawm deuh em aw ka ti a, tun hma kan hriat ve hun lai te phei kha chuan, Delhi atanga lokal kan IPS officer te hian Court case Departmental Enquiry-ah an thiante an in koh tir thin ni in ka hria a, an haw thla zut mai, an thlen thlak tawh hi chuan an lo haw leh mai lo, a junior zawk hian charge la mang silo hian, mawhphurhna kan lo la fo mai a, hna han thawk tak tak dawn ila tih theih si loh, charge kan la mang si lo, chuvangin, ka hma amiin a rawn sawi tawh suitcase officer tih kha an awm viau a ni.

Tin. chu lo leh ah chuan, hna thawh tak tak hi an tum lo emaw ni chu aw, sence of belonging, sense of responsibility hi an neilo deuh a nilo maw, MHA (Ministry of Home Affairs) controlling authority, a pumpuia kawltu a nih avangin, engpawh ti se, engpawh thleng se hengho lakah hian kan sorkar kan lo tih ve thin hi silent inspector mai tih loh chu tih tur dang em em an nei lo a ni. Tin, a tha lo lam te kan han sawi a, Mizoram sorkar hi controlling authority ni ta sela, tih awmzia hi separate cadre hi nei chiah ila a hlawk na tur tlem han sawi leh ila. Nichinah kan ngaithla tawh, seperate cadre an nih a Mizoram State cadre officer an nih chuan Mizo tawng an zir ang a, Mizo tawng an thiam chuan departmental exam an pass ang a, tichuan promotion an hmu thei chauh ang. Kan thianpa kan hre teuh ang Zosangliana (L) IPS officer West Bengal cadre kha

‘Zosanglian, ka rin aiin i kai sang har mang e’ ka ti a, ‘Bengali ka pass har deuh a lawm maw le’ a ti a, chu chu All India Civil Services te nih dan tur a ni.

Tin, Mizo tawng an thiam hi a hlu em em dawn a, vawiinah chuan kan dem thei lo, vairam atanga lo kal officer te kan dem thei em em lo, hmun pawimawh tak, a bik takin Aizawl pawn lam District Superintendant of Police te, District Deputy Commissioner te, thingtlang ami mipui nawl pui in, (Dy. Speaker : I hun i hmang zo tawh a, tih tawp lam pang tum tawh la) ka zo tep e, Pu Dy. Speaker, chung ho mipui nawl pui chuan zo tawng an thiam chuan an mamawh leh an duhzawng chu district SP hnenah te, district Deputy Commissioner hnenah te an sawi ang a, an problem tam tak pawh kha tih fel theih a nih a rinawm. Tichuan, a that na lampang tur chu kha ti zawng khan a ngaituah teuh theih mai. Pu Dy. Speaker, Mizoram sorkar chu controlling authority a lo nih chuan, a hmaa kan sawi tawh atang khan Mizorama MCS officer te, MPS officer te tan chuan induction DPC hi a hun takah kan sorkar in a nei ang a, phunnawi leh rilru hrehawm hauh lo in kan officer ten promotion an kai ang a, phur takin he ram tan hian sorkar tana rinawm takin hna an thawk thei tawh ang a, chutichuan vawiin ah hian kan resolution, Mizoram State in IAS, IPS leh IFS te tana separate cadre a neih hi a tul takmeuh a ni tih hi kan mover Pu T.Sangkunga thusawite ka rawn thlawp a; tin, thlawp mai nilovin nei turin kan zavai hian theihtawp chhuah a tul hian ka hria a, Pu Dy Speaker, ka lawm e.

DEPUTY SPEAKER : Phar lawk kha a indawt in pathum ka lo chhinchhiah a. Pu K.Lalrinthanga, a dawt ah Dr Ngurdingliana, Pu S.Laldingliana te kha phar lawk an ni a. Pu K.Lalrinthanga i lo sawm ang.

Pu K.LALRINTHANGA : Pu Deputy Speaker, ka lawm e. Chawhnu lam hian Social Welfare Department lam ah programme kan neih avangin ka han phar hmasa a, hun min pek avangin ka lawm takzet a ni. Central Service IAS, IPS leh IFS-ah te hian (service culture lampang kha chu ka hre ve vak lova,) cadre hran lo nei ta ila, Mizo ten kan tangkaipui dan tur thlir dan dang atangin han sawi ve tha in ka hria a. Chu chu ka rawn din chhan a ni.

Mizote hi “mihrang, sahrang hma ah kan zam ngailo” kan inti a, kan in fak a, chutih rual chuan tumruh na kan neih chuan chutiang tak chuan mi tam tak Mizo te hi an awm thin a ni tih hi han tarlang hmasa ila tha in ka hria a. Tlawmngaihna te kan

ngaisang a, chu tlawmngaihna in a rah chhuah te chu kan thlir a, miin kha mi tlawmngaia kha an ngaihsan avangin mite tan rawngbawl turin, mite hmuhsit ni lovin an ngaihsan ni turin theihtawpin khawtlang tan hna an thawk thin a. Chutiang chuan ngaihsan awm takin an awm a, khawtlang ah mi entawn tlak a ni thin a. Ngaihpawimawh te a ni thin a ni, chu chu kan hun kal tawh ah chuan kan nunphung awmdan a ni a.

Ram lamah te thangchhuah kan duh a; tin, in lamah te thangchhuah kan duh a, ram lama thangchhuah awm dan kan hria a. Hun a rei loh nan sawi tam a ngaiin ka hre lova. In lama thangchhuah awm dan kan hria a, chutiang ni thei tur chuan theihtawpin hna kan thawk thin a ni. Kan hun kal tawh ah chuan. Chutiang a nih avang chuan mi hmingtha te chuan fak an hlawh a, anmahni ah pawh an nun a nuam a, chutiang chuan an awm thin a ni. Hetiang hian ka ngaihtuah a, Mizo zirlaite hi mi entawntlak tak mai an ni thin a. Zoram-ah High Sikul chauh a awm lain hmun dangah a bik takin Shillong-ah te lehkha zir in an kal a, chutianga tumruhna nena kal ho chu nasa takin an hlawhtling a. Miten an sawi thin ka hriat chu, Mizo te Shillong khawpuia sorkar hna LDC a ni emaw, typist an ni emaw, hna hniam te thawk te hi vaiho in an hmuhsit ngam ngailo an ti. A chhan leh vang chu Mizoram atangin harsa takin an chhuk thla a, tumruhna nen lehkha an zir a, an thiamthei a, khulai hmun ah hmelhriat loh kar ah sorkar hna te pawh an zu hmu thei a. Hna hniam te an zuk thawk a, khatia hna hniam te an thawh lai khan IAS officer te, IPS officer te, IFS officer te an pass leh nawlh mai thin a, churang chuan hna hniam te thawk pawh hnamdang in an hmuhsit ngam ngailo an ti a ni. Nimahsela, tun hunah hian kan dan hi a dang ta daih mai a, hun hmasa lama North East-ah IAS officer exam a, rawn pass chhuak kha an tam em em lain tun dinhun ah chuan kan nei ta ngailo a ni, kan Chief Minister pawhin a ngai pawimawh hle a, hetiang chanchin te pawh hi a sawi kan ngaithla thin a ni.

Engatinge IAS Officer te hi Mizote hian kan neih mumal tak ngai loh tih hi ka lo chhut ve thin a. 1972-ah UT kan ni a, chu UT kan nih hnu chuan Mizoram-ah sorkar hna alo pung chho a. BA pass chin tawh kha chuan 1980 hma lam kha chuan hna an hmu nghal thei deuh zel a. Tichuan MCS exam theihna chance te an lo nei leh bawk a. Chutiangah chuan an hlawhtlin chuan Aizawl-ah an awm thei a. Nu leh Pa te nen, nupui fanau te nen mahni State-ah an awm thei a ni, chu chu Mizote hian kan thlahlel em em a ni. Tawng dang hre vaklo hnam kan ni a. Hmun danga awm hi kan chak vak lova, mahni

tawnga ti ti a, nuih hum hum te hi kan chin zawng a ni a, khatianga awm te hi nuam kan ti em em a. Mizoram-ah inbantan theih dan kawng a awm phawt chuan hmun danga awm hi kan hreh em em a. Chuvangin hmun danga hna post awm reng reng te leh Central Service te pawh, thahnemngaia hlawhtlin tuma bei hi kan tlem ta em em a ni. Chutiang te a nih avang chuan tun sorkar-ah pawh hmun hrang hrang ah SDO tur te, Deputy Commissioner tur te, Mizo kan puten mi dah sak tur an nei mumal ta manglo a nih chu! IAS Officer te kan nei tawh lova, tihngaihna a awm tawh bawk si lo. Chu chu a pawh em em a. Tun dinhmun ah hian Mizoram in Cadre hran lo nei dawn ta ang ila, kan tan a tangkai dan tur kha chhut tur tam tak a awmin ka hria a. Nichina kan sawi ang khan, mi tam takin Mizoramah IAS officer a nih pawhin, IPS officer a nih pawhin, IFS officer a nih pawhin Mizoramah awmna chance, (nichinah kan mover-in a sawi ang khan 50%) a awm a ni tih chiang takin an hre tawh dawn a ni. Chutah chuan Mizorama awm thei bawk, officer mi lian ni thei bawk, chutiangte a lo nih chuan thuhmaa ka sawi ang khan Mizote chu mi hrang, sa hrang hmaa zam ngailo tih te, mi thahnemngai, tunhmaa Shillong-a lehkha zirhote, taima takin an zir a, hnamdangte pawh khum thin ho khan Mizoramah awm theihna chance a awm chuan thahnemngai takin zir leh duhna thinlung kan zirlaiten an nei ang a.

Tun dinhmunah chuan Mizoramah BA/MA pass mi tam tak an awm a, hmun dangah hna an zawng peih si lova Mizoramah vek awm an tum a, zirlai mi tam tak an chuang a, hna nei lovin an awm a ni. Tun dinhmunah hian cadre hran lo nei ta ila Mizoramah awm theih na chance tha tak a awm ang a, chutiang bei tur chuan thahnemngai takin kan zirlai te hian an bei tawh dawn niin ka hria a. Chutiang a lo nih chuan hlawhtlinna tam tak kan zirlaite atangin kan lo nei ang a, a chawmtu nu leh pate leh thenrual tha, thenawm khawvengte pawhin mi lehkhathiamte chu khatiang khan chhawr theihin an lo nei ang a, a tangkai em em dawn a ni.

Chutiangte a nih avang chuan, tuna kan resolution sawiho hi pawimawh ka ti em em a, sawiho hunah chuan tlem tal chu ka sawi ve ngei ang maw le tiin ka ngaihtuah a. Chuvang chuan tun hunah hian ka rawn sawi ve a. Tuna ‘Mizoram in Central Service- IAS, IPS, IFS separate cadre hi neih ve ni rawh se’ tih hi hun kal tawh ah wawi tam tak lo hlawhchham tawh pawh ni mahila, “tum chuan kawng a awm,” an ti a. Mizote chu Kristian kan ni a, kan ngaihpawimawh tak tak chu Pathian hnenah kan

tawngtai hum hum mai a ni. Kristian 80% chuang Mizoramah hian kan awm a, a Mizote phe chu 100% Kristian kan in ti a. Tih takzeta Pathian hnena kan tawngtai chuan huphurhawm hle mahse Pathianin malsawmna min pe ang a, kan hlawhtling ve leh em em ang. Pathian hnena kan thil dilte hi, han sawi thui leh ta deuh hlek ila, a ropuina tur a nih phawt chuan Pathian hian malsawmna min pe thin a ni. Keimahni tan bika hlawhtlinna tur, kan chhungkaw nawmna tur, kan thenrualthate nena kan nun nawmna tur ni lova Pathian ropui nan kan dil chuan Pathianin mal min sawm ang.

Kan rawngbawlina tur Mizoramah (Dy. Speaker : I hun i hmang zo a, mahse dar khat thleng hi a ni a, midang tan hun a awm tawh lova, dar khat thleng, minute hnih vel chhung hun i la nei). Mizoramian IAS officer khatiang kha cadre hran kan neih chuan, kan sawi ang khan thalaiten chutiang chuan tumna an nei ang a, kan thalaiten chutianga tumna an nei a hlawhtlinna kan lo neih chhoh chuan thiamna lamah pawh kan lo sang ang a, kohhranho pawhin kan thil duh, India ramah missionary tir tur atana kan induhna te, khatiang kha thiamna lamah kan san phawt chuan kan in tir tam thei ang a. An tawng kan lo thiam sa ang a, inzir tak tak duhna thinlung an lo neih chuan thil dangah pawh mi hman tlak an lo ni chho ang a, a tangkai dawn a ni. Chuvang chuan, All India Service- IAS, IPS leh IFS-ah te hian separate cadre kan neih theih chuan kan tangkaipui dawn a ni tih kha ka rawn tarlang a, kan mover-in a rawn move ang khan pass ngei ni se ka duh pui a ni. Ka lawm e.

DY. SPEAKER : Phar lawk kan awm na a, kan chhun chawlh hun a ni a, chawhnu lamah hun a la awm tho a, phar lawkte kha sawi hmasa turin lo inring mai ula. Tunah chuan kan chawl rih ang a, dar hnihah kan thukhawm leh dawn nia.

S P E A K E R : Resolution sawihona kha kan chhonzawm ang a. Chawhmaa banphar tawh 2 la sawi lo an awm a. Pu Ngurdingliana i sawm ang.

Dr. NGURDINGLIANA : Pu Speaker, ka lawm e. Resolution neitu khan Genesis atang khan a tan a, kei chu Luka vel atangin ka rawn tan ang e. Mahse ka hmanhmawh chuang miah lovang, sawi tur ka ngah mai. He resolution Mizoram State-in All India Services IAS, IPS, IFS, Separate Cadre a neih ve ngei theih nan theihtawp chhuah ni rawh se tih hi ka thlawp a. Amaherawh chu, hemi ka thlawp thu point ka rawn sawi hma hian, eng eng emaw tun dinhmuna kan tu kan fate zirlaite tana tan kan lakpui a ngaih zia hi ka rawn sawi duh a.

Pu Speaker, tunah hian IAS Regular Recruitment kan tih Direct Recruitment hi Mizoram atangin mi 14 kan nei a, chungah chuan senior ber a cadre year of allotment 1984 a ni a, a tling hnukung ber kha 2014-ah a tling a ni. Tunah hian, tun trend a kal zel chuan tun a kan Chief Secretary hi hun a nei rei tawh lova, Chief Secretary post chelh tur hi chuan apex scale neih a ngai a, a IAS tur hrim hrim Direct Recruitment kan tih Regular Recruitment 14 kan neih ho hi, engtik ni emaw chuan apex scale an la lut dawn tho tho a. Tun dinmun tun atang a kum 10- 15 hi chu chuti lutukin a la hlauhawm loh a, amaherawh chu, a hnu zel lo kal tur hi tun atangin kan thlir angaiin ka hria a.

Tin, heng Direct recruitment bakah hian State Civil Service atanga IAS pek promotee kan ti dawn nge confer kan ti dawn, heng hi mi 12, tunah hian kan nei leh a. Anni hi a senior ber chu year of allotment 2001-ah khan a ni a, a hnukung ber State Civil Service atanga IAS confer hi 2010 kha a ni. A gap chu 2001 atang a 2010 chhungah khan mi 12 an in khung a ni . Amaherawh chu dan naran in, heng State Civil Service conferred an nih hian an confer kum atang hian, engemaw mi fal bik, mi thiam bik an awm a nih chuan thu hran, confer an nih kum atang chiah hian kum 9 erh awrh hi service-na an la nei a. Chuvang chuan anni State Civil Service atanga kal chho te tan chuan Chief Secretary post hi chu an thlen har tak a ni. Anni bakah hian tunah hian State Civil Service ni lo services dang Information atang te, Medical atang te in 2 kan nei baw a. Tunah hian Mizoram atang hian IAS a vaiin Direct Recruitment 14 leh State Service atang leh Non-State Civil Service atangin 14 kan nei baw a, 28 kan nei a ni.

Kan population leh tuna sorkar in relbawl dan en chuan tan kan lak viau angai a ni tih hi chiang takin he data figure atang hian a lang mai. Chu chu IAS bikah ni se Pu Speaker, IPS - Indian Police Service hi tunah hian Regular Recruitment kan tih baw Direct Recruitment UPSC kaltlang hi mi 2 chauh kan nei, 1 zawk chu, year of allotment chu 1987 a ni a, a hnukung ber chu 1995, chu a gap a thui zia chu. Tun atanga reilo te ah chuan DGP tur hian hnamdang kan neih a ngai dawn tlat . A promotion kal chho zelah a scale chhoh dan kan hre vek chu chu a chipchiarin sawi lo i la. State Police Service atanga IPS-a promote hi mi 8 tunah hian kan nei a. A senior ber chu 1995 kum khan confer a ni a, a hnukung ber chu 2005 khan a ni, chuti chuan a vai hian IPS hi 12 chauh tunah hian kan nei a ni, IAS- 28, IPS -10.

A pathumna Indian Forest Service-ah hian Direct Recruitment UPSC kal tlang a exam hi mi 4 kan nei. Tun a kan PCCF thawk mek te Additional te leh kan Chief Wildlife leh a thar ber chu tunah State dangah post in a la awm hrih a PCCF kal chho tur hi chuan an year of allotment en hi chuan hnam dang nei lo hian kum engemaw chen kan la awm theiin a rinawm.

Hemi piah lamah kan hriat zauna atan Pu Speaker, tunah hian Indian Foreign Service IFS kan tih ah hian mi 3 chiah kan nei. Tin, Central Services kan tih a total chuan 26 an awm a, kan chhiar ang a, i phalna in. India Civil Accounts Service ah hian Mizoram atangin 5 kan nei hmun hrang hrang a thawk. Indian Audit & Accounts Service-ah mi 3, Indian Economics Service-ah mi 2, Indian Revenue Service Custom & Central Excise-ah mi 4, Indian Railway Accounts Service-ah mi 2, Indian Defence Accounts Service-ah mi 3, Indian Revenue Service Income Tax-ah mi 6, Indian Trade Service-ah mi 1. Central Services ah hian 26 kan nei a ni.

Kan population chhutin hei hi a kham khawp awm lo em em a. Engtin nge hma kan lak ang? A ram chhungah hian han ngaihtuah bik ila, kan society leh zirna boruak hi a in mil lo em em phawt mai hi a pawl a ni. Nula tlangval thahnem ngai deuha mahni in luma lehkha zir, pawn chhuak ngailo hi, kohranah pawh inhman hman lo, tlawmngai pawla in hmang hman lo, lehkha zir ngai ti si. Heng te kan chhuah dan te hi “a ni chu a chut a nia aw, a ni chu a induh a nia aw” kan ti let zel ringawt mai te, heng hian zirna environment min siam lo lutuk a, in hmanna tam lutuk avang hian. Chung te pawh chu factor 1 zing a Civil Service kan hniam tual tual nachhan a ni.

Thei fal leh tithei fal an awm bik miah lo, rual awhna avangin phaiah te coaching kal tur ten sum puk ten kan tu kan fate kan intir. Zirna boruak chu mimal in kan luah a nih pawhin, hostel-a kan awm a nih pawhin Aizawl, Mizoram boruak ai chuan a tha hrim hrim. Mahse a nazawngin kan pan thei si lo a, chuvangin heng te pawh hi kan ngaihtuah a ngai a. Nakin lo kal chho zelah, kan thalaite ah competitive mindedness hi tun aia nasa lehzualin kan tuh a ngai a ni.

Mizoram Youth Commission hmalaknain coaching centre te kan nei, a tha lutuk, hma kan sawn phah em em. Amaherawh chu kan khaw chhung kan khaw boruak enin programme tam bakah noise pollution tam lutuk te pawh hian zirna boruak a ti chhiain ka hria, Pu Speaker. Chuvang chuan heng tuna data ka rawn hai lan te atang khan

infuihna, mahni bialah theuh te, mahni vengah te pawh hmang ila tha in ka hria a ni, Pu Speaker. Tunah chuan kan Resolution angin, engvangin nge State separate cadre hi kan phu loh bik lem? A hnam bilah, a proportion phei chuan Civil Service-ah hian India hmarchhakah chuan inthun lut hnem pawl tak, a ber kha kan ni thin a, tunah chuan zawi zawiin kan hniam deuh a.

India hmarchhak rau rau ah pawh Nagaland hian IAS regular direct recruitment kan tih hi an cadre strength chu IAS 66 an nei. Tin, an State Civil Service atanga kaisang thei an quota chu 28, a vaiin 94 an nei a ni, Nagaland-in. Kan thenawm lawk Tripura-in IAS regular recruitment, an cadre strength chu 67, kaisang thei tur post promotees an tih hi 29 an nei a, a vaiin 96 Tripura pawhin an nei a ni. Tin, keini aia state te leh chhawng Sikkim in IAS direct recruitment 34, tin, promotees ah, Pu Speaker, 14 an nei a, a vaiin 48 anni tak ngial pawhin an nei a ni. (SPEAKER : I hun i hmang zo tep, tlip rawh.) A ngaihnaawm lutuk, Pu Speaker, ka'n chhiar zel ang, ka rawn ti zel ang, lo ngaithla rawh. A palina ah Mizoram Segment of AGMUT kan tih, AGMUT zingah Mizoram kan tel ve a, state engemawzatin kan intawm a, chuta kan cadre neih zat direct recruitment-ah 13 chauh, promotees ah 16, IAS-ah, a vaiin 29 kan nei. Tripura-in 96 a nei a, Nagaland-in 94 a nei a, keini state dangte nena intawm pawhin 29 chauh kan nei a ni, IAS bikah. IPS leh IFS ka la sawi dawn, Pu Speaker, tlem hun min pek belh rawh.

Nagaland-ah hian IPS cadre strength hi direct recruitment 42, promotees 18, a vaiin 60 an nei a ni. Tripura-in direct recruitment 36, promotees 18, a vaiin 54 an nei. Sikkim direct recruitment 22, promotees 10, a vaiin 32. A tam hle a ni, IPS-ah pawh hian. Keini Mizoram AGMUT cadre a tel ve ho in kan neih chu direct recruitment 9, IPS, promotees pawh 10, a vaiin 19 chauh a ni.

Tin, Indian Forest Service-ah Nagaland direct recruitment cadre strength chu 23, promotees 10, a vaiin 33. Tripura-in IFS-ah direct recruitment 39, promotees 18, a vaiin 57. Sikkim-in direct recruitment 21, promotees 9, a vaiin 30 an nei a. Keni Mizoram AGMUT state dangte nena intawm ho in IFS cadre strength kan neih chu direct recruitment 9, promotees 10, a vaiin 19 a ni. Khang figure atang khan, Pu Speaker, enge a tehfung, a criteria chu ka hre lo a. Tuna Resolution, vawiina member zahawm takin a rawn putluh hi enin, engvangin nge kan neih loh bik ang? Theihtawp chhuah ni rawh se, a tih ah hian a chiang mai a. Keini aia state te te, khatiang ina khatiang cadre strength

tam tak an han nei han chhut khan, chawhma lamah kan ngaithla tawh a, kan neih chhan bul kha chu. Heng zawng zawng avang hian vawiinah he Resolution rawn lut hi kei chuan ka thlawp a, ka pawm a, member dangte pawh pawm vek turin ka sawm zui bawka ni e. Ka lawm e.

S P E A K E R : A bengvarthlak em mai a, sawi zel pawh a hnialawm loh. A dawtah Pu S. Laldingliana.

Pu S. LALDINGLIANA : Pu Speaker, wawiina kan Resolution “Mizoram State in All India Services(IAS,IPS,IFS) separate cadre a neih ve ngei theih nan theih tawp chhuah ni rawh se” tih hi ka rawn thlawp a. Tin, a move tu member zahawm tak Pu T. Sangkunga khan a han move hneh khawp mai a, han sawi belh em em tur pawh hi a awm tawh hian ka hre lova. Amaherawhchu, support nan tlem a zawng ka sawi ve dawn a ni.

Kan hriat theuh angin India ramah parliamentary forms of government kan nei a. Hetiang sorkarah hian executive chi hnih an awm a, pakhat chu political executive kan tih, heng minister-te hi an ni a. Tin, a dang leh chu permanent executive kan tih, tuna kan sawi lai mek All India Services Officers, a bik takin IAS kan tihte hi an ni. Kan hriat theuh angin heng All India Services Officers-te hi mithiam chung chuang, kan move-tu in a sawi tawh ang khan, talent nei tha an nih mai bakah, series of training, India ram chhungah te ram pawnah te neiin, khatiang khan nasa takin Secretariat table-ah hna an thawk a, experience an nei tha em em a. Tin, chutih rual chuan anmahni counterpart, political executive kan tih minister-te, hengte pawh hi mipui ah nasa takin mawhphurhna an nei a. Hemi te pahnih executive pahnihte thawk dun hi tha taka lungruah taka, inhrethiam taka an thawh dun chuan mipuiin a rah an seng thin a.

Amaherawhchu, an thawh dun that theih lohva, advice te an inpek that hleih theih loh chuan mipuiin an tuar thin a ni, hei hi kan hriatsa vek a ni a. Chuvangin, hemite pahnih, political executive leh permanent executive inkarah hian understanding, inhriatthiamna tha tak a awm pawh a tul a. Permanent executive in minister-te an mawhphurhna san ziate, mipui hmaah thutiam tam tak an siam a, chung an thutiamte chu an lo tlin hnuah implement an duh thin a, chung a implement theihna tur atan chuan anni chuan an ti thei tawh lova, permanent executive te kha a implement tu an ni thin a. Policy

formulation chu political executive-te kut a ni ta a, a implementation erawh chu heng permanent executive kan tih, All India Services Officers-te hi an ni ta a ni.

Chutiang a nih avang chuan hemite hi an pawimawh khawp mai a. State-ah achievement sorkarin a neih theihna tur atan chuan heng ho hi an control na hnuaiah awmin, disciplinary action thleng pawh a an lak theih tur ni sela. Separate cadre chutianga kan lo nei a nih chuan khang zawng zawng kha helai ministry hian a ti thei dawn ta a ni. Tunah chuan kan ngaihthlak tawh ang khan Ministry of Home Affairs hnuaiah an awm vek a. An transfer, posting zawng zawngte pawh khumite kut vek khu a ni ta a. State-in thuneihna a nei lova, action kan la thei baw si lova, hei hi a paw em em a. Hei tunah kan hriat theuh angin AGMUT cadre atangin an lo kal thin a. Mizote an lo kal a nih chuan, state dang atangin deputation a an lo kal a nih chuan, a tha e, anni chu Mizo an ni a, thahnem an ngai a ni. Amaherawhchu, a tam ber AGMUT cadre atanga IAS Mizorama service tura lo kal ho hi chu, kan hriat ang leh kan hmuh ang hian thahnem an ngai miah lo a ni. Kan term hmasa ah khan hotute duhsakna in Trade & Commerce enkawltu puitu ah ka tang ve a, hmingte pawh sawichhuak ta ila paw in ka ring lova. Khatih laia Trade & Commerce Secretary-a kan neih Nikhil Kumar-a AGMUT cadre, khangte kha ka en ka en thin a, Delhi kalna chance hi a zawng ngat ngat mai a ni. Mizoramah hian a awm rei ngai lo reng reng. Tin, chubakah nichina kan ngaihthlak tak ang khan chhuanlam chhete te an siam a, khulaiah Delhi ah an chhukthla leh a. Tichuan, helaia facility awm zawng zawng kha an enjoy leh si a, Home LTC thlengin la lo in an awm ngai reng reng lo a ni, chutiang chu a ni a.

Chuvangin, hna an thawk tha lova, thawhna hun pawh an nei tha tak tak lo a ni. Chuvangin, a harsa khawp mai a, an transfer leh posting chungchang thu ah te, kan sawi tak ang khan, engmah state-in tih theih a nei baw si lova. Chuvangin, keimahni state-in separate cadre All India Services kan neih hi a tul em em a. Mizoramah kum hnih, kum thum che che te an awm a, an awm rei loh avangin tawng an thiam lova, mipui nen inpawhna tak tak nei lovin, mipui rawng pawh tha takin an bawl thei ngai lo a ni. Policy duanah development hna tha taka kalpui turin state inrebawlna pawh hi an zirchiang tak tak hman lo a ni. Chhuanlam awm thei apiang siamin, ka sawi tak ang khan Delhi-ah an tlan thla a.

Tin, a tawp bera ka'n sawi duh chu cadre loyalty chungchang thu hi a ni. Cadre loyalty an ti a, All India Service personnel ho hian, anmahni state cadre a an awm chuan, hmun dangah pawh khan va thawk se la, Delhi-ah pawh zuk thawk sela, an state kha an hre reng ta a, a chhan chu an kir leh dawn a ni tih kha an hre tlat a ni. Kum hnih, kum thun hnu ah anmahni own cadre state-ah khan an kir leh dawn a, khatah khan hna an thawk leh dawn tih hriain khawiah pawh awm se, Delhi-ah pawh awm se, hmun dangah pawh deputation-in thawk selangin, helaia an state, an Cadre State-a kha englai mah hian an theihngihl ngai lova. Khami atan khan an tangkai thei em em thin a ni. Tunah erawh hi chuan AGMUT Cadre atanga IAS helai kan rama rawn thawk hote hi chu Delhi-ah pawh kan hotuten tir thla ta sela, thahnemngai takin an thawk lo a nih pawhin tihngaihna tak a awm chuang reng reng lo a ni. Chuvangin keimahni State Cadre kan neih hi kan ngaihthlak tak ang khan kan phu ve a. Tin, eng nge ni kan neih lohna tur chhan pawh hi a awm lo.

Kan House Leader zahawm tak hian hei hi a hre chiang em em a. Kum 2014-ah te, 2015-ah te khan DO letter sei tak, convincing tak a lo ziak a, Pu Speaker, tah hian a lehkha copy pawh ka kawl nghe nghe a ni. Hei Home Ministry-ah a lo ziak tawh a. Amaherawhchu eng vang nge ka hre lova, vawiin thleng hian kan la hlawhtling thei lova. Kan ngaihthlak tak ang khan tun dinhmunah hian Meghalaya leh Assam chuan Joint Cadre an la nei a. Mahse, khulaia hnathawktu ho khu han thlir han thlir hian Meghalaya IAS lut chu Meghalaya-ah khuan an tawp tlangpui a, Assam-a lut pawh chutiang tho chu a ni a. Engmah harsatna an nei lo a ni.

Tin, helai kan tlang mi pui tho, entirnan, ngaihthlak tak ang khan Manipur leh Tripura te pawh Joint Cadre thin kha tunah chuan anmahni ve vein, a hranpa ve vein an nei leh thei tawh a, an lawmpuiawm viau va. Tin, kan State tetpui tho Nagaland te, Sikkim te pawh chhan hrang hrang avangin anmahni Cadre an nei vek tawh a. Keini leh Arunachal Pradesh hi Cadre nei lo awm chhun kan ni a, Goa a lo ni bawk a. Goa Chief Minister Manohar Parikar phei chuan kum 2014 tawh khan khatih hun laia kan Prime Minister Dr. Manmohan Singh-a hnenah khan DO Letter thui tak, dengkhawng tak a lo thawn tawh a ni. Chutiang chu a ni a.

Tin, a thu hrim hrimah tun kum, kum 2000 hnu maia State-a hlan kai ve Chhattisgarh te, Jharkhand te, Uttarakhand te hian tunah hian State an nih rual rualin an

nei vek tawh a ni, anmahni State Cadre kha, separate cadre an nei vek tawh a ni. Chuvangin vawiina he resolution lo lut hi a lawmawm ka ti a. Kan state tan a pawimawh a, mipui tan a pawimawh rualin kan zirlaite tan pawh nakin zel hun lo kal zel tur atan Separate State Cadre kan lo nei ve a nih chuan hei hian awmze thui tak a nei thei dawn a. Chuvangin he Resolution hi lungruual taka kan pass ngei pawh ka duh a, ka rawn support a ni. Ka lawm e, Pu Speaker.

S P E A K E R : Awle, Pu John Siamkunga a phar hmasa a. Nang chu a hnuhnung deuhvah, Leader i nihnaah.

Pu JOHN SIAMKUNGA : Awle Pu Speaker, he resolution, All India Civil Services Cadre hran neih chungchang kan sawiho mekah hian tlem te han sawi ve ka duh a. Kan hotuten tha tak tak an sawi tawh a, thui tak chu ka sawi dawn lova. Keini hi Tribal State kan ni a. Reservation hi All India Civil Services-ah te, 7.5 % nei lai mek kan ni a. India ram hi hnam hnufual kan tam avangin han hrut ka duh a. Kan tling khat lutuk leh kan tling chho thei lova hi, heng Competitive Exam-a kan tling chho thei lo hi vei tham ve hle hi a ni a.

Tun hma, '79 khan Mandal Commission, BP Mandal hnuaiah khan din a ni a. Amah kha Bihar Chief Minister pasarihna a ni a. Tichuan a Report-a kha a thehlut ta kha a ni a, 1980 December ni 31 khan. Khami kha pawm a ni ta lawk lova. 1990 khan VP Singh-a hnuaiah khan pawm a lo ni ta a. Khami dan ang kha chuan General Category hian zaa sawmnga an chang a, Tribal hianin kan neih sa 7.5 % hi kan neih chhunzawm a. Tichuan Scheduled Caste ho hian 15%, tin OBC ho hian 27 % kha an hauh thei a. Khatiang kha kan lo nih tawh dan a ni a. Chungah chuan reservation hi tam tak a awm lai hian exam hi a hautak em em a. Helaiah hian pawimawh ta em ema chu kan zirna, kan Education System nen pawh hian Competitive Exam lampang hi a inhrul ve deuh te pawh hi a ngai em aw tihte ka ngaihtuah a.

Vawiina kan thu sawi lai hi thu tha tak a ni a. Lo nei ta ang ila keimahni chhungkua atang hian hemi Cadre hran kan neihah hian keimahni chhungkua hi thawk tur kan nei ngei ang em tihte pawh hi ka rilruah a awm thin. Separate Cadre kan nih chuan hemi Cadre thlan theih dana hi khami Candidate khan a duh Cadre hi a thlang thin a ni. Chumi Cadre chu ka duh ti hian an ziak lang a. Preference kha an ziak a, 1, 2, 3, ten an dah thin a. A hmasa bera kha an pe tlangpui ta a ni. Chu chu keimahni kan Mizo

zirlaite atang hian All India Civil Services Competitive Exam-ah hian tling thei awm ta miah lo ila, keini Cadre hranah lo awm tawh si ila hemi Selection Grade-ah te, Probation period a zo ang a, Junior Scale, chutah Senior Scale an han chhoh pawhin hmun tam takah hi chuan hna ropui vak lo te pek an ni fo a ni, IAS te pawh. Amaherawhchu helaiah Cadre hran kan lo neih chuan post duhawm tak takte a lo awm ve thei tawh ang a. Khangah khan keini Mizo nula tlangval zirlaite an tan viau loh chuan hmun dang atang khan Mizoram Cadre hi an rawn fill up teuh thei a ni. Kha kha ka rilruah hian a awm thin a.

Exam hi a hautak em em a, paper a tam a. General Studies ringawt pawh hi paper li a awm a. Mark 250 zel a lo pu ta a. Exam hi a hautak a ni, speed te pawh a ngai em em a. Mark 250 zel an han neih khan General Studies-ah khan Paper khatah khan 250 zel a lo nih khan General Studies paper kha pali a lo awm ta a. Chuan English kha qualifying a lo ni a, 250 a lo ni leh a. Optional paper pahnih a lo awm leh a, 250 leh 250 a lo ni a. Personal Interview hian mark 275 a pu thung a. Full Mark zawng zawng hi, hetiang exam ngai chi zawng zawng mark 2275 daih a ni. Inelna hi a sang tawh em em a. Chumi a nih avang chuan tan hle a ngai a.

Tin, Preliminary Exam atang hian tan a ngai a. Hna ruak tur reng renga hi Rajya Sabha khuan a lo ngaihtuah lawk vek a ni. nikum lamah te khan sangkhat leh tih a ruak a. Chungah chuan All India Civil Services bak Central Service tam tak kha a keng tel thin a. Khang ruak kha a tam thei hle nachung hian Prelim-a tling tur hian post pakhat inchuh tur hian Preliminary-ah hian pariat an tlin tir thin a, a post mil zel kha a ni a. Chutah chuan pariat an han thlang tling ta a, Main-a inel tur hi chuan post pakhatah pali a ni leh ta a. Tichuan Personal Interview-ah hian post pakhat hi pahnih inchuh ang deuhthaw a ni. Khatiang kha thil kal dan system fel tak awm chho kha a ni a.

Chuvangin he separate cadre kan tiha hi a hluin a ropui em em nachung hian keimahni lam hi kan inen let hle erawh chu a ngai dawnin ka hria a. Tin, nichinah kan hotuten an sawi thin, cadre hran ami te hengah deputation ten an rawn kal thin a. Helai ram hmangaihna nei chuang miah si lovin hna an thawk an tihte kha thil dik tak vek a ni. Chumi a nih avang chuan cadre hran kan neih loh chuan a dik tak chuan AGMUT-ah hi chuan Union Territory pasarih lai an lo awm tel bawk si a. Khami a nih avang khan helai hnuaiyah hian tam tak kha kan awm a ni tih kha a chiang a. Chutih lai

karah chuan hemi cadres reng renga hi Group liin an then ta a. Chung Group li an then zinga Group palinaah hian kan awm a. Heng hi Tamil Nadu-ah te, tin, helaia AGMUT bak hi Uttaranchal, Uttar Pradesh leh West Bengal Group-ah hian kan awm a ni.

Chung kan han sawi duh lai taka chu All India Civil Services Exam hian hemi examna hnuaiah hian hna hrang hrang, service hrang 26 a ruak thin a. Chu 26 ruaka kha chi hrang hrang a ni. Central Service a ruak tam ber thin a. Central Service kan tih chuan Central tana thawk ho a ni mai a. Heng IRS te pawh Central Sawrkar tana thawk an ni a, Central Service an ni nghal mai a. All India Civil Services-a erawh hi chu State tan leh Central tana thawk dun, khami thawk kawp hova kha Al India Civil Services tih thin an ni. Khamiah khan tuna kan han sawi lai taka pawh hi All India Civil Services pathum kan sawina a ni a. Amaherawhchu, a thawk tak taka erawh chu pahnih IAS leh IPS te an ni a. Chutih lai karah chuan a tawp bera sawi duh ka neih chu, he cadre hran neih kan phut mek lai hian keimahni lam hi engnge kan dinhmun tih kha kan in en tel ngaiin ka hria a. Exam ah hian kan tlin zel ve kha a ngai tlat. Chumi a nihloh chuan hnamdang hian min awp vek thei tho a ni helai cadre ni siin. Helai hmun a awm si khan.

Kha kha an rawn thlan miau chuan kan paih thei reng reng lo a. Tunah tehkhinnan Mizoram cadre hran lo awm ta se, keini tribal quota pawhin tling thei ta si lo ila, state dang atang khan rawn thlang ta fur mai si se la. Khang ho ta kha kan ni tho tho dawn a ni. Chumi anih avang chuan he cadre hran kan ti hi a tha em em a. Tun a kan han experience tawh zawng zawng te han thlir hian min hmangaihtu ni lo tam tak an rawn thawk tawh thin bawk si a.

Chuvangin hengte hi hmangaihtu zawk leh ram neitu zawk ten i thawk ang u ti a theihtawpa kan hotute beihna a ni a. Hetiang ang zawng a rilru pu a Resolution lo lut hi a tha ka ti. Amaherawhchu keimahni lampang erawh helai kan ngaihtuah rual rual hian kan inenlet a, competitive exam a tling thei tur a theihtawpa kan inbuatsaih erawh hi chu a ngai tak meuh meuh a ni tih kha ka rawn sawi a. He Resolution hi ka support e.

S P E A K E R : Aw, Pu John-a chu phar lo mahla sawm tho tur i nia. Pu T.T.Zothansanga i ko hmasa ang.

Pu T.T.ZOTHANSANGA : Pu Speaker, ka lawm e. Hei duh inang lehlam lehlamah kan thu a, kan han sawiho vel a ni a. Vawiina kan thupui hi, Resolution hi mithiamho khel atan ka it khawp mai a. Amaherawhchu, nia, thu tha tak kan sawi thei

turah ngai ta ila. Nichinah khan kan member zahawm tak Dr. Ngurdingliana khan chipchiar takin arawn sawi a, chipchiar chuan karawn sawi ve tawh lo ang a, mahse tlem azawng han sawi lan ve duh ka nei a.

Tunah hian tuna All India Services kan tihah hian India ram pumah hian post 6396 aawm a. Tichuan tuna an luahkhah mek kha 4926 niin a vacant post hi 1470 a ni. Nagaland, Tripura, Sikkim, AGMUT tih kha arawn sawi a. Kha kha karawn sawi chhonzawm tawh lo mai ang a. Manipur hian 110 neiin, 85 an fillup a, 25 vacant post tunah hian an nei a. Tin, Assam leh Meghalaya khuan tunah an la intawm a, 273 neiin 208 an luahkhat a 55 a ruak an nei a ni.

IAS kan han tih Central Service kan tihah hian Mizote hi kan tlem tulh tulh tih hi kan hre vek a. Hei hi engnge a chhan ni ang aw ka ti a. A tirah kha chuan ka rilruah Meena hnam ho vang khuan a ni em ka ti a. Hei India ramah tunhmain Tribal Quota kan nei thin a, tunah pawh kan la nei tho a. Amaherawhchu kum 1980 chho vel khan khutah Rajasthan vel a hnam tha kan han tih mai te zing ami Meena hnam kan han tih ang khuanin quota an han neih belh tak avang khanin anni khu an lut ta teuh teuh mai a. Khu khuan min nek te ni khan kan hria a.

Engpawh ni sela an lut tawh laklawh a. Kha kha rilru a kan hriat ah kan sawi mai mai a. Tunah hian separate Cadre hi lo nei ta ila Mizo thalaite hi Central Service-ah hian kan tui sawt ang tih hi pakhatna ah chuan ka ring a ni. A chhan chu keimahni Mizo hnam hi hnam huaisen ral hmaa tlan ngailo kan intihlai hian homesick ve deuh mai hi kan ni a. Mizoram ngeia post duh hnam kan ni a. Kan pipute France rama an zuk kal lai ngei pawh khan “E, khawvela khaw ropui ber London-ah i zu kal ang u aw” an tih pawhin “E khai London hmuh kher hi ngai kan ti lo, London hmuh ai chuan kan sumhmunah arbawm chhia hmuh kan duh tawh zawk e” ti ngat kha an ni a.

Khatiang khawpa mahni ram leh mahni inhmun lo ram ngai kha kan lo ni a. Chuvang chuanin hmun hla tak a hna tha tak thawh kha kan rilru hianin a tum lo emaw ni chu aw tih ka ngaihtuahnaah chuan arawn lut a. Tunah Mizorama hna sang ber ni a kan han hriat chu MCS hi a ni mai a. MCS ah kan tlan ruih ruih a, a thiam leh fng fal ni a kan hriat pawh hianin Central lamah, vairamah aawm an hreh vang nge ni ka hre lo a, a tum a tum chhin lo hi an tam em em tawh mai a ni.

Chuvangin hetiang a sepeate cadre kan neih theih a, India ram top post te pawh Mizoram chhung atanga kan neih theih dawn a kan pass chhuak thei dawn anih chuan tiin kan thalai tamtak hi chu an phur hle ang tih hi ka ring tlat a ni. Central service post hi kan ngah ve si a helamah, chuvangin MCS-a intlansiak chiam chiam lo hian a aia sang ah khatianga kan tlan theih a kan ram chhung ngei ah pawh damchhungin a awm ve theih tawh ani tih ngaihtuahna atang chuan kan thalaite pawh hi an phur lehzuang ang tih kha ka ring tlat a ni.

Pu Speaker, a pahnihna ah chuan cadre controltu nih hi sorkar tan hian a pawimawh ka ti. Tute emaw deputation in an lo kal a, kan Mizoram House-a an awm ringawtte pawh kan han control theilo mai ang chi te kha a awm a. Khatianga khanin vaiho, tawng mawilo ni lo se , tute emaw an rawn post a, nichinah an sawi tam tawh a. A tam thei ang ber Delhi-ah chhuk an tum a ni.

Nikum hmasa lawk pawh khan Delhi ka zu kal tumin kan officer pakhat chu, “I rawn haw ngai si lo a, Delhi-ah hian i awm deuh reng mai a engnge i tih?” ka ti a. “Official tho in alawm ka awm” a ti a ni, IAS in. Kha kha a ni a. Khulai an zuk awm pawh kha official vek an nih chuan an TA/DA zawng zawng kha Mizoram sorkarin a tum si a, an zin veivak nasa si a. Chuvangin an TA/DA ringawt ah pawh hian kan seng hnem mai awm mang e tih te ka ngaihtuah a. Tin, mikhual hnathawhin an rawn thawk a ni an tih te pawh kha ka sawizui tam lovang a. Mahni awmnghehna tur ni lovah chuan kan rilru te pawh a dang a, helaia an lo kal chhungin kan political hruaitute nge ni kan ram hruaitute an theih ang chin chin in tawngkam thiam tak takin an han malis kual vel a, an awmchhung a tlangtla taka an awm theihna tur hian hre ber niawm tak hian an awm a. A tak takah chuan, a practical life ah chuan Zoram hmangaihna hi an neilo reng reng tam tak hian. Khalai te kha ka rilru hian a chharin ka hria a. Tin, cadre hrang kan neih chuan a neitu tak tak kan ni dawn a. A neitu tak tak kan nihna atangin kan u leh nau (Speaker: Kan chawl lailawk dawn a ni a, reilote kan inthlak leh ang.)

DEPUTY SPEAKER : Awle, chhunzawm rawh le.

Pu T.T.ZOTHANSANGA : Pu Deputy Speaker ka lawm e. Central lamah deputation te pawhin kan zu tir ve tawh ang a tih kha ka rilruah a rawn awm a. Hmun dang atanga a lo kal helai reilo te te kum 2 term emaw a aia thui hret kan han pawh ang

chi ang kha a neitu tak tak kan nih dawn avangin ‘sense of ownership’ kha an nei ve tawh dawn a ni.

Nichinah khan an rawn sawi deuh nual tawh a. Kan cadre an nih tawh kha chuanin an nun pumpui kha an pension hma chu a neitu nihna kan chang tawh dawn a. Khalai ah khanin engnge ni an tluksual leh an tihthatloh ilo fahranah pawh khanin keimahni sorkar kut deuh vek a nih tawh dawn si avang khan, kha kha a hlawkthlak dawn riau in ka hria a. An zuk kalna lamah pawh khan pur nasa takin an zuk chaw thei turah kan ngai. Deputation an dil a nih pawhin an zu kalnaah Zoram tan awmze nei taka an zu awm theihna turin chhhuah thin te pawh kha a tha in ka ring a.

Kum 1867 khan Japan ho khi an la mawl khawp a i ti mai ang. An emperor Hirohito khan Japan mawlzia kha a hria a. “E, heti reng chuan khawvela hnam ropui ni a kan inhriatna hi heti mai hi a ni si a. Chuvang chuan kan thalai te hi kan tirchhuak ang a, an lo kir leh hunah ram ropui kan din ang,” a ti a. Tichuan France ah te, Britain ah te, hmun hrang hrang, Germany ah te khan zirlai sangrual kha a tirchhuak vak mai a. Khami te an lo let leh khan Japan ram ropui khi a rawn piang chauh a. 1904-05 ah phei kha chuan Russo-Japanese war ah Russia ram kha an hneh daih mai a ni. Khatiang deuh khan kan naute tan hian hmun hrisel leh zirna tha an zu kal a, helai Zoram tana thil hlu tak tak hriatna (knowledge) zau tak an rawn hawn hun hi kan hmathlir a ni tih kha kan sawi tel hram duh a ni.

Tin, Pu Deputy Speaker, kan sawi duh pawimawh deuh mai chu; khatianga cadre kan lo nei hrang tawh a nih chuan Mizorama MCS kan vawk lal len i ti mai ang, hetiang hi a lo reh tawh turah ka ngai a. Zep thu a awm lemlo tunah hian, sorkar hnathawk zingah hian kan sawi thin a, Doctor kan indaihlo, Professor kan indaihlo kan ti a, kan au kan au a. Kan Minister te pawhin an dil belh lo pawh a ni lo, an va dil belh a, an lo turn down leh thin a. MCS te, MPS te leh MIS te chu formula ang maiin kumtin hi kan indah ringawt mai a. Heng te hi a uiawm lutuk. A chang chuan kei chu ka ngaihtuahna lamah chuan Pathian thu lamah chuan kan kohhran hotute an awm a, an taksa damna lam enkawltu Doctor hi kan lak hnem a ngaiin ka hria. Doctor hi a tam thei ang ber kan lak a, a kilkhawr ber thlenga kan intirh hi a hun tawhin ka hria a.

Tin, chutih rualin he kan Zoram la enkawltu tur, kan thalai zirna lama ke pen mek tu te hetiang ho in a leilung zirna tha tak leh environment tha tak an neih theih

nan zirtirtu tha hi kan provide ngei ngei tur a ni. Tunah hian kan college tam takah hian zirtirtu kan nei tlem lutuk hi a pawl ngawih ngawih a ni. A tak takah chuan, “Kan thalaite hian lehkha in zir tam lo a ni, in environment a tha lo a ni, in awm danah hian in zir tam lo hrim hrim a ni, KTP leh YMA velah hian in zir tam lo aniang,” te kan han in ti a, a tak takah chuan heta an classroom, an va in training-na hmun turah ngei mai khan zirtirtu an neih that loh chuan engtingge rah tha a chhuah ang? Chuvangin Cadre hrang kan lo neih tawh hunah phei chuan, hetah IAS ten emaw tu ten emaw kan sorkar deparment pawimawh DP&AR te an han chelh tawh ang a, khalaiah khan post pawh hi kan insem rual thei turah ka ngaia , doctor in daih lo a au kumtluan reng ringawt mai te hi zahthlak a nia! Kan bial Champhaiah te phei chuan 1st May atangin hospital kan close dawn an ti a, doctor kan indaih loh na te pawh hi kan sorkar hian a hre em em ang tih ka ring a. Amaherawhchu hetah a fawng vuantute lam atangin nge ni ka hre chiah lo, DP & AR lam te nge ka hrelo, post creation hi a tam lo lutuk a ni, doctor lamah hian, professors lam nen.

Tin, chumai bakah Agriculture te, Horticulture te, Engineer te hi kan indaih lo em em vek mai a, post creation hi sum van avang chuan a harsa tih chu kan hre theuh a, amaherawhchu heta a formula anga a fawng chelhtu tute emaw an in dah chhoh zung zung laia, hetah sing hnih thum lek hlawh tur pawh kan inla hleithe thin lo hi chu kan ram hian a tuar ang tih hi ka ring tlat a ni. Chuvangin separate cadre kan nei a nih chuan creation of post chungchangah pawh hian hma kan sawn ka ring a, zirtirtu high school level a ni emaw, school level atangin High School ah, plus two ah, college thleng hian helai kan rama kan mihring tuai hriam tu tur ber te kan indaih loh fo chuan tute nge Central Service-ah lut chuang ang? A bul thum, a tak tak ah chuan B.A kum hnih va zira tih vaka nawr chhuah theih ngawt hi a ni lo. Hetah class tin atanga an in chhawp chhuah chhoh vek hi a ngai a ni. Chuvangin kei chu creation of Cadre hranpa neih ka duh nachhan tak chu, creation of post Mizoramah hian a lut a rual tawh ang tih hi ka ring tlat.

Khami a rual hun kha kei chu ka hmathlir hi a ni. Doctor in daih lo lutuk, Professor indaih lo lutuk ang chi te. Horticulture te hi Mizoramah kan eizawna ber tur a ni kan ti a, Agriculture te kan in nghahna, za ah 70 kan in nghat kan ti a, kan officer te an indaih ngang silo a, kan han dil a an lo regret leh baw si a, khilai karah khan kan ram hian tlema han enchian deuh tur chu kan neiin ka hria. A fawng vuan tute thawh ang ang

kha post an siam belh zel a nih chuan, tunah hian ka hmelhriat te pawh hi kan han sawi zauh zauh thin a, kan MCS a kan unau te ho pawh hi, hnaruak hi chu ala tam a, kawp hi kan hreh reng reng lo, Zoram hmangaih avangin hah pawh kan inti lo, an ti ve tho a ni. Kha kha kan sawi tel hram duh a, kan indaih lo kan ti maithei a, MCS unau te pawh, amaherawhchu indaihlo dangte pawh kha kan enthiam ve a ngai in ka hria a. Indaih lo chung chungin department a post dang hrang tam tak te pawh MCS in an luah sak teuh tawh a, khatiang kha kan dinhmun hi a ni ve bawk a. Chuvangin post thenkhat te phei hi chu kum hnih thum te hi chu han la lo ve ila, a dang te hi han la ve vak mai ila chuan kan Zoram hi chu hmuh theih hian a nuam ang tih hi ka ring tlat a ni.

Pu Deputy Speaker, kha kan sawi ta deuh vak a, state upa lo tak kan ni a, kum 20 velin mi hnungah tunah hian kan tlan chho ve mek zel a ni a, ram buai avangin kan hnufum deuh hlek a ni. Tin, Mizoramah hian mite ang turin theihtawpin kil tinah eng field ah pawh hian hma kan han la chho ve mek a ni a, Land Revenue a ni emaw, kan dan tam tak te pawh hi han en han en ila, a tak takah chuan hnam naupang kan nihna te pawh ala lang a niang e, khutah hnam pui zawk atangin engemaw chen hi chu kan han copy a, vawikhatah a puitling nghal thut thei bik lo, kawngka kan hawng ang a, chuta tang chuan kan zir chho ang a, a tul chu kan siam danglam leh mai tur alawm tih te hi ka rilru ah chuan a rawn awm a ni.

Vawiina kan resolution hi tha ka ti a, kan thalaite tan kawng zau tak kan hawnna turah kei chuan ka ngai a. Thingtlangah te chuan, ‘e khai! keimahni khawchhung ngeiah matric kan lo pass ve thei ta a, kan lawm tak tak a ni. Kan khua ngeiah B.A kan zo ve thei ta a, kan lawm tak tak a ni,’ kan ti kan ti. Chumi in a kawh tel chu kan top officials pawh kan Mizoram chhung ngeiah kan cadre atangin kan nei ve ta a ni tih, kan nei theih hun hi kan hmahlir a ni tih kha kan sawi tel duh bawka.

Tin, chutih ruala kan sawi tel duh chu Manipur-ah sawn hna a har em em thin a, Shillong-a ka class mate ten an sawi thin chu, keini ah chuan hna te hi a lei a lei te hi a ngai tawh a, a hautak em em mai a, chuvangin kan pawisa neih chhun chhun hi kan khawl a, Delhi-ah kan tlan thla a, nuai 2 nuai 3 man vel lehkhabu kan lei a, kum hnih khat vel uluk deuha kan zir chuan eng service ah emaw hian kan tling hrim hrim a ni, an ti a ni. Khatiang te pawh khan kan la infuih a ngai dawnin ka hria. Kan tla hniam kan ti kan ti a, kan tlak hniam chhan laitak a kha kan zawn a chutah chuan a damdawi kha

hetah sawrkar atangin kan tih theih a awm ang, khawtlangah, society atangin KTP leh khawhar in kallo tura khatianga mi tum bik nei te chu kan in relieve thiam te pawh hi angaiin ka ring. Chuvangin theihtawp kan chhuah anga, SSA hna alo chhuak a, hna tenau alo chhuak a, kan dil hum hum a, peon hna te pawh sang chuang in kan dil ringawt maia, M.A te pawhin an dil a ni an ti, constable te pawh hi, khatiang a nih kha chuan a zahthlak tlat mai a. Chuvangin kan ram kal dan tur hi theih tawpin en ho ila, a mangan thlak a, tunah hian. Mangang viau tur si kan mangang lo lutuk hi a manganthlak a ni, ti rawh u, kan sawi nawn leh ang. Mangang viau tur si kan mangang lo lutuk hi a mangan thlak a ni. Chuvangin vawiina kan resolution member zahawm tak Pu T.Sangkunga'n, Mizoram State in All India Services separate cadre a neih ve theih nan theih tawp chhuah ni rawh se, ti a a rawn chhawp chhuah hi lawm takin ka rawn thlawp a ni. Ka lawm e.

DEPUTY SPEAKER : I hun i hmang pel hret a, mahse ka rawn inrawlh dawnin i tawng zawm zat bawk si a, inrawlhna chance ka neilo a, tunah Pu Zothangliana.

Pu H. ZOTHANGLIANA : Pu Deputy Speaker, ka lawm e. Mizoram State in All India Services, IAS, IPS, IFS separate cadre a neih ve theih nan theih tawp chhuah ni rawh se, tih hi ka rawn thlawp ve duh a. Vawiin ah chuan IAS te, IPS leh IFS te pawh an ni tho awm e, hmun dang atanga a bikin hnam dang lo kal thin te hian Mizoram hi hard posting an ti a, an awm hun chung reilo te hi enge maw ti ti a tling tlak hram hram a hi an duhtawk viau tlangpui a ni. Thahnemngaihna tak tak nena ram leh hnam tan ti a thawk hi chu a tam lo zawk fe hi an niin ka hmu ve tlat a ni. Hengte hi a bo theihna turin separate cadre Mizoram in a kan neih ve hi a tul hle in ka hria a. Nichinah khan kan memberpui zahawmtak pakhat chuanin, separate cadre hi nei pawh ni ila, a Zofate ngei hi kan luh hleihtheih siloh chuan hnamdang ten min chim vek mai ang tih thu te kha thahnemngaih thu ah a rawn sawia, a dik ka ti a, chutiang a nih rualin separate cadre kan neih loh hlei hlei hian hnamdangin min chim theihna hi a sanga, keimahni a cadre hrang kan neih na na hi chuan kan thalai te pawh tun aiin an lo phur zual anga, sawitu hmasa ten an sawi ang deuh khan tun kan dinhmun ah hi chuan kan thalai thiam tak tak zingah hian MCS kan tih mekte zingah ngei pawh hian an awmin ka hria, "All India Service a luh chuan hmun hrang hrang ah kilkhawr tak tak ah vairam ah chengker tak tak ah te min

dah dawn a, chu ai chuan MCS nih emaw State service a luh mai hi kan duh zawk a ni,” ti te pawh hi an awm ve nual a ni. Chung ang te pawh chu separate cadre kan neih chuan a lo bo anga, he Mizoram chhungah leh kei mahni ram ah ngei hian lungmuang takin, permanent in an thawk thei dawn a ni tih hriat na ringawt pawh hian vawiin a tawm im thalai lehkha thiam fel tak tak eng emaw zat hi chu a ko chhuak ngei ngei ang tih hi a rinawm in ka hria a, chu ringawt pawh chu thil thlakhlelhawm, hmasawn na min thlen tu tur pakhat ni ah ka ngai a ni. Keini hi Lawngtlai District Headquarters lam mi kan ni a, Lawngtlai ah sawn Superintendent of Police, SP ah te, DC ah te IAS hnamdang mi kan neih ve zeuh zeuh a, a bikin SP ah ngat phei chuan IPS kan hotute’n duhsak taka min rawn dah sak thin hi an awm tha duh lo khawp mai a, a mangan thlak tak a ni zel a ni. Chutiang deuh tho chuan, IAS diktak, (tute mahin an lo ngaikawi em lo anga) IAS dik tak direct recruitment a lut ho DC a han neih te hi a thlamuan thlak kan ti a, keini ngial pawh in kan han dawr pawh hian IAS leh IAS lo deuh hi chu keini mithiam lo deuh pawh hian reilo te kan han dawr thin pawh hian an danglam zar a ni ti hi kan hmu ve thin a ni.

Chutiang a ni chung chuan hnamdang IAS ten min han awp thin a, tunah ngei pawh hian min thut chillh mek a, nimahsela a tak tak a min thut chillh a, min enkawl chhung hi a reilo khawp mai. Chhuanlam tling tak a ni emaw, chhuanlam fahrah te te a ni emaw an lo lal tawh hle mai si a, min chhuahsan zut mai a, an khaw lamah an chhungte inneih vangten an tan hun pawimawh tak a lo ni a, an pi leh pu, an nu leh pa te damlo emaw, eng eng emaw chhuanlam in min chhuah bo san reng mai a, junior officer deuh te in-charge an la a, chutiang chuan a nih dan tur ang tak in District Administration pawh hi kal hleithei lo fo mai a, separate cadre erawh hi chu nei ta i la, a Mizo ten kan cadre kha kan lo hnawhkhat zo lo deuh a hnam dang an lo lut tho tho a ni pawh in tun ai thlawt hi chuan kan dinhmun hi a tha ang tih hi kei chuan a chiang ah ka ngai a ni. Keimahni Mizoram State cadre an nih miau chuan a nghet a thawk tawh tur, he hmun hi an awm hmun nghet a ni tih hriat na nen an chhungkua te pawh in an lo lut ve ang a, reilo te atana in hrem na ang zia zanga loh theihloh na avanga reilote tal awm a tul ve na hmun mai a ni ti angin kan ram hi an rawn en tawhlo ang a, he hmun ah hian kan fate pawh hi an thang in an sei lian ve dawn a ni, he hmun ah hian rei tak chu nghet takin ka awm dawn a ni’ tih rilru leh thinslung an put chuan tun ang mai mai a, mikhual inchan chunga hna an thawh thin hi a lo bang tawh ang a, thahnem ngaihna tak tak nen hna min thawhsak thei

ang tih hi a rinawm in ka hria a, chuvang ringawt pawh chuan separate cadre kan neih ve hi chu a tul tak meuh in ka hria a ni.

Ka hriat ve thuak danah, ka hrethui lo in ka hre thuk lem lo khawp mai a, ka hriat ve thuak danah Mizoram Sorkar ah hian Senior Duty Posts kan tih, IAS cadre kan tih ang chi hi post 29 kan nei in ka hria a, chumi ah chuan post 16 hi promotion post, MCS leh Officer dang te kaisan theih na tur niin, chumi ah chuan post 14 hi MCS bik tana promotion chance niin, a dang 2 hi Non-State Service Officer te quota ni awm a ni a, separate cadre kan neih na na na hi chuan, keimah ni aia state te zawk Sikkim leh state dang te pawh in quota awm ai tak an neih ang hian kan nei law law thei ang tih pawh hi a beisei awm in ka hria a. Chutiang te a lo ni chhoh hunah chuan, vawiin a Officer leh MCS dang ten kaisan na dang awm chuang lova kum tam tak, thenkhat chuan (kan tawng mawilo a ni em lo a nga) ek-cheh thut a an lo thut chilh ringawt mai, an pension thleng rak a an thut chilh ringawt mai tur, Director post leh post dang ang te pawh hi tui lem lo, phur tawh lem lo, pension na tur a ni a' ti a an han awm chilh ringawt tur boruak te pawh hi a lo danglam deuh ang a, Director ni reng chung te pawh in kaisan na chance mi tam tak in an lo nei ang a, IAS ah te emaw, IPS, IFC-ah te pawh promotion chance an lo nei tawh ang a, chu ringawt pawh chuan kan sorkar hnathawk mithiam tam tak hi a cho phur anga, a thawh hlawk tir leh zual thei ang tih te pawh hi a beisei awm in ka hria a ni.

Tin, nichina kan sawi tak ang khan IAS te na na na hi chu an dan a lo dang deuh a, a chhan pakhat ah chuan a thiam leh tha, filawr deuh bik te an nih sa piah lam ah an training paltlang ringawt pawh hi hlawk pui tham a ni. Entirnan, kan MCS leh State Service dang te pawh in training tha tak tak te an paltlang ve tho na in, All India Service ho in an training tluka tha hi chu an dawng lo deuh ni te pawh in a hriat a, chutianga training nei tha te an nih avang chuan separate cadre kan neih hun ah chuan kan Department 40 chuang lai mai a top post Directorate lam te pawh hi, IAS leh IPS te IFS-ten an lo thut chilh remchang ve tawh anga, tin MCS te leh kan Officer dang te pawh in chutianga kaisan na chance chu an lo nei a nga, hei hian mi tam tak a ti phur anga, ram tan an thawk hlawk zawk thei ang tih te pawh hi a beisei awm in ka hria a ni.

Tin, ka'n sawi belh ve hrim hrim duh chu, State Service Officer nih pawh a ropui em em a, chutihrual in All India Service Officer hi chu kan dah sang zawk,

chungnung zawk kan ti lo thei lo a, chutiang chu a nih avangin mihring hi nihna in a phuar a, a chawi a, a dawmkan na, a nawr kal na chin pawh hi a awm teuh mai a, kan hre theuh ang a, entirnan keimah ngei pawh hi mi then khat ngaih ah chuan ka MLA hma chuan MLA hmuha min hmulo tak tak hi tam tak an awm ka ring. Mahse, Pathian leh mipui te, kan hotute khawngaihna zara MLA ka han nih ve tak ah chuan kan awm ai chawp ve mai a. Tin kan nihna in a zir tlat chuan MLA in a tih tur kha thiante angin ti vek thiam kher lo mah i la, engemaw zat chu kan lo ti lo theilo a, kan ti ve mai a, chutiang deuh chuan State Service Officer nih ai chuan, All India Service Officer an han nih chin ah chuan tu te pawh hian tun ai chuan an thawh hlawk zawk ang tih te pawh hi beisei awm leh zel in ka hria a ni.

Tin, pawimawh em em mai, thiante pawh in an sawi tawh ka'n sawi ve leh hram duh chu, 'Mizoram hmangaihtu ber chu Mizo te kan ni.' Mizoram tana thawk hlawk tur chuan Mizoram sorkar hian a chhunga thawk tu zawng zawng a control theih hi a pawimawh a ni. Chuvangin, separate cadre kan neih a kan top official te pawh kan hotuten a tul anga, khawng deuh tak pawha an enkawl theih na tur a controlling authority an neih theih na tur atan pawh hian he thil hi a pawimawh em em in ka hria a ni. Chutihruah in hei hi tun hma pawhin an lo bei tawh thin a, mahse a la hlawhtling mai lo a ni tih te pawh kan hria a, tunah hian India ram ah BJP a Sorkar a, an ni hian a nih na tak ah chuan keini ang State te hi chu min duhsak viau lo pawh a ni thei, chutiang chu a nih avangin he resolution hi kan ti tlu a nih rau rau chuan, tin kan ti tlu ngei tur ah pawh ka ngai a, ka beisei a, kan tih thluk hun ah pawh a nawr zui na ah hian tumah ral bang mai lova, kan ram leh hnam tan a tha, pawimawh, tul tak a ni tih hria a, theitawpa tan kan lak theuh pawh hi a pawimawh dawn hle a ni. Kan zavaia tanruah a, theitawp a kan beihna nen lo chuan he thil hi awl sam tak a tihhlawhtlin theih erawh a ni lovang tih hi a rinawm in ka hria a, a bawhzuina ah pawh thahnem i ngai ang u ti in duham deuh hlek in ka'n sawi belh a. "Mizoram State in All India Services IAS, IPS, IFS separate cadre a neih ve ngei theih nan theitawp chhuah ni rawh se," tih resolution hi thinlung tak in ka rawn thlawp a ni e. Pu Dy. Speaker ka lawm e.

DEPUTY SPEAKER : A lawmawm e. Pu Lalruatkima.

Pu LALRUATKIMA : Pu Deputy Speaker, ka lawm e. Vawiin chu kan inkhel nasa bawk a, a boruak a rit lek lek in ka hria a. A lawmawm hle in ka hria, kan

member zahawm tak Pu T. Sangkunga resolution a rawn put luh ‘Mizoram State-in All India Services IAS, IPS, IFS separate cadre a neih ve theih nan theih tawp chhuah ni rawh se’ tih kan han sawi khawm a, kan ram dinhmun te kan han hriat khan he thil hi chu keipawh in tih makmawh niin ka hria a. Vawiin chu inkhel hi kan ang deuh va, inkhel ah pawh hian si phur tam deuh leh phur lo lam te, a tawp dawn tepa goal ven him tum leh tum lo te an han awm thin a. Kan han ti liai liai a thenkhat ten time an han delay a, dar 4:00 hma in kan zawh hman si kha chuan resolution dang te MLPC Act hlih chungchang a awm ut mai si a, han sawiho kha chak lampang kha kan awm bawk a, chak lem lo lam kan awm bawk emaw ni tih kha kan awm bawk a Pu Deputy Speaker. Chuvangin next resolution-ah hian kan lut lo tho tho dawn in a lang bawk a, helai hi ka’n sawi duah a. Ni e, keini lam pawhin hei hi lungrual takin tha kan ti a ni, han sawi vak pawh kha a ngai lova, pawm mai kha a ni a. Dar 12:00-ah kha chuan pawm mai kha keini lam kha chuanin kan duh tawh a, resolution agenda dang ah kal mai kha kan duh tawh a ni, mahse, ball char tu ang deuhvin time kha kan delay thiam deuhva, khati lamah kha chuan kan han fak pui che u a, a tul dan a kha ka sawi duh a.

Helaiah hian Pu Deputy Speaker, kan mut te hi a chhuak deuh tawh emaw ni, IAS han tih ah khan NIAS te kha han belh leh zeuh ila kan harh deuh hawk ka ring a. A pu lut tu in a zir bawk nge ni han sawi belh ta ila N kha han belh ta zauh sela mut chhuak te pawh kha a reh maithei a ni. Eng pawh ni se Central YMA te pawn kuminah Central Services hrang hrang ah hian Mizo fa te kan lut tlem tawh a, a mangan thlak em em a, chumi tur chuan theih tawp chhuah a tan lak theih na turin General Conference rorel inkhawmpui lian kan neih khanin kan rel a. Chutiang chuan pawl hrang hrang pawn Central Service hrang hranga All India Service kan tih ang ah te Mizo fa te tam zawk kan luh loh chuan kan State-in a tuar a, hmasawna te a thuanawp a, a ram neitute ngei in ram leh hnam hmangaihna rilru nen a, neitu rilru pu a ram tana bureaucrats dinhmun te an han luah hian hma kan sawn ngei thin a. Chutiang chu kan nih theih na tur in pawl hrang hrang te pawh an ngaihtuah naah a awm nasa thin a ni.

Chutihlai chuan ka’n sawi tel duh chu kan sorkar hotute pawh hian theih tawp chhuah in, tun sorkar mek pawhin hun hmasa lamah te tha a lo thawh dan te hi ka’n sawi lang tel duh a. Kan hriat angin separate cadre hi 28th Dec. 1988-ah siam tan a lo ni a, kan hre tlang vek a, heng Arunachal Pradesh, Goa, Utter Pradesh leh Mizoram

khatiang ang khan keimahni State thenawm Assam, Meghalaya, Manipur leh Tripura kan han tih ang te kha cadre khat a an han awm thin ang te kha cadre hrang vek ah an han awm ta a, mi hnung ah Sikkim takngial pawh um pha lovin kan tlan ve a ni. Chutiang chuan kan resolution neitu khan an sawi a, hetah 28th July 1988 khan khatih laia kan Chief Minister Pu Laldenga khan Pu Rajiv Gandhi-a hnenah khan separate cadre kan mamawh dan te, a tul thu te kha ziak in a lo thlen tawh a. Chumi hnuah kan Governor te, Chief Secretary te pawhin thehltut in hemi chungchang hi theih ang ang in kan bawh zui tlang a. Tin, Memorandum te pawh 10th Sept. 1993 khan separate cadre chungchang ah kan sorkar-in a lo thehltut leh bawk a.

Chu mai a la ni lo deuh a, hei a lo hre lo nge ni a rei tawh deuh hlek a 28th Oct. 1993 Cabinet Council of Ministers ho pawh khan a lo rel tawh in agenda panga naah hian a lo passed vang tawh a, chutah chuan a sign tu pawh hi kan resolution neitu bawk hi a ni, helaia Cabinet Meeting minute sign tu hi a ni a, chuvangin kan House Leader zahawm tak ho hian 28th Oct. 1993-ah lo rel a ni tawh a ni, hemi chungchanga theih tawp chhuah a hma la turin. Sorkar a lo in thlak zel a, chung sorkar lo in thlak te pawh chuan he thil hi kan vei tlang hle niin a lang a, 8th March 2000 kum pawh khan khatih laia C.M Pu Zoramthanga khan Home Minister Pu L.K. Advani hnenah khan a lo thlen tawh bawk a. Tin, vawi engnge maw zat Prime Minister te sawipui in hma an lo lak tawh na te pawh kan hmuh pui a. Tin, hun a lo kal chho zel a 3rd Oct, 2012 khan National Integration Council Meeting agenda-ah te pawh chhawp chhuah a lo ni tawh a, hemi chungchang hi kan House Leader hian a lo sawi tawh bawk a. He separate cadre –a hi kan mamawh zia chu khata tang khan a chiang mai awm e, sorkar han in fak tur emaw han in sawisel na tur emaw awm miah lovin kan vei tlang em em mai a. Kan member zahawm tak ten thiam takin an sawi tawh a.

Tin, chu mai chu a la ni ta lo cheu mai a, hemi cadre huam chhung a State neitu ten Goa C.M tuna ni thar leh ta Defence Minister kal chhuak leh ta Manohar Parikar-a pawh khan 10th March 2014 khan Prime Minister Dr. Manmohan Singh-a hnenah khan ziak in a lo thlen tawh a, a ziah dan a phei hi chu Central Home Ministry te lo dawr a, khatih laia opposition lam leh ruling pawh lo ni bawk Central lama thu neitute nen an boruak a lo fuh lo deuh nge ni an tawngkam hman te pawh hi a mawi loh thu te kha an lo thlen tawh a, chutiang chuanin Goa lam pawn separate cadre te pawh kha an

nawr bawk a, chutiang in Arunachal lam te pawh khan an nawr bawk a. Khatiang kha kan dinhmun a ni a, mithiam te an lo chhuak zel bawk a, mithiam chhuah vanglai tak te kan han nei a. Kum 1970-1980 chho ah IAS te, IPS te an chhuak tam em em mai a.

Vawiinah hi chuan khawvar lam arsi ang mai in Pu Deputy Speaker, kan nei ta phauh phauh mai a, hemi kawngah hian tan lak nasat a ngai a, chumi tur chuan kan thalai te mithiam tak tak combined services helai hmunah MPSC-in an buatsaih ah MPS te, MCS te chutah chuan kan rin loh deuh deuh All India-ah pawh thluak nei tha pawl tura kan rin ten helai mahni ramah enzawna tling zawk tura an ngaih vang nge helai hna kha an bei a an in ham tang ta zel mai nite pawn a lang a. Chung ang te pawh chu vuak thiah nan te, chung ang a awm tawh loh nan te, he separate cadre an han tih All India Services-ah hian kan neih ve ngei hi a tul tak meuh meuh in ka hria a ni. Kan ngaihtlak tawh ang khan hemi in a hrin chhuah theih awm zawng zawng te pawh kha ka hma ami te pawh khan ngaih nawm tak tak in an rawn sawi tawh a. Tin, vawin a kan Seretariat-a a khaipa ber ber te hnam dang, district-ah te phei chuan District Administration khawihthu ah te pawh hnam dang tun hnaiah te pawh kan han nei chho ta zel mai a. Khang kha a bul ber chu Mizo thalai ten All India Services hrang hrangahte kan luh tlem lutuk vang a ni kan ti lo thei lovang. Chumi tur chuan kan infuih thar lehna a nihna tur te leh he thil hi state in kan chanvo ve tho, keini aia state te zawk Sikkim te pawhin cadre hran an neih tawh laia kan la nei ve lo erawh hi chu a rualawhthlak khawpin ka hria a. Chuvangin, kan sorkarin a ti mai tur alawm tih te pawh ngaihtuahna te pawh kan han nei a. He House zahawm taka resolution pass kher ngailo hian a theih ang anga tangtlangin kan nawr thei a lawm kan han ti tak na a, he House ngeia resolution ngeia han tih kha chu a thatna chin a awm a, kan hmalak dan zawng zawng te pawh kan ngaihlain kan hria a. A rawn puluttu phei kha chuan a pulut thiam bawk a, a move thiam bawk a. Khami chhung khan Pu Deputy Speaker, khami chhung khan Lengpui kan thleng hman dawnin ka hria a. Minute 40 chhung zet mai kha an move a, a ngaihnawm em a kan muthlulo a ni mai a. Chuvangin, dar 4 kan nghak ta rau rau bawk a, chumi a nih avang chuan next resolution-ah kan luh a ngaih dawn avang khan.

Khatiang kha kan nih avang khan kan ram dinhmun te, kan tunlai khawvel kan thangthar tena rual awzna leh rual elna kan neih chhoh zelna tur atan tepawh khan he uisa ei thluak hian midangte a phalo nia min hmuhna thin, a phak zia kan han lantir na chin a nih theihna lai pawh a awm ang a. Kan mithiam tam takte helai MCS ah te, MPS ah te inham tang mai lova helama All India Services lama an beih ve theihna turin tan an lak theihna tura nasa zawka kawng a inhawn theihna tur a ni pawh khan a lang a. Chuti a nih loh chuan kan Secretariat-ah hian hnamdangin min thut mai dawn tih chu a lang reng mai a.

Kha kan ngaithla tawh a, kan Secretariat-a kan hotu berte, venhimna lama kan hotu ber te pawh hun reiloteah chuan hnam dang an rawn thu mai lovang tih hi a sawi theih tak loh avangin, heng zawng zawngah te pawh hian ngaihtuahna zau zawk kan hman theihna turin helai kan resolution hi kan ram tan, kan hnam lo kal zel turte tan pawh thil tul tak a niin kei chuan ka hria a. Keini lam hi chuan sawi ngai vak lova pass pui mai che u hi thain ka hria a, kan resolution puluttuin a thiam bawk a, a tulnain min nang bawk nen, hei hi sawi sawi lo hian pass thuai thuai mai ila tih chu kan ngaihtuahnaah chuan a awm lian khawp mai a. Kan hotu hmasaten hun rei tak atangin theih ang angin hma an lo la a. Amaherawhchu, vawiin ah an hmalakna kha la hlawhtlinglo mahse he House zahawm takin Resolution a putluh kan lo pass tawh hun danga ngaihsak tawk loh emaw hlawhtling tawklo pawh a lo awm a ni mai thei e. Amaherawhchu, he kan Resolution hi chu Pu Dy. Speaker, theih tawp chhuaha a hlawhtlin ngei theihna tura bawhzui hi kan mawhphurhnaah kan dah thiam hi a pawimawh hlein ka hria a.

Chuvang chuan, he kan Resolution, Pu T. Sangkunga, kan MLA zahawm takin a putluh, “Mizoram state-in All India Service-a IAS, IPS, IFS, Separate Cadre a neih ve theih nan theih tawp chhuah ni rawh se” tih hi ka thlawp a ni tih ka sawi duh a ni e. Ka lawm e.

DEPUTY SPEAKER : Tunge sawi duh kan la awm em? Pu R.L.Pianmawia.

Pu RL. PIANMAWIA : Pu Deputy Speaker, he kan resolution hi han sawi ve a chakawm riauvin ka hria a. Mizoram state-in All India Service IAS, IPS, IFS, Seperate Cadre a neih ve theih nan theih tawp chhuah ni rawh se” tih hi

session hmasa lamah khan ballot-ah pahnihnaah khan keima thehluh kha kan lo nei tawh a, kan sawi hman ta lova, pawimawh hi ka ti ve khawp mai a. Heng inelna sang a thu ho hi an pawimawhin an lo ropui hlein ka hria a. A chhan chu, Pu FLR Siama, Home Commissioner a nih lai khan Darlawnah a lo kal a kan lo hmuak a khawtlangin, kan mawl tlang ve bawk reng a. Thil an tih reng reng khan in mawl hle mai Darlawn chu, chuti khati a ti deuh reng mai a, IPS te hi chu an lo ropuiin tumah khan an chhang ngam bawk silova. Kei ka ngaihlan a ni ta lova, “Ka pu, i zir chen hi chu zir ve ila mawl min ti miah lovang” ka ti a. Chutah chuan ani pawh in, ‘e, a ni maw’ a ti ve mai a. A zir thleng kha zir kan awm ve bawk si lova, a thiamawm em em mai a ni, khatia min han ti kha, mawl min han ti kha. Chuvangin, a zir thleng zirlo khuaah kha chuan mawl tih kha huat theih ngawt a ni si lova. A hreawm duh ang reng khawp mai a, ka ngaihtuahna te a ti kal thui khawp mai chumi tum chuan. IPS hovina an zah deuh tur hian engtin nge thil awm thei ang tih hi ka ngaihtuahna ve mai maiah chuan IAS hi a tha a ni ka ti a. Zir leh kha ka chak khawp mai a, ka nu leh pate hnenah ka hak lai ve chiah chiah hi min ken chhuah tir ula, a bak ka la miah lovang a, IAS ni turin lehkha kan zir ve leh teh ang ka ti a. Eizawng tura kan lo tangkai ve tawh avang khan ka nu leh pa ten lehkha zira chhuah kha min phal sak bawk si lova. (Deputy Speaker : Ngawi rawh lawk...chair kan han inthlak lawk ang e) ka tum kha ti thei lovin ka awm ta a. Ka hisapah chuan thingtlang mirethei te te te awmkhawmna, khawpuia mi awm thei ten an hmuhsitna thinah hian khawng IAS kan zir ang a, ka pass hunah LLB kan zir leh ang a, chumi hnuah Darlawnah VCP-ah kan tang teh ang tih kha ka khaikhawmna a ni ta a ni.

Khatiang a nih kha chuan VCP, IAS val, LLB anih kha chuan IPS pawh IAS pawh IFS pawh lo kal sela Darlawn kha an hmusit dawn tawh lo tih kha ka hria a ni. Chuvangin, ka ngaihtuahna ramah chuan hei hi ka ngaisangin ka ngaihlu a ni IAS, IPS leh IFS te hi.

Chutiang chuan an lo ngaihsanawm hle tih hi a chiang a, thil pawh an lo tithei tih ka hria a. Pu Thangchungnunga a boral ta a, Darlawn Congress Group President a nih laiin kei Block President ka ni a kan inzui thla dun a. Tea Board ho Mizorama an lo chhuah tan tirh ti mai ila ka hriat chinah chuan,

Thingpui chingtu tur an rawn ngaihtuah dawn tumah kan lo hre ru ve a, Pa Thangchungnunga nen kan lo dawr ve a ni. An Hotel thlennaah theihpatawpin kan lo tlawn ve a, kan lo buaipui ve a, kan tlangdunga thingpui chin ti turin kan lo be thlu ve zan mai a, kan lawm khawp mai a. Thingpuite kan show ve ham ham mai a kan phak ang tawk tawkin, tah chuan kan tifel vek tawh emaw kan tih lai khan Pu Lalkhama, IAS pachal kha helaiah a lo thu reng mai si a sorkarah khan. Ani khan lo kal rawh se a ti a, a ko va, kan tih tawh hnu kha min sut sak leh a, Biate lamah khan min sawn sak leh ta daih mai a. Lungawithlakloh khawp mai a, amaherawhchu mimawl tan chuan va bawhzui leh ngaihna a awm tawh lova. IAS pachal kha a ni miau mai a. Chuvangin, hetiang miropuite hi kan ram in kan hrin chhuah teuh hi a tulin ka hria a. Chutilo chuan, kan hmasawna te pawh a rual khai thei tak tak lo a ni tih te pawh ahriat a.

Mi sawi te ka hre thin a official ho te pawh IAS awmna khaw ho te hi chu sawilo mahse an thiante hian an awmna khaw lama development awm tur hi an lo hriat sak khawp a, an sawi loh pawhin an lo tihsak tho a ni te min tih sak a. Chuvangin, khawtin hian IAS, te IPS te, IFS te hi kan neih theih hlan hi a nghahhlelhwamin ka hria a. Chu chu ram hmasawna bulpui ber pawh a niin ka hria a.

Pu Speaker, ngaihtuahna ramah duhthu kan sam a nih chu. Mipuite zarah MLA ni mahila, competition a kan luh san ber chu MPF in common platform an siam a kan din ve kha, kan inelna sang ber thlen phak ve chin kha a ni mai a. Chuvangin, MLA kan nih tawh loh hnuah phei chuan engmah kha a ni leh tawh dawn silova. Chuvangin kan nih chhung a heng inelna sang a mi te dinhmun tur ngaihtuah leh sawi thei a kan awm ve hrim hrim a pawh hi a thain ka hria. Tun dinhmunah chuan a lawmawm ve hrim hrim a Chief Secretary te, Director hote pawhin 'sir', 'sir' min han ti ve a. Hetiang 'sir' min han ti ve hi a ropui hle in ka hria a. Khatiang 'sir' min ti tu tur te an lo tam zel theihna tur kha kan sawi a ni a. Kan thatpui dan tur hi han chhut ila, a lawmawm hle in ka hria a.

Tin, ramchhungah sawi ta ila, Mizoram a pawl lian ber YMA chuan ramleh hnam humhalh hi kan thupui ani a. Ram leh hnam humhalhna pawimawh

ber chu vawiina kan resolution hi ani. Heng IFS, IPS te, IAS te hi kan neih loh chuan ramleh hnam engtingge kan humhalh tak tak theih ang le. Special cadre kan lo neih ve chuan in elna sang dinhmun chan theihna hi Mizo faten an lo chang ve ang a. tichuan anni avang hian ram leh hnam humhalhna chungchangah pawh kan kumpuan thupuite hi alo hlawhtling awlsawt dawn niin ka hria.

Kan Mizo hla in, 'Mizo kan ni kan hmel a tha kan tum a sang bawksi,' tih hla nei kan ni alawm mawle. Chuvangin heng dinhmun sang, inelna sang post hi Mizote hian kan cho a ni tih hman atanga kan hla atang khan alo lang daih tawh a ni. Hetianga tan kan lak lohva special cadre hran kan neih loh chuan hnam dang hlar lal an lo nih khan, kan Mizo officer ho khan, 'pu, pu,' an ti ringawt dawn a. Chuvangin Mizo leh Mizo rilru zau tak thenawmkhaw venna rilru pu a khawsaho chi ang kha, hnam dang lakah chuan a ni thei si lova. Heng resolution sawichhuah theih tura an awm leh sawitu han nih pawh hi a ropui hle in ka hria. A move tu nih kha kan tum vei nen, session hmasa lamah khan kan sawi hman ta lova. Kristian ten kan tih tur ramtinah kal ula chanchintha hril rawh u atih te pawh kha, hengho hi ram dangah nihna pawimawh a kan theh chhuah chuan kan kristianna an kalpui ang a, kan Pathian thu a thlen dik theihna turin an tangkai em em a ni.

Kan resolution hi a pawimawh em em a, Mizoram state in All India Services IFS,IPS,IAS neih ve ngei theih nan theihtawp chhuah ni rawh se, tih hi ka thlawpin a tha ka ti ani tih kan sawi ve duh chu ani e. Ka lawm e.

Pu R. LALZIRLIANA, MINISTER : Pu Speaker, ka lawm e. ka hma sawitu in a sawi ang khan sawi ve loh chu a thalo ang e sawi tur a nei ve lo te min ti ang a kan sawi ve ang e.

Vawiina kan member Pu T.Sangkunga resolution, Mizoram state in All India Services,IAS,IPS,IFS (Indian Forest Service) separate cadre neih ve theih nan theihtawp chhuah ni rawh se, a tih hi hmana atanga a duh leh duh lo te inhniaalna tam tak awm thei ani a. A thalo zawnga ngaihtuah pawhin kan hawi a zau lo lutuk ang e tih theih ani ang a, a tha zawnga ngaihtuah pawhin thil tam tak a sawi theih bawki ang a. Ram in relbawlina ah executive kan tihte hi an pawimawh hle mai a. Chutah chuan hmasawinna duang tu ber leh tihlawhtling tu ber anni tih

hi kan hriatsa a ni a. Executive kan tih hi chi hnihin a then theih a, political executive kan tihte chu mipui thlan chhuah vawiin ni a helaia awm ho ang chi an ni a. Permanent Executive kan tih chu Public Service Commission in khami kal tlanga thawk tura an thlan chhuahte mithiam rual kha an lo ni leh thung a. Heng pahnihte hi thawk ho rial rial tur an ni. India ram dan puia All India Service a awm tura tih chu a chuang ngei a, All India Service kan tih chu IAS te, IFS te, IPS te hi Central Service nen a hrang tih pawh hi kan hriat a tul hle a ni. UPSC chuan IFS, IPS, IAS atana a thlante chu state cadre hranpa a pe theuh thin a. An pension hma chuan an cadre state ta kha an ni a, central sorkar atangin deputation in hmun dangah lo awm mahse, a tawpah chuan an cadre service ah khan an kir leh deuh zel a ni.

Tichuan Mizoram hi, AGMUT cadre hnuaiah kan awm a, AGMUT cadre chu Arunachal Pradesh, Goa, Mizoram leh Union Territory te hi an ni tih kan hria a, chumi enkawltu chu Ministry of Home Affairs an ni tih kha kan ngaihthlak tawh kha. Assam, Meghalaya hi join cadre nei chu tunah hian an ni leh mai ta a. An chungah thuneitu chu state sorkar an ni ta thung a, chutichungin cadre hranpa pek an nih theih nan political executive kan tih te pawhin nasa takin hma an la reng tho va. Tin, anni aia state lian bik ni hauh lo Manipur, Tripura te pawhin cadre hran an nei der tawh tih kha kan hria a. Hengte pawh hi a rual awh thlak hle ani. Chutiang chuan cadre officer kan hrawn te hi MHA hnuaia awm anih avangin transfer posting ah te pawh hian kan thu lova state sorkar in thuneihna a nei lo a ni. Chu chuan administration leh discipline a nghawng nasa thei viau in a rinawm a. Hmanni lawka Lunglei lama harsat deuh na kan han tawh pawh khan sawlai IAS kha transfer emaw, eng emaw kir leh tur emaw a han tih dawn pawh khan keini thuneihna a ni lo va. MHA-ah khan ngenna kan thlen dek dek ngam chauh a ni tih kha keimahniin a tak ngeiin kan hria a ni. All India Service Officer tam tak hi NE State cadre a awm hi an hreh thei hle a. AGMUT cadre hnuaia Officer te pawh in New Delhi hi posting tha berah an ngai a. Mizoram a rawn post phei chu in hremna ang deuh thaw a ngai anni em aw tih theih in a awm a. Chu chuan paid vacation, hlawh la tho chung si a, chawlh hahdamna nuam takah an rawn hmang mai em ni aw tih theih a ni. Tam tak hi chu tha tak tak te pawh an ni tho a, kan hria a. An haw tur te pawh kan ui

ngawih ngawih, lo kal leh tum ang che ti a han chah te, beisei leh em em te kan nei thin a ni.

Heng officer te hian kum 2 kum 3 atana post an nih avang hian an tan hian thahnem ngaih lutuk na awm lem lo va thawk te pawh hi thil awm thei tak a ngaih theih a ni a. Mualpho loh na tawk velin, an service a chhiat lohna tur atan kum hnih khat han tlingtlak mai chu harsa an ti lo. Nichinah kan ngaithla vek tawh a ni. Tiang chuan a awmzia dik tak chu an ke pakhat in Mizoram rawn rap in, an ke leh lamin State dangah, an home State-ah emaw, Delhi-ah emaw an awm reng a ni lawm ni tih theih te pawh hian a awm thin a ni. Chuvangin State inrelbawl naah hian State hmasawna atan chuan rilru seng tak tak a ngaihtuah a ngai a. Mipui ten an hnathawh, an thluak tha em em a kha kan chhawr em? Thinlung tak tak in min tih hmasawn an tum em tih te ngaihtuah tel zel a ngai a ni. Chuan Pu Speaker, Meghalaya sorkar thuneitute chuan Assam/Meghalaya Cadre hnuaiia Officer zingah Assam State in an duh loh deuh deuh te hi Meghalaya-ah hian min rawn pe a ni tih te pawh thawkkhat lai chuan boruak a awm a ni tih kan hria a. Chu chu tuna Mizoram chan chiah hi niin a lang a ni.

Tichuan, Separate Cadre kan neih theih chuan officer tha lo zet zet kan hrawn reng ang tih te pawh hi thudik tho a ni a. Helaiiah an awm reng si chuan tha lo deuh deuh te kan duh kan thlang thei dawn miah lo va. Khulai atanga an rawn tih vek tho tur anih si avang leh Mizo te pawh kha kan awm lo tawp thei ani tih kha hriat chu a ngai tho mai a. Tiang chuan Joint Cadre hnuaiiah chuan officer tha neih chang a awm a, tha lo te pawh han neih chang a awm a, kan hria a ni. A hrechiang tute kan ni. Tichuan, officer awm tha duh lo te chuan an chung a action la tur pawh in kan sawi tawh ang in MHA rawn zel a ngai a. Chuvangin State pawimawhna kha a tla hniam em em in ka ngai a ni kei chuan.

AGMUT Cadre a awm hi All India experience neih na a ni kan ti a, a dik a. Delhi Administration thleng a experience neih theihna a ni a. Chuta rei tak an zuk awm a, Mizoramah emaw anmahni State AGMUT Cadre te khawi maw a an chhuah leh kha chuan mi hmantlak tak takah te pawh an lo awm reng thin a ni tih kan chiang a. Mahse Delhi experience nei Mizoram tana thahnemngai chuang si lo te hrawn fo mai ila, kan State tan hian eng nge hlawk na awm chuang ang tih kha ngaihtuah naah a lian viau thei bawk a ni.

Tichuan, State Cadre hnuai officer chuan a thawh hun chung a hun tam zawk a hman na tur a hriat reng avangin thahnemngai takin a thawk ang a. Sorkar tana theihna zawng zawng, a theih tawp a chhuah thei ang tih hi vawiin niah hian kei ka beisei dan leh ka rindan a ni a. AGMUT Cadre hnuai a kan awm reng hian Mizoram hi State puitling ang a ngaih kan nih loh zia tilang tute pawh a ni thei em aw tih te pawh hi a leh lam zawng a zuk ngaihtuah chuan a awm thei a ni.

Separate Cadre neih hi State inrelbawlina ngaihtuah in kan thatpui zawk in kei chuan ka ring a. Tin, a move tu, resolution neitu pawh hian a hria a. Tin, a sawitu tam ber khan an ngaihdan te pawh niin ka hria a. Chuvangin, he resolution hi pass ngei tha ka ti a. Separate Cadre neih theih dan tura theih tawp kan chhuah pawh hi a tul viau in ka hria a. Chutiang anih lai chuan kan cadre strength kha a tlem hle mai a. Heng te pawh hi 10 tal nei thei tur hian kan nawr nghal te pawh a ngaiin kan ring a ni.

A tawp ber atan chuan Separate Cadre lo nei ta ila kum 30 chuang lai kha Mizoramah an rawn awm dawn tihna a ni a. Chung a he resolution ka hmuh a ka rilru a lo lian ber ta a chu, kum 30 chuang lai hnamdang, ringlo mi kan tih te pawh kha kan ramah an lokal chho ang a. Chutah chuan engnge kan tih ve tur ni ta ang tih ka rilruah a lo awm nghal a. Kristian State kan ni a, Kristian ram kan ni a, za a za Kristian Mizote chu inti ngam kan ni a. Chutah chuan kan nunah mite hian Lal Isua an hmu em? Krista nun mawi tak kha keimahniah hian an hmu em tih kan in enchian a ngai khawp mai a. Nichinah khan kan member te khan an rawn sawi a, ka hma lawk a sawitute pawh khan. Mizo tawng an lo thiam ang a, tin Mizo tawng an lo thiam piah lamah khan kan culture leh kan tradition te pawh kum 30 lai an rawn awm chuan an hre vek ang a. Chuvangin India ram hmun tina mite, mithiam lokal khawm te khan engnge kan nih, kan tradition leh kan culture mawi leh tha zawng zawng kha an rawn hrechhuak ang a. Chung angah chuan Krista nun mawi keimahniah a lo lan pheih chuan Missionary a hranpa a zuk in tir vak lo hian helai atanga an kir lehah chuan kristianah te pawh hian an zu in pe thei zawk a ngem tih te pawh kha ngaihtuahna min neih tir viau a ni. Chuvangin kan nei tak tak dawn a nih chuan Kohhran lam atang pawh hian kan in ennawn a ngai khawp dawn in ka ring a ni.

Hei, kan resolution pahnhna te pawh hi han sawi a chakawm khawp mai a. Amaherawhchu kan sawi hman dawn lo, nidangah pawh resolution tam tak kan

pawtchhuak a, pakhat bak hi kan sawi hman ngai mang lo va, pahnih han pass te pawh kan nei zauh a. Helamah hian a pahnihna sawi ngam lo ang lek lek a han in puhna ang te phei kha chu awm lo hram se la. Kan House kalphung a ni tih kha kan hriat ve kha a pawimawh hle in ka hria, a. Chuvangin, kan MLA zahawm tak Pu T.Sangkunga'n "Mizoram State in All India Services IAS,IPS,IFS Separate Cadre a neih ve ngei theih nan theih tawp chhuah ni rawh se", tih hi pass ngei ka rawn thlawp e, ka lawm e.

S P E A K E R : Pu Zawma sawm tawh mai ang aw.

Pu VANLALZAWMA : Pu Speaker, ka lawm e. Vawiinniah resolution tha deuh mai kan member zahawm tak Pu T.Sangkungan a rawn move a. Sawihona hun tha deuh kan nei a, a lawmawm ka ti a. Nimin lam khan keini i veilam ami te pawh hian kan han sawikhawm ve a. Engtingge kan sawi ang tih kan han relkhawm ve a. Tahchuan, he resolution hi kan chhiarchhuak ve hrim hrim ang e "Mizoram State in All India Services IAS,IPS,IFS Separate Cadre a neih ve ngei theih nan theih tawp chhuah ni rawh se". Hei hi kan ram tan leh sorkar tan, kan hnam tan thil tha tak a ni e a tiin hei chu pass pui ngei chi a nih dawn hi, tiin kan rel a. Keini lam berin a do zawng a kan sawi vak loh chuan awlsam deuh pawn a pass theih ang a. A remchang anih tak leh a pahnih naah te kan kal ang a. Tin, a remchang lo a nih tak leh a ban te pawh kan bang hma deuh ang a tih avang khan a hming a leader khan sawi hmasak chuh ni se kan hotuten an ti a, kan phar ve deuh zuau zuau kha a ni a. Amaherawhchu tiang khan a tawp lama sawi turin duhsakna min han pe a, ka lawm hle a, he Resolution hi i veilam ami te pawh hian kan thlawp in pass mai hi a tir phat atang khan rawt hi kan duh a ni tih kha ka'n sawi duh a.

Kha nimina kan sawikhawm lai pawhin kan ngaihtuah a, Pu Sangkunga tak phei chu helaiah Secretariat-ah hian a pawimawh a Secretary te thlenga service rei tak nei, chinchang hre tak a ni a. A ni in a move a, tha a tih kha chuan a tha ang tih kha kan ngaihtuahna ah a awm nghal a. Chutih mek lai chuan a move phei chuan a move thiam dawn ropui si a, kan hnial hlei thei lo ang kan ti sa a. Chumai bakah kha a tak taka lo tawng tawh tu Tuirial bialtu zahawm tak ten ama tawn ngei atang ten an sawi chho atang phei kha chuan a tul zia leh a pawimawh zia kha a lo lang a.

Tin, helaiah kan mithiam kan doctor ten a data pawimawh em em zawng leh State thenawm zawng zawngte nen a anrawn tih te pheikha chuan a lo pawimawh hle tih kha a lang a, churang chuan Pu Speaker, i veilam ami te pawh hian he Resolution hi kan support a ni tih kha ka'n sawi a, nichin deuh atang sawi ka'n duh deuh tawh avang khan ka'n phar ve zuai zuai kha a ni tih te pawh ka'n sawifiah nghal nisela.

Tichuan, han din takah chuan ni e, he thil hi thil pawimawh deuh a ni a. A hming a MP ka'n nih ve zawk lai pawh khan Mizoram in an service kan duh ngawih ngawih kan Mizo IAS officer te leh IPS officer te, Mizoram a lakchhuah kan duh te pawh kan hotuten theih tawpin an zuk beih piah lamah a hming a MP nita chu lova umzui teh min ti ve thin a. Nichina kan ngaihthlak tawh ang khan Home Department, Home Affairs lam khu an inti thu khawp mai a, an State ah engnge ni chuti khati an ti kawia, keinin an service kan duh ngawih ngawih te pawh hi lak chhuah hi an har em em a, keimahni IAS officer ngei te pawh hi. Chu chu a nih avang khan tuna kan sorkar mek te pawh hi a ni tho in ka ring a, duh ang ang te pawh hian a in pawh chhuah theih ringawt lova, khulam an in ti thu sia. Ram tana tangkai tur leh sorkar tan pawh a thawhhlawk tur ang kan mi chhuan tawlawl leh kan mithiam te hmun danga service kan lak luh dawn pawhin a bik takin IAS leh IPS te chu lak chhuah an har em em a ni. Churangin hetiang te kan lo nei a nih chuan a tha khawp in ka ring a.

Chutih mek lai chuan nichina kan ngaihthlak tawh ang khan kan ram te alo kilkhawr em avang hian miten kal an chak lem lova, hrem na ang lek lek a ngai a lo kal te. Tin, chhungkuua lo chhoh ho hi chu an harsat khawp mai. Chutih mek lai chuan an han awm tak tak erawh chuan a awm rei hi chuan an ngai fu zel bawka. Mizoram a in awmlai engnge in hmuh dan te han tih hi chuan a kilkhawr deuh nang a han awm takah chuan nuam kan ti khawp mai an ti a. Tin, heta awm tawh hnu ka let leh te pawh, Mizoram thil pawimawh a han biak hi chuan an fel viau zel a ni.

Tichuan, a hranpa te lo nei pheihla chuan deputationa Delhi lama an kal chang pawhin Mizoram tan hian tha deuh in an thawk thei ang tih kha a

rin theih a. Chuvangin kan Resolution hi he ram tan, he sorkar tan hian a pawimawh bakah tangkai tak tur a ni tih kan hria a. I veilama awm te pawhin vawiin ah chuan sawi kan han chuh vak lova, a hminga leader in sawi la a tawk mai e, kan pass pui ngei tur a ni e tiin thu kan nei a, chu chu ka'n sawi ni sela. Vawiin ah he Resolution hi kan thlawp tlat a ni tih ka'n sawi duh a ni, ka lawm e.

S P E A K E R : A lawmawm e. House Leader in sawi tur a neih ka ring a, amah kan sawm tawh mai ang a. Ama zawh chuan Resolution neitu khan a khaikhawm leh ang a.

Tunah hian kan House Leader kan sawihona atang khan engnge sawi duh a neih chuan amah i sawm tawh mai ang.

Pu LAL THANHAWLA, CHIEF MINISTER: Pu Speaker, ka lawm e. Sawi ka tum hranpa lova, mahse min sawm takah chuan sawi tur nei lo nih thlawt kha chu tlawm thlak deuh in ka'n hria a.

Kan hotute an tui lutuk a, an sawi rei hlawm bawk si a. Tin, mi tui em em laia sawi kha in khap hreh bawk si a, Chair lam atangin, hei Resolution dang kan hawi hman dawn lova a pawi hle mai a. Midang ken nachang hre lo lekin in tui kha a lawmawm rualin a pawi mah mah a ni.

Kan ngaithla tawh a, keini ang tan han sawi ve vak tur a awm tawh lova. Kan hun hmasa lam ah kha chuan 1984 – 1987,88, 89 velah kha chuan kan cadre strength hi a te si a, kan duh kan thlang thei dawn si lova. Tha lo deuh te kha nei ta ila kan neilo reng thei mai awm mang e aw tih te kha a awm a, ngaihtuahna mawl takpawh a ni maithei a. Mahse, kan han kalchhoh zel ah khan nichinah kan ngaithla vek tawh a, a hmalamah khan a awm tha duh lo deuh te leh briefcase officer te kha an tam em em mai a. Tin, chawlh, calendar kan han en a long weekends te leh khatiang te a awm kha chuan in prefix leh suffix te khan leave te kha an kal an kal mai a. Tin, LTC te lak te an ching a. Department thenkhat hei Police ang ah te phei chuan pawnlam mi kan ngah deuh kha chuan a subordinate staff lam TA/DA tur te kha an eizawh sak vek emaw ni chu aw tih mai tur te khan a awm a ni. Heng hi tak tak a ni a, kan experience chhoh zing ami kha a ni a. Chuvang chuan duh ang thalin kan cadres a lo lut

tur te kha thlang thei lo mah ilangin ti reng reng chuan a tha zawk emaw ni le tih te a awm a.

Tin, a leh lamah chuan officer tha tak tak an awm ve a, AGMUT cadre chiah hi All India Service tak tak a nih hi mawle anti ve nak nak a ni khulama an in hmuhkhawm nikhuaah khuan. Hei Parikar-a nen pawn kan sawi dun thin a, ani khuan tun thleng khuan ala duh lo niin ka hria a, separate cadre kha, kan cadre strength hi a te em mai a keini chu kan duh love ati a. Sindhe-a te nen kan sawiho a kan pathum in, keini chu kan duh a sin mawle, hei kan dil pawhin min pe thei si lova ka'n ti ve thung a. Chutiang chuan ngaihndan hi a in an loh na ruai a awm a.

Tin, heta an lokal hian kan complete control a an awm loh avang hian harsatna kan nei a ni. Tin, thenkhat hi chu engnge ni, a run dalah thawk ve mai mai te an awm a. A tha tak tak erawh hi chu an awm ve a ni awm phei chu. An han haw dawn pawh a hreh tak taka hreh deuh ang te hi an awm ve a ni, chutiang chu an ni a. Tin, a tha ho hi chuan tawng te an thiam ve zung zung mai a, tiang kha an awm a, thenkhat hi chu a run dal tak tak an awm a. Chuvangin a tawpkhawk ah chuan separate cadre kan neih hi a tha ber ang tih hi chu kan ngaihtuahna a nihna hi a rei tawh a. Thiam ang ang leh theih ang ang chuan kan han ti ve a, kan han ziak ve a tiang khan. Mahselangin chuti chuan kan hlawhtling lawk hlei thei lova tun hi kan thleng ta a ni a. Vawiin ah helaiyah kan member zahawm takin a tul zia te hria a Resolution a rawn pulut hi a lawmawm ka ti a.

Tin, a sawitu zawng zawngin kan support vek tih a lang a, a lawmawm khawp mai. A hminga CM nihna ang te pawhin kan lo ziak nual tawh a, a sawi te pawh kan sawi thin a, mahse beng an khawn vak lova. A chhan chu State thenkhat a bik takin keimahni North East ah pawh hei Arunachal te leh tu tute emaw tlem a kep ngai deuh ang a lang te a awm ve a ni. Central in a an rawn in rawlh ve theih na tur te, entirnan Arunachal te phei chu Chinese trade avang te pawh a ni maithei a. Chutiang chuan separate cadre kan han neih taka tlem a hla ta duai anga min ngaihna te pawh a awm ve a ni maithei a. Chungte avang chuan tun thlengin kan la nei lo a ni maithei a, mahse vawiinah

hei a tul zia hria a House a lungruual taka kan sawiho a kan han pass hi chuan a hminga bawhzuitu tur nih te pawh a nuam anga. Tin, kan pass tawh chuan kan zavaia mawhphurhna a ni tawh dawn a, a nawr tur te pawhin a siruk la te pawhin kan la kal tlang tur ni te pawhin ka ring a. Chutiang chuan kan tih rau rau tawh chuan tih tak taka kan tih kha tul dawnin ka hria a chuvangin, vawiina kan member zahawm tak ina hetiang resolution tha tak kan zavaia House member zawng zawng lungruualna a rawn pulut hi a lawmawm ka ti a. Lungruual taka kan pass phawt chuan khu lam pang pawh chak takin kan nawr thei ang tih ka ring a, chuvangin hlawhtling ngei turin beiseina nen he resolution hi ka rawn thlawp a ni e Pu Speaker, ka lawm e.

S P E A K E R : Tunah chuan resolution neitu Pu T. Sangkunga kan sawm ang a, sawiho na kan neih atang khan, sawisel ngai a awm lovah ngai ila, anin House adopt/pawmpui rawn dil nghal tawh mai sela a tha ang e, amah i sawm tawh mai ang.

Pu T. SANGKUNGA : Pu Speaker, ka lawm e. Vawiinah ka resolution putluh, “Mizoram state in All India Service- IAS, IPS, IFS state cadre a neih ve ngei theih nan theihtawp chhuah ni rawh se,” tih hi kan leader leh deputy leader telin member zahawm tak 12 laiin a thlawp zawng vekin kan sawi a, lawmawm ka ti hle a ni.

Kan hriat angin IAS ho hi an ropui em em a, ‘steel trust’ tih an ni thin a, nawr danglam an har a. Central-ah phei chuan Joint Secretary chin tan chuan ` 20 crore sanction a har reng reng lo. Kum 1997 leh 1998-a YMA-in ‘zirna uar kum’ kan puan tum khan hmun hrang hrangah thu ka sawi thin a. ‘Aizawl bazaar pheia in hi in neih duh chuan IAS officer nih tum ula. In nih chuan bazaar phei nu ho hian an fate an zawrh ang che u. An fanu te i neih duh phei chuan an ro in khawm ang a, an in hi in ta a ni mai,’ ka ti thin a. Dawrpui veng KTP chanchinbu-ah min rawn kap a. ‘YMA kumpuan speaker Pu T. Sangkunga’n kan inhmun a sem zo dawn,’ tiin an chhuah a, a copy min rawn thawn a ni. Chutiang khawp chuan IAS, IPS, IFS ho hi an hlu a ni. Vawiinah an cadre kan khel laih laih pawh hi a awm a ni. ICS kan tih lai khan David Llyod George-a, British Prime Minister khan, ‘institution tihchhiat miah loh tur pakhat a awm, chu chu Indian Civil Service a ni,’ a ti a. British in India awpbeh nan ICS-ho thatzia a hrechiang a, Parliament-ah khatiang khan a sawi a ni.

Member zahawm tak Pu Hmingdailova Khiangte in nichina a sawi ang khan kan officer te promotion hi Home Ministry hian a kum tel hian DPC an tih tlai sak duai duai mai a, chu chu kan officer ten an junior phah zel bawk si a. Kan House Leader in a sawi ang khan Goa leh Arunachal Pradesh te nen a huho-a kan tih chuan a zia tawh ka ring. Home Ministry-ah Pu Rijiju-a Home Minister of State a lo ni a. Goa CM ah Defence Minister bang hlim Parikar-a kan nei bawk a. ‘Northeast represent tu ka ni, Arunachal angin min en suh u, Northeast Minister ang ah min ngai rawh u,’ ti ngat tu Home-ah a awm bawk a. ‘Heti ringawt chuan IAS te, IPS te kan nei tlem bik lutuk ang,’ ti a thiam taka state pathum kan in lungrual chuan hma kan sawn mahna. Mahse tuna zu nawr a tihhlawhtlin theih mai tura ngai lo in tun hma ai chuan a beih a hun leh zual deuh a ni lawm ni ka tia.

Kan sawi tak ang khan Nagaland state chauh hmun thuma thena hmun khat chauh mai post kan han nei te hi chu a awmlo lutuk deuh a, kan Deputy Leader zahawm tak in a sawi ang deuh khan separate cadre kan nei lo deuh a nih pawhin kan cadre strength tih len hi chu nawr chhuah ngei ngei chi niin ka hria a.

Chuvangin Pu Speaker, i ding lam ami te leh i vei lam ami te zawng zawng pawhin vawiina lungrual taka private resolution ka rawn put luh ‘Mizoram State in All India Services IAS, IPS leh IFS separate cadre kan neih ve ngei theih nan theihtawp chhuah ni rawh se,’ tih hi min pass pui turin member zawng zawng te ka sawm a ni e. Ka lawm e.

S P E A K E R : Awle, a Resolution neitu Pu T.Sangkunga’n a resolution he House pawmpui a rawn dil a. A resolution chu hei hi a ni: “Mizoram State in All India Services, chung te chu IAS, IPS, IFS te hi separate cadre a neih theih nan theihtawp chhuah ni rawh se” tih a ni a, he resolution hi pass duh zawng in ‘remti’ ti rawh u le. Remti lo kan awm em ? Awmlo. Tichuan he Resolution hi lungrual taka pass a ni tih ka puang e.

Pu T. SANGKUNGA : Pu Speaker, ka lawm e.

S P E A K E R : Dar 4:00 PM a ri mai dawn a, (Pu LALRUATKIMA : Pu Speaker, minute khat ala awm a, next resolution kha kan lut thei asin, next business ah khan, Pu Speaker, khalai kha time management zawka kha a nia. Kan hun vawn dana kha nakin zelah precedence awm thei a nih avangin Opposition Leader khan kan hmanng zo

lo a nih pawhin ban maite kan lo rilruk a, a ti kha a ni sia, an rilru a va inkalh ve mawle) I move hman kher tawh lovang, a Speaker thu leh thulo lam aiin hun hian thu nei ber sela maw, engpawh chu ni se, sana hi a inang lova, kei ah pheii chuan minute 2 in a pel daih tawh a nia. Chuvangin a lal lal sana in rorel mai se. Chairman sana a lal ber, awle, tunah chuan kan chawl rih ang a, Thawhtan ni 20 zing dar 10:30 AM ah kan kal khawm leh dawn nia.

Sitting is adjourned 4:00 P.M